

蒙兀兒史記
結一宦主人自題

拾





阿只吉出伯列傳第二十四

蒙兀兒史記卷第四十二

武進屠 寄篡

阿只吉察阿歹曾孫也

元史宗室世系表誤差前一代

祖木阿禿干從成吉思汗征西

域戰死巴某

事詳本書西域傳

父不里蒙格汗時為巴禿所殺阿只吉與兄

阿卜失合哈薩兒留漢地襲領本部軍在西京太原者

太原本察阿歹分地至元七年

九月本紀稱西京饑餓諸王阿只吉所部就食太原知西京亦有其部人

聽忽必烈汗潛邸徵調

忽必烈汗當蒙格汗時盡主漠南漢地軍國事故

歲庚申忽必烈汗召集忽里勒塔之會於龍岡右手大王惟阿只

吉及幹歌歹汗庶子合丹闕列堅之孫忽魯歹赴會以翊戴功蒙

厚賞特被信任皇子北平王那木罕之被劫於阿力麻里克也西

北軍中驟無主忽必烈汗命阿只吉建牙別失八里鎮之

阿只吉出鎮別失八

里本紀無年分可考但觀至元十六年賜阿只吉所部軍糧馬羊之數約略可知

兼轄天山南路畏兀兒合刺火者及

哈密力等處屯戍軍事

至元十九年本紀云的斤帖林以已資充屯田費阿只吉以聞按的斤帖林為哈密力城主以此知哈密力亦受阿只吉節制

至元十六年給所部糧五千石軍馬五千匹羊萬噉後二年又給

糧六千石自太和嶺

今雁門關所在之山

至別失八里為置新驛三十所以速

軍報阿只吉本部在太原而戍軍在北庭故爲置此驛本紀未能明言其故阿只吉出私馬助軍。朝廷償其直。

別給鈔令購牛及農具籽種。與其分地貧民耕種。自贍。當是時。阿

只吉族人篤哇黨。坳海都。竄擾天山南北。勢張甚。阿只吉及皇子

西平王奧魯赤與戰。敗績。畏兀兒之地大困。二十二年。丞相伯顏

來視師。朝議以別失八里行軍事。專委伯顏。阿只吉王府官及李

欒台右萬戶府寮。但主留務。李欒台。成吉思時右萬戶李幹兒出之子。此時李欒台已卒。其子玉昔帖木兒襲職。以世勳入爲都臺御史大

夫。至元二十三年。本紀仍稱李欒台。帶者以位言。不以人言。且軍事本屬樞密院。當時卻與玉昔帖木兒會議者。正以彼本右萬戶。身雖在朝。府在金山也。阿只吉既失

律。用舊恩不加擢。但不任以戰事。而賞賜仍不輟。本紀至元二十五年。賜阿赤吉金二百五十兩

銀二萬五千五百兩。鈔九千挺。紗羅絹布有差。阿赤吉即阿只吉。鐵穆耳汗嗣位之初。其部下玉速福以屢

叛伏誅。臯亦不相及。仍賜所部有加。元貞大德間。兩次賜鈔四十萬挺。糧萬石。大德八年。給馬料價鈔三千九百挺。又與

安西王阿難荅諸王也。速不干同賜鈔萬四千挺。又皇慶二年十二月。本紀書發米振阿只吉部。不稱諸王。其時阿只吉已薨。所謂阿只吉以位言。不以人言也。時諸王雜

居漢地者。所在芻牧擾民。每出畷獵。率取民車牛載獲。或且食宿

民舍。阿只吉駐太原。河東之民困於供億。有詔詰責。則以貧乏爲

辭。乃歲賜糧萬石。別給鈔三萬挺。使營子錢。以所入供出獵廩膳。

毋再勞民。七年以太原地震成災。民饑重申前禁。然其部狃於故

習。仍因獵擾民不止。本紀延祐六年十一月。中書省臣言曩賜諸王阿只吉鈔二萬挺。使營子錢以供畷獵。廩膳毋取諸民。今其部阿魯忽等出獵。恣索

於民。且為姦事。宜令宗正府刑部訊鞫之。以正典刑。制曰。可按阿魯忽。薨於至元三年。此所謂阿魯忽。蓋其後人或部下。以位言不以人言。阿只吉薨。薨年史無

大德八年。九年。明文約在子秃刺襲領其軍。世表以越王秃刺為阿只吉之孫。威遠王忽都鐵木兒之子。然

有七年。秃刺必非其子。秃刺少以勇力聞。大德末。鐵穆百汗昇遐。無嗣。巴牙兀

可敦與左丞相阿忽台等議。推嗣安西王阿難荅承大統。右丞相

哈刺哈孫黨於海山汗兄弟。密使分召之。愛育黎拔力人達汗自

懷先入。謀除異已。先阿忽台。而阿忽台多力。人莫能近。八達汗乃

與秃刺謀。使帥潛邸衛士。直入大內。手縛阿忽台。并其黨。諸王明

理帖木兒帥左右格鬪。不勝。乞迷亞可丁書稱率眾與戰。按宮闈。非大戰之地。殆格鬪耳。以意改正。與阿難荅

及巴牙兀可敦同被執。幽宮中。尋出阿忽台等於宮。論殺之。而送

阿難荅明理帖木兒於上都。賜虎。巴牙兀可敦亦廢徒東安州。自

盡大事遂定。海山汗即位。第功封秃刺越王。金印獸紐。三宮盡幸

其第。賜鈔萬挺。以紹興路為食邑。紹興本唐越州。故以越為封號。哈刺哈孫傳乃謂以慶元路為食邑。慶元為唐明州。殊與秃刺

勅號

然秃刺自以為功高賞薄內懷怏怏至大元年秋海山汗幸涼

亭上都涼將御舟秃刺遽前止之汗問何為秃刺曰人亦有言一箭

中麋毋曰自能百兔未得未可遽止此蓋蒙兀儕輩相靳之鄙諺

而秃刺出之御前不遜海山汗由是銜之既而大宴萬歲山秃刺

醉起解御賜金帶擲地瞋目謂汗曰爾與我者止此耳汗益疑其

有異志明年正月命楚王牙忽都丞相康里脫脫平章赤因帖木

兒世表阿只吉有子赤因帖木兒疑即此平章鞫之辭服遂賜死又明年三寶奴誣告寧王闊

闊出謀不軌秃刺子阿刺荅失里許助力元明善太師淇陽忠武王碑云孫女五人次三曰不魯合只罕為越

王阿刺荅失里妃即此秃刺子武宗紀作阿刺納失里文宗紀作阿刺忒納失里嫌與豫王同名易混今從碑獄成寧王廢徙高麗同時竄

阿刺荅失里及其祖母母妻於伯鐵木兒所泰定初雪其冤賜環

命鎮沙州沙州在察阿互分地二十四城內前後賜鈔九千挺天曆初有推戴功明年

十一月以其父越王秃刺印予之至順元年五月遣鎮西番舊紀誤稱為豫

王豫越二字北音相近秃刺舊傳云子西安王阿刺忒納失里天曆初以推戴功進封豫王又為

本紀所誤然明南北監本元史世表越王秃刺位下闕其子名爵清朝武英殿本元史誤据秃刺

舊傳於越王秃刺下妄補豫王阿刺忒納失里名爵又於西平王奧魯赤位下列豫王阿忒思納

失里名爵於雲南王老的罕下於是一時有兩豫王然諸王表豫王下止有一人名阿忒思納失

里也餘詳世表攷証

明年中書省臣言越王禿刺在曲律可汗

原作禿刺

時以紹興路

為食邑歲割賜本路租賦今其子阿刺答失里

原作阿刺納失里

襲王號宜

歲給其半圖帖睦爾汗從之後無聞

出伯

一作朮伯亦作朮白

旭烈兀之孫也

旭烈兀十三子按之中西書可考知者九人不知出伯之父何名疑是蒙哥帖木兒元史世表列出伯於旭烈

兀玄孫之位以為哈兒班答之子大誤考多桑書合兒班答生於西二二八一年即至元十八年而元史世祖紀至元二十年正月即書賜諸王出伯印其年合兒班答止二歲耳世豈有二歲之父乎其誤可知矣

多仕於本藩

次子出木哈兒封阿里不哥中統初為之前

唯出伯雷漢地海都

篤哇之亂出伯帥所部蒙兀軍及探馬赤軍

色目種人戍邊之軍稱

為朝廷捍

禦西陲置本營於甘州兼領瓜沙以西北至合刺火者畏兀兒地

征戍事隴右諸王駙馬及兀丹等處宣慰司都元帥吐蕃烏思藏

宣慰司鞏昌等處便宜總帥府並聽節制

本紀至元二十五年十月始見烏思藏宣慰使鞏昌汪木之名蓋土

司也二十六年五月鞏昌汪木私以金銀器皿給諸王出伯合班等云云汪木名字互差蓋玉為汪之誤木為朮之誤也元貞一年九月出伯言汪總帥等部貧乏云云据是足証烏思藏宣慰司及汪總帥並受轄於出伯

至元二十年賜銀印龜紐

諸王表二十五

海都叛黨玉論亦

撒八巴諸王先後窺天山南路出伯部將也禿古等與之力戰二

袁史四十二

三

十一年。部將兀渾察以游擊之師。巡乞思合兒。敗敵兵二千。禽其

一將。二十五年。海都犯邊。出伯總駙馬昌吉諸王也。只烈察吉兒

合丹兩千戶軍。出征有功。一歲中賜金二百五十兩。銀七萬五千

二百五十兩。幣帛紗羅二萬匹。後二年。章吉寇哈密力。章吉亦作掌吉。疑即駙馬昌吉。

二十五年後。叛州海都者。實翁吉刺氏。唆兒火都。即只兒幹帶之孫。掌吉之名。見特薛禪傳。哈密力原作甘木里。今新疆之哈密。應時為畏兀兒地。出伯與諸王伯

荅罕。阿開王忽魯歹子。亦憐真。開端孫蒙哥都子。擊走之。三十一年秋。鐵穆耳汗以出

伯部四百餘戶告饑。命徙其家屬就食內郡。仍賜其奧魯軍年例

鈔三千挺。元貞初。立都元帥府於北庭。以平章政事合伯一作掃伯為都

元帥。江淞行省右丞撒里蠻副之。皆佩虎符。與孛來將探馬赤軍

萬人出征。別立都元帥府於曲先塔林。以釁都察佩虎符為都元

帥。竝受出伯節度。尋分出伯所統探馬赤及紅襖軍各千人。隸西

平王奧魯赤。當是時。朝廷宿重兵和林。以西陲軍事委之。出伯出

伯治軍嚴重。常堅壁壘。遠斥堠。以待敵。來則峻拒。去勿深追。無大

勝。亦無大敗。而海都篤哇兵勢亦趨重東方。以是出伯在邊十餘

年。河西編氓耕牧不驚。諸王將拱聽約束。朝廷無西顧之憂。出伯請汰所部探馬赤軍懦弱者三千人。代以精壯。朝廷從之。但命非奉旨毋擅徵發。尋給軍馬七千二百匹。糧萬石。事在元貞二年又以邊地沙磧乏芻。大德初。特給征行馬粟。四年。賜所部鈔萬五千四百挺。五年七月。又賜六萬挺。別給市馬直三十八萬四千挺。是月。又與諸王妃札忽兒真同賜鈔四十萬挺。一時寵眷。西道諸王莫與爲比。會海都死。察八兒嗣。朝廷未審其向背。六年二月。益出伯軍三千人。人馬二匹。官給其直。又籍甘州善射者二千人。隸之。使嚴軍以觀敵變。明年。察八兒請息兵。鐵穆耳汗遣使撫納。西北邊解嚴。御史臺臣言。瓜沙二州。自昔爲重鎮。今大軍屯駐甘州。使官民反居邊外。非宜。乞以蒙兀軍分鎮險隘。立屯田以供軍實。八年春。遂命出伯所部軍屯田僻出合出谷。給軍馬萬三千五百匹。帛四百端。是年十二月。以積年防邊功。特封威武西寧王。換金印駝紐。明年。賜鈔三萬挺。又明年。命領甘肅等地軍站事。賜鈔如前數。海山汗

即位。進封幽王。賜金印獸紐。出伯請拘括瓜沙屯戶。逋戶漸丁隸

所部。中書省臣議弗從。以二州雖諸王分地。其民役於驛傳。故也。

出伯戍地。西接兀丹。兀丹南有八荅山。產玉。古傳所謂羣玉之山

也。常謫辜人采之。道遠。進奉勞費。至元中。朝廷嘗賜出伯銀幣累

鉅萬。載以官驢。至則并賜之。時桑哥當國。謂不若以驢載玉而回。

至大初。出伯又進玉六百十有五斤。賜金千五百兩。銀二萬兩。鈔

萬挺。從人四萬挺。據此知桑哥曩年請以官驢載玉而回為國省費不少。正不得以人廢言。會撒的迷失。忙兀臺之孫。叛

掠出伯甘州輜重一空。中書省至大二年八月。請脩甘州城。因追述其事。則撒的迷失之叛。當即在元年秋冬間。出伯尋薨。

子喃忽里襲。武宗紀至大元年十一月。賜諸王南木忽里金印。南木忽里即喃忽里。金印即幽王印。据此知出伯之薨。即在是年之秋。舊紀失書。耳。諸王表。幽王喃忽里延

祐七年襲封年分誤三年正月。賜鈔萬二千挺。三月。朝廷遣刑部尙書馬兒至

甘州。和市羊馬。分賚所部軍。費鈔七萬挺。皇慶二年。又給喃忽里

等貧乏軍馬萬匹。紀稱始幽王南忽里然非是年始襲封仍與諸王火羅思迷。句脫歡。句

駙馬忙兀帶同賜金銀鈔幣有差。延祐二年。又給所部買馬鈔十

二萬挺。喃忽里薨。忽塔忒迷失襲。事在天曆二年至順初。諸王禿堅拒命雲

南。出伯後人不顏帖木兒自奮請給鞍馬從大軍進討圖帖睦爾

汗嘉其意許之明年事平入朝以功賜襲幽王紀表作邠王辨詳世表或証不顏帖木兒與忽塔忒

迷失不知是父子抑是兄弟然兄弟為似忽塔忒迷失襲位甫二年而代以不顏帖木兒似功舉問題非先生問題其年八月特命圍獵撫州

以自娛三年正月命甘肅行省為建府第後一月給以幽王祿本

紀此處如字及其王傅祿至正十二年出伯後王有嵬釐者襲封幽王以

斬馘西番叛酋功賜金束帶

論曰北庭扼天山孔道孤懸敵中以丞相伯顏之知勇當海都繁

銳之師猶不免有洪水山之挫則阿只吉失律夫焉足責出伯南

倚長城僅以西北二面當敵征戍二十年卒保瓜沙以東不涉戎

馬之跡其封爵一等非幸致也海山汗得國不正本有疑忌宗親

之心秃刺恃功怨望以口語之臯誅烏盡弓藏千古有同慨矣

阿只吉出伯列傳第二十四

蒙兀兒史記卷第四十二

者卜客客列亦速哥列傳第二十五蒙兀兒史記卷第四十三

武進屠 寄篋

者卜客札刺亦兒氏國王木合黎之季父也用父帖列格秃伯顏命事成吉思汗之弟合撒兒四駿之一孛羅忽勒卽者卜客得之主兒乞遺營歸以獻訶額侖可敦爲養子者也歲庚申成吉思與四種塔塔兒戰於荅闌捏木兒格思之地合撒兒不在軍中時翁吉刺部族駐牧合泐合水下遊捕魚兒海子口者與乞顏惕世昏中立而心附成吉思忽有流言謂其叛去者卜客聞之以告合撒兒實則無其事合撒兒不告成吉思而往掠之大受成吉思詰責然翁吉刺以無端被掠爲憾竟叛附札只刺部長札木合而與於刊沐漣之盟時論頗咎者卜客諜報不審致衅而成吉思不辜也歲丙寅大封功臣者卜客仍封左翼千戶八十八功臣之第四十四明年皇子拙赤平秃縣斡亦刺成吉思分其降民於子弟合撒兒分得四千人使者卜客頷之未幾汗入妖巫闊闊出讒言疑合撒兒欲殺之以訶

額侖可敦之解而止。然終削其兵柄，奪去分民之太半。奪去二千六百八，僅留一千四百。

者卜客懼禍及，入巴兒忽真之地。久之，合撒兒事白，乃還復為

領軍。歲戊寅，奉使如宋。元史石珪傳之葛不罕，即者卜客之音差。辛巳，宋使苟夢玉來報聘。

行在阿梅河南。耶律鑄雙溪醉隱集云：昔我太祖皇帝出師問臯西域，辛巳歲夏，駐蹕鐵門關。宋主寧宗遣國信使苟夢玉通好，乞和云云。按之長春西遊記，辛巳

歲夏成吉思已渡阿梅河而南，不在鐵門關成仲所記殊誤。引見之。夢玉言南北連和夾攻金人之利，汗

以為然，敕宣差耶律阿海護送還其國。其議未及行，而成吉思汗

姐歲庚寅，幹歌歹汗大舉伐金。辛卯，克鳳翔，詔皇弟拖雷遣者卜

客為使如宋。先是金人南遷，阻黃河潼關之險，以自固。蒙兀頻歲

攻之不得志，有降人李昌國者，進幹腹之策於拖雷，謂若出寶雞

入漢中，不一月可達唐鄧，則金人黃河潼關之險不攻而自失。竝

繪師行所當歷之山川城塞關隘津梁，具圖上之。拖雷以聞，汗善

之。然散關以外，皆宋地也。及是鳳翔既下，乃使者卜客假道於宋。

且申前約。時宋桂如淵為四川置制使，其沔州統制張宣駐軍青

野原，誘致者卜客，使部將曹友聞殺之。曹友聞雙溪醉隱集引理，宗川歷作曹萬戶而不名。拖雷聞

之大怒。謂在軍諸王大將曰：彼自食言棄好，輒殺我使。今日之事，曲直有歸，可下令諸軍分攻城堡關隘。由是長驅入漢中。此爲宋人與蒙兀肇衅之端。李昌國本名邦瑞，以字行。京兆臨潼人。世農家。昌國幼嗜學，讀書通大義，嘗被北軍所掠，逃至太原，爲金將小史從守閭漫山砦。國王木合黎軍入河東，攻下諸城壁，金將遁。昌國帥衆來歸，復居太原。久之，守臣惜其材，具鞍馬遣詣行在所。中書以名聞，庚寅奉使如宋。至寶應，不得入。未幾命復往。仍諭山東淮南路行省李全護送，宋仍拒之。復奉詔以行，改道出蘄黃，宋遣賤者來迎。昌國怒，斥去之。宋改命行人，乃議如約而還。幹歌互汗勞之，賜以車騎旃裘及白金十挺。其後拖雷用其幹腹之策，果奏三峰之捷。而孟珙以軍糧助攻蔡州，卽踐昌國前約也。甲午，金平昌國。奏言：干戈之際，親戚離散，乞歸尋訪。汗嘉其功，許馳驛往河南，并諭速別額台。句察罕。句耶律禿花。舊傳作匣刺達，海譯文差異。諸將凡昌國親戚或有被俘隸諸部者，歸之。是歲，命從皇子闊出經略淮漢。舊傳

作經略河南按其時河南已平當南侵宋邊矣

賜佩金符為宣差軍儲使明年六月卒子榮

速哥客列亦氏

舊作怯列氏

世傳李唐外族

客列亦為突厥之類唐嘗嫁公主於突厥此云李唐外族豈速哥先人為唐公主所出乎

父懷都從成吉思同飲巴

渤

渚納水開國功臣千戶

功臣第四十九兀都台即懷都

速哥

為人外若質直內實沈勇有謀雅為幹歌互汗潛邸所知汗即位

謀伐金使速哥往覘國情語之曰即不還子孫無憂不富貴速哥

頓首曰臣死職巨然奉陛下威靈以往可無慮也汗說賜以御騎

及河金人閉之舟中七日始登南岸又三旬乃達汴比廷見金主

速哥大言曰天子為爾土地日蹙民力日疲故遣我致命爾能共

脩歲幣通好不絕則轉禍為福矣謁者令下拜速哥曰我大國使

為爾屈乎金主弗強命取金卮勺酒賜飲曰歸語汝主必欲加兵

敢悉索蔽賦以相周旋歲幣非所聞也速哥醮畢懷金卮以出佯

為不智以懈金人歸途金人果不復猜防遂默識所過關河津渡

水之淺深地之夷險既復命出懷中金卮以獻汗喜為之兆曰我

得金於汝手中矣復以賜之始下令徵兵南伐歲壬辰大軍臨河

北白坡鎮。方舟欲渡。金師嚴陳河南。汗令儀衛導速哥居中行。躬

帥偏師乘陳西水淺處策馬涉河。時正月五日。河水未泮。會拖雷軍亦自襄鄧

至。兩軍夾攻之。及金亡。詔賜金護駕士五人。曰。旌汝使不辱命也。

以前過崞州盜殺其馬。至是兼以崞民賜之。歲乙未。汗從容語速

哥。朕將官汝。西域中原唯所擇。速哥再拜曰。幸甚。臣意中原使於

是制詔若曰。西山之境。八達嶺以北。八達嶺蒙兀謂雁門關所在之山。汝則主之。汝於

城中構大樓居其上。使人皆仰望汝。汝俯而諭之。顧不偉乎。乃以

為山西也。客荅魯合臣。如云大監受命方出。有回回六人以訟事不實。將

抵臯。遇諸塗。連哥屬監者姑緩其刑。即入復見汗。奏言此六人者。

名著西土。徒以小臯誅之。非所以懷遠人也。願以賜臣。臣得意辱

之。意辱謂以一已之意辱之不用刑法也。使自悔過遷善。為它日用。殺之無益。汗意解。召六

人者。至謂之曰。生汝者。速哥也。其善事之。至大同治。擇而用之。後

有至大官者。速哥卒年六十有二。贈推忠翊運同德功臣。太師開

府儀同三司上柱國。追封宣寧王。諡忠襄。子六人。曰長罕。曰玉呂

忽都撒曰合里都皆從兀魯赤太子出征以戰功顯第四子曰忽
 蘭以母后戚故得襲職乙未之括戶也前賜崞人籍隸有司別賜
 三百戶兵後山西多盜有甄軍判者帥其黨往來阜平曲陽間殺
 人渾源界而奪之財州以失捕時於法當償忽蘭曰此劇盜非州
 所能制即發所部兵捕斬之性好佛嘗施千金脩龍宮寺建金輪
 大會飯贈萬人卒年四十有二贈太保金紫光祿大夫上柱國追
 封雲國公諡康忠子天德于思中統初襲職自中山北來適用兵
 阿里不哥舊傳云適有邊警不言其名諱之也命督造兵甲撫循所部邊民以勞賜馴豹
 名鷹使得縱獵禁地異數也卒年三十有九贈太傅儀同三司上
 柱國雲國公諡顯毅忽蘭之弟曰忽都兒不花曰不花無間有

唐慶者不詳其貫成吉思汗時來歸權元帥左監軍舊傳云事太祖為萬戶不知當時無

漢軍萬戶也歲丁亥賜佩金虎符假龍虎衛上將軍使金南京議款壬辰

正月大軍既克鈞州幹歌歹汗復使慶為國信使入汴責取質子
 歲幣以金曹王訛可來朝汗官山行在七月奉使再往諭金主黜

帝號稱臣。金主不聽。慶輒以語侵之。金之君臣不勝其憤。汴中時論洶洶。有飛虎軍士申福及蔡元者聞之。曰。君辱臣死。不如與之同盡。五日甲申。其徒數十人夜半突入使館。殺慶及其弟山祿與祿。并從行十有七人。金廷慮激內亂。不敢問。和議遂絕。金亡。購求慶屍不得。賜金五十斤贍其家。中統二年。忽必烈汗召見其子政。予之官。復其家繇役。世世無有所與。

論曰。者卜客假道於宋。設非前約。宋人婉言拒之可也。婉言拒之不聽。歸其使而拒之以兵可也。殺之非也。殺一人而償之數十萬人。其謬甚矣。李昌國斡腹之策。拖雷用之而成功。亦以斡歌互汗渡河。援應得宜。故耳。不然。諸葛亮何以不許魏延。以萬人出漢中也。速哥非專對才。其詭行覘國。懷挾金卮。君子耻之。斡歌互汗賞之。此其所以爲蒙兀歟。唐慶無禮。其死也。蓋自取。然金廷不正飛虎暴卒之辜。則國已無刑。宜其亾不旋踵矣。

者卜客客列亦速哥列傳第二十五蒙兀兒史記卷第四十三

脫欒塔察兒撒吉思卜華列傳第二十六

蒙兀兒史記卷第四十四

武進屠 寄篋

脫欒一作脫倫晃豁壇氏。祖曰察刺合額不格。父蒙力克。成吉思之

父也。速該所兄事也。也速該中塔塔兒毒。臨沒以成吉思子母託

之。故成吉思自幼父事蒙力克。多桑書謂蒙力克為訶額倫之後夫蒙兀俗兄弟既死娶其嫂婦本無足怪但華書無微及

長。即尊位。猶每語必稱之曰額赤格。額赤格猶華言父。蒙力克帥

七子事成吉思。脫欒其長子也。歲甲子。成吉思將伐乃蠻。大蒐軍

實。以脫欒及朵互句多豁勒忽句幹歌連句不只兒句速亦客禿

六人同為扯兒必。從滅塔陽罕。歲丙寅。論開國功臣凡八十八人。

蒙力克稱首。與脫欒並封左翼千戶。蒙力克第一千戶脫欒第十二千戶汗且追述其功

而敕諭之。若曰。於戲。吾少孤。賴蒙力克額赤格福蔭。生長到今。厥

德甚懋。向者王罕額赤格。王罕亦成吉思所父事者。故同稱額赤格。桑昆安荅以計誘我。微

蒙力克額赤格中道泥我之行。吾且蹈於水火。吾念是恩。俾吾子

孫亦母或敢忘。自今以往。凡朝會。汝則隅坐。若歲月日。汝有嘉謀

嘉猷。我其大賚汝。汝既終身事我。惟汝子孫亦世世弗替。欽哉。又

諭脫纒若曰。汝父子胡為各管千戶。緣汝能鷹揚舒一翼。亮汝

額赤格。收集兀魯思。亦作奧魯思。義謂部族。是用命汝為扯兒必。今汝其以所

收族眾千人。與禿魯罕商量而行。禿魯罕人名。往欽哉。歲癸酉。大軍三道

伐金。脫纒與汗弟合撒兒國舅那顏阿勒赤將左手軍。自燕南遵

海而東。取薊平灤及遼西諸州。渡遼而北。溯討浯兒河以還。討浯兒河遼金

史亦稱撻魯河。撻魯古河。它漏河。今俗稱洮兒河。洮南府以此得名。歲甲戌。錦州張鯨降。乙亥。脫纒奉命督蒙

兀契丹軍。并鯨所總北京十提控漢軍南征。兼采親征錄及木華黎傳。鯨中道叛

誅。脫纒仍帥諸軍前進。降真定。破大名。至東平。阻水不克。大掠而

還。歲己卯。扈駕西征。花刺子模。凡七年。累立奇功。乙酉。凱旋。其冬。

又從征西夏。先是汗將征花刺子模。援約徵兵西夏。夏主李遵頊

下廷臣議。其臣阿沙敢不。阿沙其名。敢不猶贊。普唐兀種人之美號。大言謂使者曰。汝主自

揣力。繇何以為汗。議不助兵。使者歸報。汗大怒。遂伐夏。圍其都中

興府李遵頊先使其子德旺居守。自走西涼。汗以西征事重。不願頓兵夏地。遂解圍去。至是復征之。軍次阿兒不合。地多野馬。因縱

獵。汗騎紅叱撥。

蒙文祕史作勺沙赤字羅大典本譯作紅沙馬

為野馬驚突。墮而傷。是夕不豫。翌

晨也。遂可敦以告。扈駕諸王百官議進退之計。脫纒言唐兀城郭

之國。其民土著不移徙。今且退軍。須聖躬康復。再興師問辜。非遲

眾然其議。入奏。汗曰。唐兀見我無故退軍。將以為怯。不如駐此。養

痾。遣使問辜於彼。視彼復命如何。再取進止。遂遣使責西夏主曰。

汝昔自言吾屬唐兀之民。願為大國右手。及我征撒兒塔兀。

勒蒙兀對西

城城滅之國之通稱

徵兵於汝。汝不遵約助兵。反敢謾詞侮我。今我已取花刺

子模。卻來與汝一質前言。時李德旺已受遵頊內禪。不承有侵侮

蒙兀之言。阿沙敢不自承之。因謂使者曰。汝蒙兀夙以善戰名。我

今置營賀蘭山。廣張天幕。饒有橐佗。汝與我戰。勝則取之。若願金

銀幣帛。可向中興西涼自取。毋喋喋為也。使還以聞。成吉思大怒。

指天而誓曰。彼虜狂吠。若是我軍。安可徑退。雖死。必往證其言。明

年春師入西夏阿沙敢不據賀蘭山寨我師仰攻拔之禽阿沙敢

不盡獲其營帳橐佗殺唐兀兵精壯者俘其餘聽軍士自分之是

夏行在避暑察速禿山雪山之謂本紀稱渾垂山次第命將取甘肅西涼等府州進

逼中興是時李德旺已歿從子覲嗣位度國勢已去遣使乞降謂

不敢望收之為子蒙兀視降王如子為惠故畏兀亦都護之降以是為請今李覲之意亦然曰不敢遜詞時行在清水汗

不豫偽允之覲又使人來以備貢物遷民戶為辭請踰月束身來

朝汗已疾甚又允之命脫纒馳驛往安撫其軍民及期夏主朝靈

州行在所奉金銀器皿童男女及駟馬等為摯數各九九而先之

以金佛西夏以是為信佛至敬禮時汗已昇遐羣臣秘不發喪託言汗病未愈引覲

幄殿闔處行禮蒙文祕史額門闌不帖兀那旁解門闌行大典本譯稱門外殊誤越三日脫纒奉遺詔手刃

夏主并赤其族且命蒙兀人每食必祝言唐兀惕滅矣庸志成吉

思遺憾脫纒以功承賜夏主行宮器皿蓋拖雷以監國之命賜之視諸將為多未

幾卒子伯八元史忠義傳伯八兒合丹下三字乃晃合丹形近之譌柯史作伯八兒誤認兒字上屬伯八為名事忽必烈汗以勳

舊子孫超擢萬戶命領所部軍戍欠欠州至元十三年十二月耶律鑄雙

溪醉隱集後凱歌自注云至元丙子冬西北藩王弄邊所
謂藩王指昔里吉等舊傳及田忠良傳並誤作十二年

河平王昔里吉諸王脫

帖木兒等叛於阿力麻里舊傳云奔海都亦誤伯八以聞且請討之未得命

為叛黨所襲敗死之脫黑帖木兒虜其二子曰八刺曰不蘭奚分

置左右歲餘待之頗厚八刺陰結脫黑帖木兒近侍也里伯禿謀

復父仇謀為也里伯禿家人所泄八刺知事不成將家族南奔脫

黑帖木兒遣騎追之及諸一河八刺馬驚不能渡回轡拒鬪射追

者中數人已而力竭兄弟俱被執脫黑帖木兒責之曰我待汝不

薄胡反為此八刺曰汝叛君之賊害我父掠我親屬我誓殺汝以

報君父之仇今不幸至此任汝所為逼令跪不肯以鐵搗碎其膝

終不屈遂與不蘭奚同見殺伯八幼子阿都兀赤官至河北河南

道肅政廉訪使脫欒第四弟闊闊出號帖卜騰格理自有傳凶夏

滅後六年而金亦亡其時主軍破蔡州者曰塔察兒

塔察兒一名倂蓋許兀慎氏李羅忽勒次子也舊傳稱博爾忽為伯祖父因以塔察兒為博爾忽從

以死事功臣子佩囊韃宿衛成吉思歲戊子拖雷監國和林聞

燕京多盜。白晝劫財。行省石抹咸得不弗能禁。遣塔察兒偕耶律

楚材馳驛往窮治之。

楚材傳云其人賂中使求緩之所謂中使即指塔察兒

誅首惡十有六人。盜風

始息。歲庚寅從幹歌互汗伐金。拜行省兵馬都元帥。分徇衛及諸

王駙馬軍俾統之。下河東諸州郡。渡河攻潼關。不克。

舊傳云破潼關下陝洛此後來事破

太宗紀二年庚寅十二月攻潼關不克是實錄也。金史哀宗紀天興元年潼關守將李平舉關降敵又足為庚寅未克潼關之反證

明年冬從駕克河中。

壬辰正月遂自白坡渡河。是時拖雷已破饒風關。出師唐鄧。

饒風關舊

傳作曉峰音同塔察兒舊傳誤作武關按武關在商州東北百二十里東通內鄉西達藍關非由金洋出唐鄧之道

汗發萬騎先鋒往援。至

鈞州。與拖雷軍三萬騎會。衷金師於三峰山。大破之。詔塔察兒與

速別額台等圍汴梁。金主乞和。以兄子曹王訖可為質。車駕乃與

拖雷北還。避暑官山。畱塔察兒等鎮守河南。無何。金人殺我使臣

唐慶。和議中敗。汴圍復合。塔察兒與金人戰於南薰門外。屢敗之。

是歲十二月。金主棄汴。奔。癸巳正月。入守歸德。六月己亥。又棄

歸德。奔蔡州。時塔察兒已下潼關。取陝州。降金西安節度使趙偉。

進攻洛陽。金鷹揚校尉開西門降。畱守便宜總帥強伸就執。見塔

察兒語不遜，斬之。按之金史本紀及強伸傳中京之破在天興元年六月壬午，柯侍講編列於壬辰戰三峰前，時事不符。金瑋瑁寨主

任元帥等帥眾迎降。於是塔察兒進軍向蔡州。九月庚戌，前鋒突

騎至城下。其日重九。金主帥羣臣拜天，聞警倉卒議城守。明日塔

察兒以大軍至，築長壘困之。屢戰敗金兵，斬其將溫敦昌孫十一

月。宋江陵副都統孟珙帥部將江海以襄陽兵二萬，糧三十萬石，

來助攻。塔察兒使禿花互末哥耶律禿花之子，末哥襲領質子軍，故曰禿花互末哥。過出。疑是訶額倫養子古出之異譯。

阿悉三人往返。阿悉疑是札八兒火者，本名阿刺凌，秘史譯作阿三，與阿悉音近，其人年百有十八歲，此時尚在以通漢語累奉使。既至，珙與

塔察兒相得甚歡，約為兄弟。南北兩軍分地圍攻，彼此約束不相

犯。宋軍屯城南，我軍屯城西北。十二月丁丑，我軍洩練江，宋軍洩

柴潭入汝。潭涸，宋軍直逼土門。攻二日破之。又十日，我軍墮其西

城。金都尉王愛實戰死，礮軍總帥王銳殺其元帥夾谷當哥。帥三

十人來降。甲戌，金主徽服帥師出東門，謀突圍遁。見我軍圍守嚴

及柵，不果戰而還。歲甲午正月十日夜，金主傳位於宗室子承麟。

明日已酉，承麟即位。方朝賀，宋軍已自城南先登，守者棄門，門啟

大軍入。金兵猶卷戰。金主自縊於幽蘭軒。承麟退入子城。聞金主
歿。帥羣臣入哭。而子城亦潰。近侍舉火焚軒。宋人取其盡餘之骨
以歸。承麟死於亂兵。金亡。塔察兒便宜與孟珙約。以陳蔡東南地
分屬於宋。仍自領軍。畱鎮河南。奏請竝大河兩岸。東首曹濮。西抵
秦隴。列屯置戍。以備宋人。詔從之。未幾。宋人果叛盟。詔塔察兒帥
所部南征。歲丙申。宋息州守將崔太尉以城降。光州亦底定。以功
賜息州及瑋瑁寨民千戶。爲之種田養老。歲戊戌。圍宋壽州。卒於
軍。子別里忽鯁。一作別里虎台本官豁兒赤。歲壬子。蒙格汗命襲其父行省
都元帥。總領蒙兀四萬戶及諸翼漢軍。略地兩淮。戊午。從諸王塔
察兒圍攻襄樊。陳歿。別里忽鯁二子。長密里察而。次宋都帶。密
里察而。事忽必烈汗於潛邸。中統元年。授大河以南統軍。至元元
年。改授保甲丁壯射生軍。塔魯合臣。四年。襲蒙兀軍萬戶。從都元
帥阿朮略地襄陽。卒於軍。本紀泰定初。贈明威將軍。洪澤屯田萬戶。
府塔魯合臣。追封平陽郡侯。二子。長阿魯灰。次伯里閣不花。密里

察而歿時二子尚幼。宋都帶襲職。宋都帶以至元七年佩虎符。

襲蒙兀軍萬戶職。從克樊城。下襄陽。十一年大舉伐宋。從取鄂。漢

十二年正月順流東下。丙戌江州降。按本紀武漢之下。在至元十一年十二月已

僅二十八日。宋都帶一軍。豈有餘暇。兼平岳州。拔歸峽。禾江州之降。在十二年正月丙戌。中間相距克江陵。鎮潭州。哉柯史據碑文。未加拔澤。今特刪正。詔拜宋都帶昭毅大將軍。

都元帥。開府。佩金虎符。兼領江東江西大都督。與左副都元帥李

恆。漢軍萬戶武秀。張榮。實兵部尚書呂師夔。同行都元帥府事。進

取隆興。軍次塔水。獲宋驍將熊飛。知隆興府事劉槃。舉城降。不數

日。諭下十一城。進逼撫州。宋江西制置使黃萬石遁。十三年二月。

克臨江軍。三月。吉顛袁三州及南安軍皆內附。江西平。得府一州。

六軍四縣五十六。宋都帶上言。江西雖下。閩廣尚阻兵。乞增軍進

討。詔撥襄陽漢軍四千。益以安慶。斬黃成卒。俾統之。遂與李恆踰

嶺入廣東。宋廣東經略使徐道諒奉蠟丸書。納所部十有四郡內

附。未及還師。感瘴疾卒。兄子阿魯灰襲領其軍。至元十八年。授江

西道宣慰使。都元帥卒。明年。伯里閣不花襲。伯里閣不花既襲

都元帥討平峒獠董輝等之叛拜昭勇大將軍蒙兀軍萬戶賜三
珠虎符至元三十年以所部蒙兀軍戍湖廣從平章劉國傑討土
寇所至有功元貞元年帥蒙兀軍二千人扈蹕上都進鎮國上將
軍賜弓矢鞍轡大德三年從海山汗潛邸北戍詔以所部屯田稱
海六年遙授河南淮北蒙兀軍都萬戶府副萬戶仍屯田九年以
西北宗王次第內款漠北寧謐詔有司資送伯里閣不花軍還河
南延祐元年卒泰定元年贈輔國上將軍樞密副使護軍追封雲
中郡公謚襄懋子昔里伯吉襲河南淮北蒙兀軍都萬戶府副萬
戶始階明威將軍累進昭毅大將軍卒子八撒兒襲塔察兒長兄
脫歡子孫世襲字羅忽勒開國功臣千戶居漠北塔察兒子孫別
居官山先是金主走歸德蒙兀將撒吉思卜華實追躡之

撒吉思卜華客列亦氏舊傳克烈氏父曰梁直膺魯華本事王罕王罕滅

帥其屬二百人降從成吉思征乃蠻西夏有功命將千人舊傳作命將萬人按

其時蒙兀兵寡梁直膺魯華僅以二百人降豈能遽將萬人舊傳不足信歲辛未伐金隸木合黎左翼從速別額台

前鋒下桓州獲其羣牧監馬

舊傳稱得其監馬幾百萬匹按金史兵志大定二十八年蕃息之久馬至四十七萬此合七監之馬最蕃

息時言之舊傳百萬之說斷不足信桓州之拔見速不台傳事在辛未舊傳乃敘在辛未以前且以全功歸梁直膺魯華蓋據諛墓之文未加考訂也

分屬諸軍軍

勢大振從略遼東西諸州唯東京未被兵主將欲往攻之會獲金

使梁直膺魯華曰東京金陪都

舊傳作舊都按金並未都東京

備嚴而守固攻之未

易下徒可以計取巨請易服與其使偕往說之彼將不疑俟其門

開以大軍突入之則克矣卒如其計是歲者別襲取東京

參證石抹也先傳足

證秘史東昌之誤

後梁直膺魯華從脫纜徇地河北攻大名城垂陷中流矢

死撒吉思卜華嗣統其軍幹歌互汗元年己丑錫金符安輯河北

山東諸州時史天澤為真定河閒濟南東平大名五路漢軍萬戶

開府真定明年汗命撒吉思卜華換佩虎符以先鋒總帥行省監

其軍

監軍即若魯合臣

金宣宗之遷汴也築城於胙城之宜邨徙衛州治之

謂之新衛立河平軍恃為北門其城三面瀕河唯以北面當敵撒

吉思卜華數攻之不拔歲壬辰

舊誤壬申

正月幹歌互汗帥中軍自白坡

濟河撒吉思卜華集西都水之舟以左軍濟自河陰徇鄭州鄭守

馬伯堅降

伯堅降於王善但撒吉思卜華為監軍故云然

及金義宗棄汴出奔汗命撒吉思卜華

追躡之

金史白撒傳云大元將回兀乃率四千騎追擊之知當時追者非一軍回兀乃當是岳麟帖穆爾蒙兀人稱為畏兀兒台故金人亦稱為回兀乃

會其節

度使完顏斜捻阿不棄新衛走汴撒吉思卜華遂入據之明年正

月義宗自黃陵岡濟河

考金史本紀義宗以天興元年十二月庚子去汴二年正月丙午濟河中間相距才七日舊傳以為十二月濟河誤也但

不知此七日中撒吉思卜華何以能先

義宗渡河遂斜捻阿不而據新衛日謀復新衛撒吉思卜華與其將白撒

戰於白公廟敗之

舊傳五日夜俘斬萬計考之金史白撒傳則一戰即敗棄軍而遁五日夜之說不足信

餘眾盡潰義宗

宵濟南竄歸德撒吉思卜華跡其後薄北門而軍左右皆阻水史

天澤曰此絕地也於兵法不可駐軍弗聽先是河北之戰金將蒲

察官奴之母為蒙兀軍所得挾以來攻為誘降計官奴即因母與

忒木台行省約和詭言欲劫金主降忒木台信之還其母官奴藉

和議為名日往來軍中或乘舟中流會飲密交我使探知撒吉思

卜華大營在王家寺

金史官奴傳所謂大將即撒吉思卜華

遂以五月五日

舊傳誤稱四月

帥其忠

孝軍四百五十人出南門登舟由東而北我軍習見官奴往來猶

以為議和使也不加疑沮是夜官奴殺我外隄邏卒四更至王家

寺斫營。我軍從睡夢中起。倉卒接戰。官奴軍小卻。乘暗以小船分載其軍七十人漏柵外。自後來攻撒吉思卜華腹背受敵。乃不支。與董俊等十千戶死之一。軍皆覆。官奴傳云。溺水死者三千五百。餘人盡焚其柵而還。蓋實錄也。明年金亾。

歲丙申。幹歌互汗命斷事官忽秃忽以所括河南新戶分封功臣。不及撒吉思卜華。其妻楊氏自陳曰。吾舅吾夫皆死國事。何獨見遺事。間賜新衛民二百九十一戶。此據食貨志壬子年元查數始封時當不止此。撒吉思卜華之

戰歿。嗣國王塔思承制以其弟明安答兒襲領行營。尋有旨特授蒙兀漢軍萬戶。明安答兒善騎射。從征淮南。因糧於敵。未嘗匱乏。軍士免負擔之勞。咸樂爲用。所至縱軍虜掠。是以樂爲用也。此爲美談。適見其軍無紀律而已。歲癸丑。蒙格

汗命從失烈門太子南伐宋。據此知失烈門被投於漢水。死於均州。舊傳作鈞州形聲俱近之誤。子膺虎。中統初。從駕親征阿里不哥。舊傳云北征叛王而不名諱之也。先登陷陳。忽必烈汗壯之。賜號把阿秃兒。銀四百五十兩。從討李璫。亦有功。幼子普蘭

奚。海山汗朝光祿大夫。徽政院使。以普蘭奚貴。追贈梁直。曠魯華太傅。謚武敏。撒吉思卜華太師。謚忠武。明安答兒太傅。謚武毅。爵

皆衛國公

論曰。夏金之亾。前後相距才六載。古稱唇亾齒寒。不其然與。向使金宣宗棄燕遷汴。忍辱自危。內求保境息民之方。外脩睦鄰事大之禮。支拄旦夕。靜候時機。河北雖淪。河南山東關中形勢自若。保障汴洛。控扼關河。猶可以爲善國。顧因疆宇日蹙。思所取償。狂先世之淫威。挑宋夏之邊畔。兵連禍結。備多力分。徒令虎狼之蒙兀。坐收卞莊之餘利。夏則蹈矣。金亦不旋踵焉。義宗懲戒覆轍。乞和二鄰。勢已土崩。後時無及。以身殉國。非其辜也。獨怪宋人持春秋之義。復九世之讎。已則不競。假手於人。戮及盡骨。愚謬已甚。脫纜塔察兒身逢興運。預平夏金。則時爲之也。不然。區區歸德一隅。撒吉思卜華何以覆其軍也。

脫纜塔察兒撒吉思卜華列傳第二十六蒙兀兒史記卷第四十四

塔塔統阿哈刺亦哈赤北魯岳璘帖木兒寫云赤篤忽璘孟速思昔班列傳第二十七

蒙兀兒史記卷第四十五

武進屠 寄篋

塔塔統阿畏兀兒人。性聰慧。善言論。深通本國文字。乃蠻塔陽罕

尊之為傅

塔陽罕舊傳作太敷可汗

掌其金印。成吉思平乃蠻。塔塔統阿懷印逃

去。已而就禽。汗詰之曰。塔陽人民疆土。悉入我矣。汝懷此安歸。對

曰。臣之職也。將以死守。求故主歸之。巨豈敢有它。汗曰。忠臣也。問

是物何用。曰。出納錢穀。委任人才。一切事用。為信驗也。汗善之。命

侍左右。是後。凡有制旨。始用印章。仍命掌之。又問。汝深知本國文

字乎。塔塔統阿悉以所蒞對。稱旨。遂命教皇子諸王。以畏兀字譯

蒙兀語。幹歌互汗即位。命司內府玉璽金帛。且以其妻吾和利氏

為皇子哈刺察兒乳母。時加賜予。塔塔統阿召諸子諭之曰。上以

汝母鞠育皇子。故加賜予。汝等豈宜有之。當先供皇子用。有餘則

可分受。幹歌互汗聞之。以為廉。由是益加禮遇。以疾卒。至大二年。

贈中奉大夫。追封雁門郡公。子四人。長玉笏。迷失。次力渾。迷失。次速

羅海。次篤。羅。玉笏。迷失。少有勇略。渾都海叛於六盤。玉笏。迷失。為

皇孫。脫脫守營壘。脫脫哈刺察兒之子帥眾與戰。敗之。追至只必勒。適阿藍苔

兒以兵來。與渾都海合勢。玉笏。迷失。眾寡不敵。死之。力渾。迷失。有

膂力。嘗獵於野。與眾相失。遇盜三人。欲褫其衣。力渾。迷失。手搏之。

盡仆。則執以歸。汗召見。選力士與之角。無足對者。汗壯之。疑是幹歌互汗賜

金令備宿衛。速羅海襲父職。仍司內府玉璽金帛。耶律希亮傳有阿里不哥所用鎮守忽只兒之

人曰唆羅海疑即此速羅海篤。羅。舊事。哈刺察兒。忽必烈汗即位。從其母入見。欲官

之以無功。辭。命備宿衛。奉使遼東。卒。追封雁門郡公。子阿必實哈。

陝西行省平章政事

哈刺亦哈赤。北魯亦畏兀兒人。性聰明。習事。亦都兀。惕月仙帖木

兒。聞其名。曰唆里迷國。召為斷事官。徐松西域水道記曰阿克蘇有拜城寶喇木城即唐時俱毗羅城寄按寶喇木即唆

里迷悉畏兀兒附庸國故亦都兀惕能召其人月仙帖木兒卒。子巴而兀阿而忒嗣位。舊傳作八兒出阿兒忒亦都護

據巴而兀本傳年少。西遼主直魯古遣契丹人少監監其國。直魯古名見遼史天祥紀舊傳作鞠兒可汗且

召哈刺亦哈赤北魯。至則以爲諸子師。會巴而朮阿而忒殺西遼使而均成吉思。更遣阿憐帖木兒都督等四人使西遼。阿憐帖木兒都督者。哈刺亦哈赤北魯婿也。語之故。於是與其子月朵失野訥馳歸成吉思汗。一見大說。卽令諸皇子受學焉。仍令月朵失野訥以質子宿衛。歲己卯。哈刺亦哈赤北魯從征西域。經別失八里東。汗見一城空無人。問何名。以獨山對。因言往歲大饑。民皆流移它所。然此地當東西要衝。東西舊傳作北來宜屯田以備饑。臣昔在唆里迷

國時。有戶六十。願移居此。汗曰善。卽遣月朵失野訥佩金符往取之。父子皆畱居焉。後六年。成吉思西征還。見田野闢。民物繁。大說。問哈刺亦哈赤北魯。則已死矣。乃賜月朵失野訥都督印。兼獨山城。荅魯合臣卒。子乞赤宋忽兒。幹歌互汗時襲職。賜號荅刺罕。子四人。曰塔塔兒。曰忽棧。曰火兒思蠻。曰月兒思蠻。忽必烈汗命火兒思蠻從雪雪的斤鎮雲南。雪雪的斤。巴而朮阿而忒的斤。四世孫。月兒思蠻從蒙格汗。

襲父職兼領僧人。後因察阿互後王篤哇據別失八里。舊傳作後因軍帥札忽兒台據

別失八里按札忽兒台寶察阿互之
誤且係其後王篤哇之事今改正 盡室徙平涼與其子阿的迷失帖木兒

入覲。詔入宿衛爲必闍赤。尋從安西王忙哥刺出鎮六盤。忙哥刺
薨。其子阿難荅嗣。鐵穆曰汗卽位。遣使入朝。因奏言阿的迷失帖
木兒父子。本辟禪可汗舊臣。來事先王。服勤二十餘年矣。若終老
王府。非所以盡其才也。願歸陛下用之。鐵穆曰汗可其奏。授阿的
迷失帖木兒汝州荅魯合臣。積官祕書太監。卒。子阿鄰帖木兒
阿鄰帖木兒善國書。多間識。海山汗命教皇子和世疎。由翰林侍
制累遷榮祿大夫。翰林學士承旨。碩德八刺汗時。以舊學日侍左
右。陳說祖宗以來及古先哲王嘉言懿行。繙譯諸經。紀錄故實。總
治諸王駙馬番國朝會之事。天曆初。北迎和世疎汗入正大統。汗
一見歡甚。顧謂左右曰。此朕師也。明年進光祿大夫知經筵事。子
四曰沙刺班。曰禿忽魯。曰六十。曰咱納祿。沙刺班字敬臣。號出
齋。妥懽帖睦爾汗之師也。爲學士時。常侍禁近。禮遇優渥。一日體
倦。偃卧奎章閣下。因而熟寐。汗見之。以藉坐方褥。蒙兀語所謂朵

兒別真者。親扶其首而枕之。又嘗患額瘍。汗取金鉢中佛手膏。手
爲傅貼。丞相蔑兒乞伯顏柄國。權勢方赫。有宗王欲媚之。譯奏辭
禪二字。自爲世祖國言廟號。人臣遂毋敢用。今太師伯顏功高德
重。請賜號辭禪。辭禪元史語解譯爲聽明。元人文集或譯爲大賢。時御史大夫帖木兒不花爲伯

顏心腹。慫恿執政允之。沙刺班言於汗曰。此雖虛名。關繫綦重。不
可輕假。乃命學士歐陽玄監承揭。俟斯會議。以元德上輔四字代
之。沙刺班以舊學恩。累拜翰林學士承旨。奎章閣大學士。中書平
章政事。大司徒。宣政院使。以希旨請立奇氏爲皇后。世論少之。卒。
追封北庭王。謚文定。子世傑班。字彥時。尙輦奉御。妥懽帖睦爾汗
親信之。汗黜伯顏。世傑班與父沙刺班實同與密謀。汗嘗製洪禧
小璽。貯以金函青囊。命世傑班掌之。世傑班常懸項下。歸或藏之
褻中。雖其母不知也。有問以內庭事者。則亂以它語。其慎密如此。
歷官如其父。

岳璘帖穆爾畏兀兒人。亦呼爲委吾兒台。見秘史。唐時回鶻國相。曠欲

谷之裔也。噉欲谷之先本突厥部人。突厥亾。遂臣回鶻。噉欲谷有

大功於回鶻。回鶻既遷火州。警轉為畏兀。高昌僊氏家傳作偉兀其子孫猶世襲

國相。荅刺罕焉。數傳至克直普爾。本國賜號阿大都督。西遼主亦

授以太師大丞相。總管內外藏事。國人稱之曰藏赤立。其子曰岳

弼。岳弼七子。曰達林。曰岳思弼。曰衢仙。曰博哥。曰博理。曰合刺脫

因。曰多和思。岳璘帖穆爾。亞思弼之次子也。以上據高昌僊家傳補其兄叱理伽

普華。下二字家傳作帖穆爾年十六。襲國相荅刺罕。時西遼方強。威制畏兀兒。命

太師僧少監監其國。驕恣擅權。亦都護巴而朮阿而忒患之。謀於

叱理伽普華。對曰。能殺少監。挈吾眾歸大蒙兀國。彼且震駭矣。從

之。遂襲殺少監。先後遣別吉思哈刺阿思蘭都大等送款蒙兀。成

吉思許之。叱思伽普華以功加號叱理傑忽底。進授明別吉。妻號

赫思迭林。左右有疾其功者。譖於亦都兀。惕曰。少監珥珠。先王寶

也。叱理伽普華匿之。益亟索。勿失。亦都兀。惕怒。索寶甚亟。叱理伽

普華無以四明。遂來奔。成吉思賜以金虎符。獅紐銀印。金螭椅一。

金只孫衣一襲校尉四人給事仍食三十三郡

畏元有城無郡所謂三十三郡未知何指疑誤

尋

又賜銀五萬兩而留岳璘帖穆爾為質此理伽普華以疾卒岳璘

帖穆爾從成吉思征討有功皇弟斡赤斤求師傅汗命岳璘帖穆

爾與從弟撒吉思偕往訓導諸王子以孝弟敦睦仁慈不殺為先

汗聞而嘉之車駕親征西域岳璘帖穆爾輔斡赤斤居守斡歌互

汗嗣位之初間中原多盜選岳璘帖穆爾充大斷事官從斡赤斤

出鎮保州等處

保州舊傳作順天等路據後之詞

從平河南徙鄼民萬餘戶入樂安俄

授河南等處軍民都荅魯合臣佩金虎符并賜宮女四人斡歌互

汗欲分蒙兀人徙牧河西徹勒

地名見秘史即亦集乃因此知秘史之委兀兒台即蒙兀人呼岳璘帖穆爾之通稱

其地

沙磧乏水泉詔岳璘帖穆爾偕散班千戶察乃先往相視營址鑿

井置驛族帳使客稱便岳璘帖穆爾順道還鄉以所賞賚散諸親

舊尋復監河南等處軍民年六十有七卒贈宣力保德功臣山東

宣慰使謚莊簡子十人第四子都爾彌勢第八子合刺普華最著

餘詳氏族表 都爾彌勢初從叔父撒吉思討李壇以功版授益

都行省郎中。除博興沂州荅魯合臣。伯顏伐宋。撒吉思當以軍從。年老。都爾彌勢忼慨請行。乃舉以自代。都爾彌勢與從子撒里蠻不詳俱隸伯顏麾下。丁家洲焦山之戰。皆與焉。又從破常州。擢斷事官。宋平。授安豐路荅魯合臣。權處州荅魯合臣。時新埶之民多保險阻。兵都爾彌勢單騎招之。不血刃而下。人以四哥佛子稱之。阿合馬用事。乃告歸。會征日本。起爲征東都元帥。又與行省丞相阿塔海異議。辭不行。已而師果無功。盧世榮欲薦爲參知政事。亦力辭。改同知淞東道宣慰司事。再改行省郎中。歷太平路荅魯合臣。廣西道提刑按察使。卒。官哈刺普華自幼穎異。居益都。卽以失學爲懼。岳璘帖穆爾奇其志。使習畏兀文經史。記誦過人。李壇之亂。與母奧屯氏相失。叔父撒吉思以行省討賊。哈刺普華從軍。所至求之。竟得母以歸。撒吉思言於忽必烈。汗召直宿衛。銜命至益都。置廣興商山二冶於四腳山。卽授商山鐵冶都提舉。佩金符。讓職於弟。伐宋之役。授行都漕運使。帥諸翼軍萬五千人。轉餉軍前。

宋平上疏言親肺腑。禮大臣以存國家之體。興學校獎名節以勵天下之才。正名分。嚴考察。以定百官之法。通錢幣。卻貢獻。以厚生民之本。又言江南新墾。宜登用舊族。力穡通商。弛征薄斂。以巡撫之。否則恐尙煩聖慮。汗納其言。屬漕運米二十萬石。舟覆。損什之一。又每斛視都斛虧三升。時阿合馬專政。責償舟人。合刺普華抗言。如朝廷必不任虧損。臣當獨承其咎。阿合馬怒。改爲寧海路。荅魯合臣。遷湖南道宣慰使。未行。改廣東都轉運使。兼領諸番市舶。東莞香山惠州鹽販構亂。哈刺普華與招討使荅失蠻討平之。條革鹽法之不便者。按察使脫歡大爲姦利。哈刺普華劾罷之。遂與都元帥課兒伯海牙宣慰使都元帥白佐等分討劇盜歐南喜。未幾。右丞唆都征交趾。使哈刺普華護餉。道出東莞博羅二縣界。遇賊歐鍾等。歐狗鍾衆寡不敵。被執。賊欲奉爲主帥。不屈。遇害於中心岡。是夕。其妻希吉特。勒氏夢其來告。曰。吾死矣。知事張德劉閏亦同夢之。贈守忠全節功臣。戶部尙書。追封高昌郡侯。諡忠愍。子二。

長契文爵爵一次越倫質契文爵十歲。剗股肉愈母疾。延祐初爲廣德路總管。改潭州路。又遷贛州路。擢同知宣慰司事。副都元帥。猺民叛。以計誘其酋龍半天等誅之。餘悉降。遷吉安路荅魯合臣。致仕卒。追封雲中郡侯。諡忠襄。契文爵以先世居契輦傑河。故以契爲氏。示不忘故土。契輦傑者。僻涼格河也。有五子。曰契玉烈。曰契直堅。曰契哲篤。曰契朝吾。曰契列篋。皆進士。及第時。人稱其里爲五桂坊。契玉烈。翰林待制兼國史院編脩官。契直堅。宿松縣荅魯合臣。契哲篤。始官廣東廉訪僉事。至正閒。爲吏部尙書。建議更鈔法。丞相脫脫從之。歷江淞行省。參知政事。江西行省右丞。契朝吾。翰林待制。同知濟州事。累官泉州荅魯合臣。有名蹟。契列篋。字世德。以父官江西。遂家焉。由翰林待制出爲潮州荅魯合臣。有惠政。改河南路。經歷。至正中。紅巾攻府城。契列篋守北門。城且陷。投井死。妻子從殉者十一人。越倫質子善箸。善箸子正完。阿兒思蘭。與契哲篤子百遠遜。亦相繼成進士。百遠遜官至翰林學士。紅巾之

亂避地高麗改名遜高麗王顓在元朝時與遜有舊比至其國見待甚厚遜遂留寓不歸顓封遜為高昌伯至正二年其子長壽亦有才

嘗進防倭策於顓明初通使高麗知遜長壽父子有聲於其國使其宗人僕斯來宣光元年明洪武二年其後王禍遣長壽以知密直事奉使如

明洪武二十年長壽服明所賜紗帽團領衣以歸高麗故高麗國內有僕

氏之子誤撒吉思阿大都督克直普爾少子多和思之子柯史沿舊史稱為阿大都督多和思

差二代而岳璘帖穆爾之從弟也為幹赤斤國王必闐赤領王傅幹

赤斤薨長子只不干蚤世適孫塔察兒在朝舊傳目為幼殊誤按黑韃事略稱塔察兒為太宗四相之一則

幹赤斤薨時其年非幼可知庶兒脫迭欲廢適自立時乃蠻真可敦稱制撒吉思與

火魯和孫馳白其謀可敦乃授塔察兒以皇太弟寶嗣國王撒吉

思以功與火魯和孫分治國王本部事黑山以南撒吉思治之其

北火魯和孫治之黑山今黑龍江南松花江北之布倫山俗稱東興安嶺者是山南為今之呼蘭綏化海倫巴彥湯旺諸縣其北愛輝等處也洪侍郎以遼金

慶州之黑山當之殊誤接慶州故城在今巴林旗地西北二十里土名察罕和屯瀕於哈刺沐

漣黑山在其東北三十里據特辭禪舊傳此黑山為翁吉刺與亦乞列思之農土非幹赤斤分地也

蒙格汗征蜀撒吉思從及攻釣魚山不克建議宜乘勢定江南不

當頓兵堅城下。汗不能用。及汗姐阿里不哥爭立。右手宗王多埒之撒吉思馳見塔察兒。力言宜推戴忽必烈。汗塔察兒從之。悉帥

左手宗王會上。都定策。忽必烈汗即位。聞撒吉思前言。授東京宣

撫使。東京舊傳作北京。玩下文。遼東以寧及高麗。械洪察忽送京師。道遼東事。知是東京也。北京在遼西。且非高麗。至京師。孔道舊傳定誤。仍賜宮人翁

吉刺氏及金帛章服。至鎮。鈕奸抑疆。遼東以寧。會高麗有異。志汗

遣使往究。則委臯其臣洪察忽。察忽茶丘之異譯。茶丘舊傳失載此事。械送京師。道出遼

東。撒吉思訪知察忽。以直諫。迓主。即騰奏為理。釋之。李璫叛。撒吉

思從宗王不者克討誅之。王以益都民從逆。當屠。撒吉思爭曰。王

者之師。誅止首惡。脅從罔治。王從之。眾情大說。授山東行省都督。

遷經略統軍二使。兼益都路。荅魯合臣辭不拜。上言山東重鎮。宜

選親貴臨之。汗不許。賜京城宅一區。益都田千頃。及羶馬羣園林

水磴。并加賜海青銀鼠裘。益都兵後。民乏牛具。為之上。聞。驗民丁

力官給之。時董文炳為山東經略使。收集益都舊軍。充武衛軍。成

南邊。詔撒吉思與文炳議兵民籍。每十戶取二為兵。其海州東海

漣水移入益都者亦隸本衛。旣而軍民分治。文炳治軍。撒吉思治民。有紇軍抄不花者。田遊無度。害稼病民。元帥野速答兒據民田爲牧地。撒吉思隨事表問。有旨杖抄不花一百七。令野速答兒還民田。壇故將毛璋謀執撒吉思。帥所部歸宋。事覺。撒吉思襲璋殺之。嘗慕古人舉親舉讎之義。壇之舊部得與子弟參用。公論多之。山東歲屢歉。請於朝發粟振恤。又奏蠲田租。士民刻石頌德。卒年六十有六。追贈安邊經遠宣惠功臣。河南行省右丞。上護軍。追封雲中郡公。謚襄惠。孫荅里麻。弱冠入宿衛。大德十一年。授御藥院荅魯合臣。遷回回藥物院。出僉湖北山南兩道廉訪司事。延祐間。召拜監察御史。時丞相鐵木迭兒專權貪肆。荅里麻與同列亦憐真馬祖常等劾罷之。高昌僧恃丞相威。違法娶婦南城。荅里麻嚴詰其事。風紀大振。出爲河東道廉訪副使。隰州邨民賽神。醉毆殺姚甲。首犯逸。有司逮同會者繫獄。歷年不洩。荅里麻曰。殺人者旣逃。存亡不可知。此輩誑誤無辜。胡桎梏之爲。悉縱去。至治初。鐵木

送兒復相。專務報復。荅里麻謝病歸。明年起爲燕南道廉訪副使。開州荅魯合。臣石不花互有政績。爲同僚所忌。嗾人詰其與民妻俞氏飲酒。荅里麻廉知俞乃八十老嫗。不花互實未與之飲。抵誣告者辜。不花互復職。行唐縣民伐桑道側。有人借其斧削杖。夜持杖劫民財。事覺。并逮斧主下獄。荅里麻原其不知情。釋之。深州民媼怒毆子婦死。婦方抱其兒。亦誤觸死。媼年七十。同僚議免刑。荅里麻不可。曰。國制。辜人七十免刑。爲其血氣已衰。不任刑也。媼能殺二人。不衰。卒死之獄中。改濟寧路總管。濟陽縣牧童持刈草鎌擊野雀。誤殺同牧者。繫獄數歲。荅里麻曰。小兒誤殺。難以定辜。罰鍰遣之。泰定初。擢閩海道廉訪使。朝廷遣宦者伯顏催督繡段。橫索民匠財。宣政院判官朮鄰亦取賂富僧。荅里麻皆劾之。調瀾西道。懷王圖帖睦爾駕發江陵。近侍阿兒哈禿銜令旨來求賂。不獲。還譖之。王已攝汗位。召至京師。將辜之。比至。汗怒解。遷上都。同知畱守。天曆二年。和世疎汗殂。圖帖睦爾汗復阼。使者芴午。畱守司

職當其衝。事無缺失。以勞賜錦衣。國制新君登極。必大賚諸王駙馬。妃主及宿衛官吏金帛。尚多冒濫。荅里麻議唱名給散。其幣乃革。而費大省。又賜金帶以旌其能。明年出爲淮東道廉訪使。至順二年。召拜刑部尙書。元統初。遷遼陽行省參知政事。高麗使者道過遼陽。謁省官。各奉布四匹。書一緘。以征東省印封識之。荅里麻詰之曰。鈐印公牘。防姦僞也。胡以封私書。況汝出國時。我尙在京。未履遼陽省官任。今乃有書遺我。汝君臣何欺詐如是。使者媿謝。三年。改山東道廉訪使。時山東劇盜陳馬騾。新李白。晝劫掠。荅里麻以爲官吏貪污所致。先劾去之。而後上禽賊方略。朝廷嘉納之。除大都畱守。汗宴大臣。延春閣。特賜荅里麻白鷹。表其貞廉。奉命督脩七星堂。先是繕脩。必以金銀裝飾。荅里麻獨令畫工圖山林景物。左右不以爲然。是秋。車駕還自上都。入觀之。乃大喜。以手撫。辟歎曰。有心哉。畱守也。賜金五十兩。錦衣一襲。至正六年。拜河南行省右丞。改翰林學士承旨。七年。遷西臺御史中丞。時年六十有

九致仕。召商議中書平章政事。不拜。賜食全奉終身。哈刺阿思

蘭都大上五字義謂黑獅親征錄作阿思蘭幹乞亦畏兀兒人。父玉龍阿思蘭都大上五字義謂大獅

都大猶華言巨室也。歲己巳。奉其國王亦都護命。偕察魯忽幹乞

等。以與蔑兒乞忽禿等戰於交河之捷。來告。且致歸附誠款。互詳巴而尤阿

而忒成吉思汗曰。果如爾言。其歸告爾主。以方物來。對曰。可汗幸

哀憐。亦都護身且不敢有。何有方物。既復命。亦都護即遣哈刺阿

思蘭齎寶貨及金織段以獻。由是畏兀與蒙兀遂通昏姻。為甥舅

之國。哈刺阿思蘭留事成吉思。後從左軍徇遼西。卒於興中。碑稱從太祖伐

金卒於柳城。按金元興中。即漢柳城。成吉思未嘗親用兵遼西。所從者木合黎目。贈資善大夫。湖廣行省右丞。上護軍。

追封范陽郡公。子阿塔海牙。由宿衛積勞。除塔山屯田打捕提舉。

不就。卒於京師。阿塔海牙子阿思蘭海牙。由答魯合臣入為監察

御史。圖帖睦爾汗入繼大統。以舊恩超擢詹事。天曆二年。拜中書

平章政事。以玉刻署押賜之。異數也。元制官一品者得用玉押。阿思蘭海牙官平章。從二品。故以為異。至順

元年。出為南臺御史大夫。後致仕。卒於家。弟賽因海牙。同僉宣政

院事

寫云赤篤忽璘

名從贍思所撰哈珊神道碑石刻舊傳作小雲石脫忽璘

亦畏兀兒人與岳璘帖穆爾

同出噉欲谷之後父的斤必里傑提猶華言智福大相寫云赤篤

忽璘仕其國為吾魯愛兀赤猶華言大臣也歲辛未從亦都護入

朝父子遂留事成吉思寫云赤篤忽璘尤為汗所親愛從征西域

還使給事拖雷位下拖雷妃莎兒合

黑

塔泥撫為養子幹歌互汗

時妃受湯沐邑於真定路命充本路都答魯合臣兼斷事官遂家

真定之樂城子四人長八儋

名從石刻碑文舊傳作八丹

次速混察從旭烈兀大王

西征留仕其國歷事阿八哈

句

脫

黑

脫為大將次哈刺哈孫中書

右丞行中書省事後以本官襲父職次閭閻宣慰使

八儋事忽

必烈汗潛邸為保兀兒臣左右手鷹房都萬戶

董文用所謂鷹監黨於阿合馬而譜文用不給鷹食者即

指人從征大理

舊傳作哈刺張

以功賜男女俘各一口及金挺銀甕中統初從

戰阿里不哥於昔木土日三合斬獲多又賜金一挺至元中以鷹

房萬戶從皇太子真金撫軍鎮海你里溫

囊加互傳之旭哥百溫似即你里溫變音

還賜銀椅

及鈔萬五千貫給假歸真定休沐未幾命行省揚州八僮辭曰臣自幼侍陛下未嘗離左右乃改隆興府荅魯合臣遙授中書右丞

且諭之曰隆興朕舊所居潛邸建身爪忽都西距隆興不遠故云然汝往善治之又辭不允居

三年命從晉王甘麻刺北征海都師還賜金一挺卒贈銀青榮祿

大夫大司徒子五人曰阿里鷹房千戶曰石得安西王相府官曰

德服汝寧府荅魯合臣曰哈珊名從碑一作阿散曰臘真名從碑一作刺真哈珊長

身美須髯辯給而明於事物知畏兀文兼長騎射以世胄充皇太

子真金東宮怯里馬赤至元二十年授奉訓大夫詹事院判官二

十四年除真定路總管府荅魯合臣兼管內諸軍奧魯勸農事世

職也累進正議大夫真定瀕滹沱多水患言者謂治水即漢太白

渠也舊合浚水於欒城縣北經趙州南而東入大陸澤嘉陽堰今

治水由平山西入滹沱滹沱之勢益張而治漸堙塞枯瀆僅存若

浚治而復嘉陽堰使治循故道則滹沱勢分湍悍之暴可殺哈珊

以其言上聞朝議從之四鄰各出了夫萬人著役不逾時工成民

樂而安之。未幾規利者惡害其私，竊破新堰，前功就棄，方謀再舉。臺臣以徒勞劾罷其事。元貞元年，特拜甘肅行省平章政事，賜玉

帶，到官敬事宗藩。

闊端太子後人永昌王也。

善撫士卒，邊衅以弭。大德三年入朝。

鐵穆巨汗勞之，換賜三珠虎符，統領西邊軍馬。仍前平章政事，陛辭，承密旨若曰：錢穀之出，當從便宜，不必拘執繩墨，要在使諸宗藩暨軍民說服輸忠而已。既還鎮，以邊事方殷，繕完甘州城，帥衆巡邊，會篤哇已遠走，乃歸。朝廷遣使賜以尙醢海東青鵲，舊時行省用鈔盈千挺者，必先咨都省。哈珊以承密旨，許守便宜，儲峙既盛，賞賚亦豐，物議頗咎其用財無節，然終無以辜之。八年卒於官。年五十。子班祝，以蔭起家，累官僉河東山西道肅政廉訪司事。臘真由會同館使同知通政院，累官中書平章政事，兼翰林學士，承旨通政使。卒。子察乃，由西臺御史大夫入爲通政使。泰定中，拜中書平章政事。卒。察乃子十人，第三子亦輦真始充碩德八剌汗御位，下必闡赤。泰定初，授內八府宰相。初，高麗王王燾嗣位，爲其

從弟王嵩所譖。燾入朝。雷弗遣。及是也。孫鐵木兒汗命亦輦真送

之歸國。亦輦真至高麗。宣布朝廷德意。人皆說服。亦輦真弟老章

從和世疎汗遜居金山西。天曆二年。汗車駕東還。亦輦真奉璽綬

迎於的的。黑撒合勒一作傑汗大說。即除翰林學士承旨。故事諸王

入朝。從翰林求進止。餽遺甚厚。亦輦真悉拒不納。妥懽帖睦爾汗

即位。擢資政大夫。河東山西道肅政廉訪使。復召為通政使。奉命

巡視驛傳。歷荅失八刺哈孫。即塔什干還抵晃火兒沐漣之地。即野馬川以便宜

革其弊政。東勝州之吳樂。句永樂馬牛三驛牧地。為人侵占。訟久

不洩。亦輦真讞實。正其經界。緩其逋租。驛戶立碑頌德。遷山東西

道宣慰使。江淮賊起。亦輦真與諸將討之。遇賊二百人於邳州。諸

將從容引避。亦輦真獨領親兵十二人拒卻之。俄拜遼陽行省左

丞。時賊在膠州。亦輦真曰。代者未至。我豈敢道賊。整眾東行。至沂

水。代者至。乃還。以疾卒於遼陽。年五十有二。老章以世舊起家

累官少保知樞密院事。至正十一年。奉命領軍同丞相脫脫弟也

累官少保知樞密院事。至正十一年。奉命領軍同丞相脫脫弟也

先帖木兒討河南妖寇。明年也先帖木兒失律沙河。老章復同亦都護月魯帖木兒、豫王阿剌忒納失里討襄陽、南陽、鄧州賊。又明年。老章克復南陽、唐州。十四年。從脫脫討張士誠。戰於高郵城外。大敗之。城垂陷。老章忽鳴金收兵。曰：「日莫矣。」明日再攻。是夜士誠力完守備。明日攻之。不克。脫脫遂以老師無功。被劾得辜。二十年。陽翟王阿魯輝帖木兒擁兵和林之北。謀內犯。知樞密院事禿堅帖木兒等討之。反爲所敗。走還上都。老章奉詔帥諸軍繼進。遂平之。以功進太傅。封和寧王。

孟速思亦畏兀兒人。世居別失八里。卽唐北庭都護府也。祖八里朮。父阿里息思。皆有名。孟速思早慧。年十五。盡通本國書。成吉思間而召之。一見大說。曰：「此兒眼中有火。它日可大用也。」使侍拖雷。其後拖雷妃分土。眞定命孟速思視其歲賦。忽必烈汗時在潛邸。亦親信之。蒙格汗命功臣千戶不只兒爲燕京行天下諸路也。客札魯忽赤。孟速思用潛邸薦。亦爲札魯忽赤。與同署事。歲己未。蒙

格汗殂於合州。皇弟阿里不哥居守和林。謀繼大統。忽必烈汗自江上班師至燕。庚辰春。大會諸王百官於龍岡。孟速思勸進曰。神器不可久曠。成吉思汗適孫。唯王最長且賢。宜早正大位。在會諸王塔察兒也孫格合丹咸是其言。大策遂定。忽必烈汗踐阼。眷顧益重。先是法制未定。不只兒斷事燕京。自恃累朝勳舊。生殺予奪任情。嘗大受潛邸詰責。內不自安。及是阿里不哥舉兵度漠。車駕帥師拒之。孟速思與不只兒竝扈從。孟速思疑不只兒在軍有二心。奏請遣還燕京。舊傳作奏徙之中都。殊不詞。按蒙兀取金中都。改稱燕京。不只兒本燕京大斷事官。奏請使還職守。且無所謂徙。且有二心。與否。亦孟速思揣測之意。果其有之。何以忽必烈汗仍命掌起居注。耶。故按事實改正之。親監護以往。汗又使迎安藏於和林。至元

初。詔與安童同拜丞相。固辭。然尊禮之。與丞相等。凡所引薦。皆一時豪俊。汗嘗語安童及丞相伯顏。御史大夫玉昔帖木兒曰。賢哉孟速思。求之彼族。誠為罕也。四年卒。年六十。汗深惜之。特賜諡敏惠。大德十一年。贈推忠同德佐理功臣。太師。開府儀同三司。上柱國。追封武都王。改諡智敏。子孫多顯達。詳氏族表第六子阿失帖

木兒最知名 阿失帖木兒性聰彊能傳家學至元二十四年從

征乃顏碑稱十五年從征誤也乃顏之叛在二十四年若十五年所征者或是昔里吉脫黑帖木兒有功授樞密院都事皇太

子寡妃闊闊真召入東宮命以畏兀文授皇孫晉王甘麻刺及鐵

穆旨汗二十九年遷樞密院斷事官大德二年拜翰林侍讀學士

復命以畏兀字學授海山汗累擢翰林學士正議大夫海山汗即

位以師傅恩特拜榮祿大夫大司徒翰林學士承旨知制誥兼脩

國史尋加金紫光祿大夫領太常禮儀院使至大二年卒年六十

贈推誠保德濟美功臣太師開府儀同三司上柱國追封武都王

謚忠簡

昔班亦畏兀兒人父闕里別斡赤身長八尺智勇過人從成吉思

征西域數立戰功將重賞之自請為本國坤闔城長官今哈刺沙爾城西南百餘里之

車爾勒城從之仍賜田卒二百昔班通其國書嘗授斡歌互汗長子合失

書合失海都之父也後事忽必烈汗潛邸長必闔赤中統元年自

真定路荅魯合臣入為戶部尚書阿里不哥爭立其黨阿藍荅兒

渾都海擾甘涼。昔班奉忽必烈汗命，督餽給河西軍，還至西京北。聞萬戶阿失鐵木兒等僉軍將應阿里不哥。昔班矯制召其軍赴行在。阿失鐵木兒猶豫未從。昔班委曲諭之，且曰：「可汗兒也。阿里不哥弟也。從兄順也。又何疑焉？」阿失鐵木兒請即夜孰議。翌日復命，且以兵圍昔班而待。翌日與其黨至，曰：「從爾之言矣。」昔班即便宜發西京錢糧給其軍，身帥之以行。比入見，汗歎曰：「戰陳之間得一夫之助，猶為有濟。昔班以二萬軍至，其相益豈有量哉？」拜宗正府札魯忽赤。至元十二年，海都與篤哇大擾畏兀兒地。汗命丞相安童行省院於阿力麻里，會諸王將大舉討之。先遣昔班使海都，諭令罷兵置驛來朝。海都聽命，既退軍置驛，而安童軍道經禾忽大王地。葉密立河上地襲奪其輜重，禾忽海都黨也。於是海都怒。舊傳云海都懼將逃非事實謂昔班曰：「我不難殺汝，念我先君嘗受書於汝，姑遣汝歸，以安童之事，聞非我鼻也。」昔班還奏，汗曰：「然，向之來者，亦有是言，慰其勞，妻以宗女，不魯真。」十三年正月，拜中書右丞，商議政事。二月，改

戶部尚書明年復使海都諭之來朝

舊傳云海都辭以畏死不敢恐非事實海都兵強意盛必不作是懦語

得要領而歸昔班一再奉使奔走三年往復皆萬里風塵翳目時年已七十矣汗閔之許以翰林學士承旨致仕給全奉終身年八十有九卒子幹羅思密至元二十二年授浙東道宣慰使有亂民偽鑄印璽自稱天將大王幹羅思密討平之移鎮廣西招降洞蠻羅天祐年六十有九卒子咬住至大三年授典用監卿有盜世祖御帶者懸購五千挺咬住獲之盜伏誅咬住辭賞海山汗嘉其不伐予之千挺官至榮祿大夫宗正府札魯忽赤

論曰有唐回鶻全盛時建牙和林以兵威挾其語言文字風行金山南北蔥嶺東西及其既衰南徙高昌乃蠻攘其故地契丹視爲屬國然皆襲用畏兀文莫之能廢塔陽罕尊塔塔統阿爲傳直魯古召哈刺亦哈赤北魯爲諸子師非明證歟蒙兀初起渾噩無文處理萬事徒資脣舌使命往反必以口授自成吉思滅乃蠻得塔塔統阿始知符印之用遂教皇子諸王以畏兀字書國言哈刺亦

哈赤北魯句岳璘帖穆爾句撒思吉句昔班先後爲諸王傳各罄
所蘊播種待穫以是蒙兀未君中原時國內盛行畏兀文其諸符
璽用是篆刻西征軍中飛書羽檄亦靡不以之中統三年猶以其
字書給驛券則且行之漢地矣至元六年始命帝師八思巴變通
梵文創作蒙兀新字頒行諸路然當時賜蒙兀色目諸臣以通鑑
諸書仍用畏兀字轉譯誠以習尚旣深非是莫能通曉由是觀之
雖謂蒙兀最初文化由畏兀兒輸入可也及至延祐始以科舉取
士而畏兀世族之僕氏父子兄弟亦以中國文學獵取進士第矣
識者謂一代風習轉移視乎人主之好尚豈不然哉

阿刺淺牙刺哇赤塔本列傳第二十八蒙兀兒史記卷第四十六

武進屠 寄篡

阿刺淺 名見秘史卷十二卷三別譯作阿三撒兒塔黑台下五字突厥語土著不逐水叫之義種類之稱非李志常長春西遊記作阿里鮮金史宣紀作乙里只或作乙里只

札八舊元史太祖紀作乙職里倒誤 號札八兒火者 金史之乙里只札八兼名與號稱之西遊記或單稱劄八即札八異譯 火者突厥語

有道之士也 舊傳誤認為官稱 本天方教主摩訶末女婿阿里之後裔木速

兒蠻人貴之稱其族曰賽夷忒 釋詳氏族考 因以賽夷為氏入中國自稱

河西人 據西遊記時通稱黃河套外地曰河西故客列亦速哥亦有河西人之且不專指西夏 其人長身美髯方瞳廣額善

騎射通諸國方言兼通漢語往來漠南北商販牲畜嘗從汪古惕

阿刺忽失的吉惕忽里所跨一白駝驅羯羊千噉將循額洄古涅

河往質不荅合貂鼯 舊傳嘗乘橐佗以戰一語涉秘史是文而誤會不荅合打牲部落之謂居黑龍江內外興安嶺中清朝設布特哈總管領之 道

經巴泐渚納飲羊水瀕與成吉思遇時成吉思自合刺合勒只沙

陀大戰後正休兵於此飲水誓眾同盟者十有九人阿刺淺與焉

成吉思既平漠北客列亦 句 乃蠻 句 蔑兒乞諸部族 舊傳誤稱西域諸部 將謀

伐金先遣阿刺淺奉使往覘虛實金人不為禮然阿刺淺盡得敵

情及其近邊道路夷險歸報歲辛未成吉思遂自將南伐前鋒者別與古亦捏兀克以計奪取居庸關車駕入關分軍三道大掠之

而還歲癸酉再駕伐金時金人已治鐵錮居庸關門命契丹將訛

魯不花守以精兵廣布蒺藜於關外地以限馬足者別軍至距關

百里不得進成吉思即軍中召阿刺淺問計對曰自此迤西西蕃傳誤北

有第二隘曰紫荊口間道劣容單騎臣嘗過之若勒兵銜枝魚貫

而行終夕可出險汗乃命客台句薄察二將頓兵居庸北口與金

守關者相持自引大軍西行潛取飛狐南趨紫荊仍命者別為前

鋒阿刺淺輕騎嚮道日暮入谷黎明舉軍度隘比金將朮虎高琪

帥師來拒北軍迎戰於五回嶺大破之歲乙亥中都潰成吉思至

周覽其形勢謂左右曰朕今日得至此者札八兒之力也乃命阿

刺淺登高四射隨箭所墮其地舉以賜之遂并有金四親王府為

居第車駕北還授阿刺淺黃河以北鐵門以南居庸關門南諸路都答魯

合臣與太保石抹明安等畱守中都歲己卯成吉思親征西域皇

弟幹赤斤國王居守漠北時有道士丘處機者隱居萊州崑崙山
昊天觀成吉思聞其名遣宣差劉仲祿齎書馳驛徵之。處機應
詔西行。道出宣德。幹赤斤命阿剌淺邀請處機。枉道過其牙帳。牙帳在客
魯漣河。今外蒙古車臣汗左翼前旗牧地。既見。仍遣阿剌淺伴送至行在所。成吉思訪道於

處機。詔阿剌淺與耶律阿海侍坐。金帳傳譯掌錄問荅之詞。及處
機東還。阿剌淺奉命送之。行次雲內。聞李全以山東叛。新埽之民
多受其惑。阿剌淺欲得處機手書。偕其弟子尹志平往招諭之。處
機不允。以爲時機未至。雖往無益。阿剌淺固請曰。若主上臨以大
兵。慮多殺戮。願真人一言垂慈。處機沈思良久曰。雖救之不得。猶
愈坐視其死也。乃爲書二通。付阿剌淺。偕志平以往焉。初處機一
見阿剌淺。卽曰。我嘗識公。阿剌淺曰。我亦似嘗識真人。皆謂有夙世緣也。它
日耦坐。處機從容詢之曰。公欲極一身富貴耶。抑願慶流子孫也。
阿剌淺曰。身後富貴安在。子孫無恙。得承宗祀足矣。處機曰。聞命
矣。後果如其言。阿剌淺善詞令。前後凡九使金。皆得要領。岐國公

主來歸，卽其一端也。斡歌互汗卽位，用察乃及不勒。荅合兒議創

設蒙兀畏兀兒及西域閒站赤，命阿刺淺與脫忽察兒董其事。歲

癸丑，大軍圍蔡州。宋將孟琪以師來會，都元帥侂蓋遣阿刺淺

宋史 傳之阿悉 卽阿刺淺 及耶律末哥 耶律禿花之子孟琪傳作 兔花忒漫柯柯誤作河 古出返之 古出訶額倫四養子 之二琪傳作過出 兩

軍歡洽，遂同奏破蔡滅金之功。丙申，分土功臣，賜阿刺淺養老一

百戶。卒，年百十有八歲。贈推忠佐命功臣、太傅、開府儀同三司。上

柱國、涼國公，諡武定。二子：阿里罕、明里察。阿里罕從父出入行

陳勇而善謀，扈蒙格汗伐蜀，拜天下質子軍都元帥。子哈只，官至

湖南宣慰使。卒，贈推誠保德功臣、金紫光祿大夫、司徒、涼國公，諡

安惠。有三子：長養安，陝西行省平章政事；次阿思蘭，太府監丞；次

補孛，太僕寺丞。養安子阿葩實，太僕寺卿。明里察贈開府儀同

三司。上柱國、涼國公，諡康懿。二子：長亦不刺金 刺舊傳 誤作速 戶部尚書，次

哈刺陝西行省參知政事。

牙刺哇赤 名見秘史 哇亦作洼 太宗十三年舊紀作牙老瓦赤 憲宗紀牙刺瓦赤世祖紀及親 征錄並作牙魯瓦赤危素集達里麻吉而的碑作雅刺瓦赤 或作雅老瓦實 洪譯

西域補傳有八罷牙里委赤下四字與牙刺哇赤音甚近唯八罷二字未詳按舊史阿刺瓦而思傳云八瓦百氏八罷牙里委赤似八瓦百阿刺瓦而思履轉之音始以為即此牙刺哇赤今乃知別

是一人同紇種古速魯氏據達里麻吉而的碑此必其子請危素撰碑時行狀中自述較秘史尤可信從之號麻合浸的太宗元年舊紀

云西域人以丁計出賦調麻合浸的滑刺西迷主之按滑刺西迷即牙刺哇赤之音差上四字麻合浸的其道號也天方教徒以其為美號故相同者甚多

舊都兀籠格赤城人天方教革新黨忽里模子惕也忽里模子波斯海濱內島部名秘史作忽魯木石惕者統類之詞通譯作忽魯模斯詳本書西北三藩地通釋按唐以來波斯天方教徒有一種革新黨與今日歐洲所謂社會激進黨相似因其人起事於忽魯模斯島後遂相沿目為忽里模子惕牙刺哇赤父子即此黨人蒙兀軍初入西域不詳其故遂誤認為種姓云

成吉思征西域皇子拙赤等攻下兀籠格赤牙刺哇赤挈其長子馬思忽惕來降憲宗舊紀之麻速忽即此人惕為助詞可省歲壬午西域略定成吉思分置荅魯合臣於不合兒句薛米思堅句兀籠格赤句兀丹句乞思合兒句兀里羊句古先荅里勒等城以太

師國公耶律阿海為都荅魯合臣西遊記之太師移刺國公即阿海李文田誤認為耶律楚材以馬思忽惕西域土箸諧習城郭之國民情政教命同知其事牙刺哇赤從駕東歸歲己丑斡歌互汗即位定阿梅河等處丁賦命牙刺哇赤遙領之丁丑冬充燕京行省札魯忽赤主管漢民公事且掌中原財賦時有西域賈胡奧都刺合蠻者以言利得幸於斡歌互汗撲

表史四十六

二

買中原銀課二萬二千挺。以四萬挺為額。牙刺哇赤心弗善之。乃

蠻真可敦稱制。與都制合蠻益用事。聚斂益亟。中書令耶律楚材

憂死。牙刺哇赤亦被讒奪職。舉且不測。馬思忽惕在西域間之。懼

禍及。亡命依宗王巴禿。古余克汗立。與都刺合蠻姦利事發。伏誅。

起復牙刺哇赤。依前燕京行省札魯忽赤。掌中原財賦。馬思忽惕

仍掌突厥斯單及薛米思堅等處財賦。並賜金虎符。虎西書作獮按蒙元有虎符無獮符當是

傳譯者之誤 蒙格汗登極。牙刺哇赤赴和林朝賀。納還所賜符。直失烈門

句 忽察句 腦忽三王謀發。內難事覺。從官被捕。鞫問辭服。普上斷

事。官忙哥撒兒請窮治之。汗以事涉宗親。時當初政。多行誅戮。為

難。正猶豫間。見牙刺哇赤立戶外。呼入問之。曰。汝老成人。蒙元語也不午更

事多。何獨無言。對曰。臣西域人。請得言西域事。昔者希臘大王阿

來珊德已滅波斯。欲入印度。諸將久役思歸。多異議。令出不行。阿

來珊德遣使詢於其傅阿里斯拓忒百。使者致命。阿里斯拓忒百

無言。第借使者遊步園中。遇園木之蔽。觀礙行者。令僕從芟伐之。

或竟拔其根株。易以新植。使者悟。歸報阿來珊德。乃沒策誅逐諸不從令者。使人代將其軍。竟平印度而歸。蒙格汗聞是言。遂誅三

王之黨凡七十人。仍命牙刺哇赤與不只兒句。斡魯不覩句。塔刺

渾行尙書省事於燕京。縮中原財賦。監印造寶鈔。馬思忽惕與訥

懷句。塔刺海行別失八里等處尙書省事。並賜還金虎符。其父子

同被四朝寵遇如此。牙刺哇赤亟於理財。有病其用法過嚴者。會

忽必烈汗以皇弟承制轄漠南漢地軍國庶事。奏請別立經略司

於汴梁。以忙哥。史天澤等爲使忙哥似卽木合黎弟不
合之子。札刺亦兒氏。乞弗受牙刺哇赤

節制。牙刺哇赤尋卒其卒年雖不可考
然約在中統以前。馬思忽惕有父風。中統間。阿里

不哥僭號漠北。馬思忽惕從之。及阿里不哥與察阿互後王阿魯

忽交兵。久之不解。使馬思忽惕往與議和。阿魯忽時正乏餉。知馬

思忽惕善理財。畱弗遣。命主不合兒。薛米思堅等城丁賦。未幾軍

用饒足。馬思忽惕自此遂仕於察阿互汗國。及察阿互曾孫八刺

合謀攘旭烈兀汗國呼羅珊之地。至元五年冬。馬思忽惕奉使往

覘國情揚言阿梅河外之地本屬國家公有成吉思四子均得分

其歲賦特來視會計盈虛阿八哈大王以馬思忽惕累朝舊臣優

禮享之贈以成吉思御服蒙兀君主之喪以遺服分賜子孫親舊為紀念此服蓋拖雷所分得者出示歲計青冊

丁口簿錄曰青冊見舊紀明供給軍國外無復餘財馬思忽惕既得青冊不辭而行

來時緣道置騎以待去則易馬疾馳追者及諸阿梅河已在舟中

矣無何兩藩交兵八刺合敗績阿梅河右大為敵擾民不聊生及

篤哇嗣察阿互汗位復以馬思忽惕理宰堵利瑟那之地丁賦柯史誤稱

拾呼羅冊財賦不久流亡復業馬思忽惕總西域財賦前後五十餘年所至

府庫裕而民不擾以功受察阿互汗國侯封西域謂侯為卑卑亦作畢讀如

詩相維辟公之辟故時人稱馬思忽惕卑云馬思忽惕有二弟曰阿里別阿里其

別為卑字異譯謂侯爵一作伯曰耶爾脫忽璘阿里別初亦事阿魯忽大王時稱阿魯忽為于闐

宗王故亦稱阿封侯後入中朝事忽必烈汗至元四年拜中書參知政

事宰相表四年至八年九年進右丞出行河南省事舊紀省稱阿里大軍伐宋以右丞拜

左副都元帥同都元帥博羅歡經略淮東既降漣海築灣頭堡戍

之十三年。宋將姜才來攻阿里。別擊走之。已而復與都督陳巖要

敗才於丁邨堡之北。獲其餉米。宋平論功。進拜江淮行中書省平

章政事。十五年。奉旨沙汰江南冗官。舊紀此處亦省稱阿里十六年。奏乞行中書

省得檢覈行御史臺文案。且請行臺呈行省。比中臺呈中書省例。

汗既從之。中臺臣以為不便。乃止。舊紀此處作阿里伯按伯為別字異譯十七年冬十二月。

以擅易行省命官八百員。自分左右司官。鑄銀銅印。又違命不散

防守軍。與左丞崔斌同伏法。先是阿合馬子忽辛為阿里別所沙

汰。阿合馬深怨之。斌亦嘗劾阿合馬。故二人被譖害。後阿里別追

諡忠節。耶爾脫忽璘子雍吉脫忽憐。孫脫烈。脫烈御位下怯里

馬赤。授功德使。曾孫達里麻吉而的。福建道宣慰使都元帥。有子

三人。孫六人。詳氏族表。

塔本。畏兀兒種。伊吾廬人。以其好揚人善。稱之曰揚公。父宋五設

託陀。託陀者。其國主所賜號。猶華言國老也。塔本以質子從伐金

當是從巴而尤阿而忒的斤來降。在成吉思平乃蠻之後。舊傳云初從太祖討諸部。屢院艱危。贊詞也。圍中都。又從征遼西。似從木合黎或者別那顏下

平灤白霽諸城金之北京大定府古白霽地軍士有妄殺人者塔本戒之曰國之本

民也殺人得地何益於國且殺無辜以堅敵心非上意成吉思問

而嘉之賜金虎符虎符俾鎮白霽諸郡號行省都元帥管內得承制

除縣吏死囚得專洩久之徙治與平與平兵火之後戶口凋殘塔

本召父老詢所疾苦為除之薄賦斂役有時流亡之民漸歸復業

始至戶止七百不一二年乃至萬戶出已馬以寬驛人貸廉吏銀

不能償于錢者焚其券農貧無牛官給之比歲告稔民用以饒歲

庚寅幹歌互汗聞其治行詔益中山平定平原隸其行省歲甲午

平李仙趙小哥之亂止誅首惡宥其誣誤乃蠻真可敦稱制之二

年癸卯卒於官遺命葬以紙衣瓦棺贈推誠定遠佐運功臣太師

開府儀同三司上柱國諡忠武子阿里乞失鐵木兒嗣為興平等

處行省都元帥其治一遵先軌雖同僚不敢私役一民歲甲寅蒙

格汗命從都元帥札刺台伐高麗有功丙辰卒贈宣忠輔義功臣

榮祿大夫平章政事柱國諡武襄與父同追封營國公子阿台

阿台當襲父職。適罷行省爲平灤路總管府。歲丁巳。蒙格汗授阿台平灤路荅魯合臣。阿台請蠲本路銀鹽鐵酒醋等稅課八之一。細民不征。忽必烈汗卽位。入朝。賜金虎符。諸侯王道出平灤。供給費銀七千五百兩。戶部不卽償。阿台自陳上前。盡取償以歸。置甲乙籍籍民丁力。民甚便之。至元十年。進階懷遠大將軍。歲饑。不及請。先發廩粟振民。或持不可。阿台曰。朝廷不允。願以家粟償官。終亦未嘗得。臯追償也。又凡僚屬始至。阿台必遺之鹽米羊畜什器。曰。非有它也。欲其不剝民耳。媼族窮者。月有常給。民有喪不能舉者。與之棺槨。布帛資糧。灤爲孤竹故國。立廟祀伯夷叔齊。以勵風俗。二十一年。授階昭武大將軍。後三年。乃顏叛。獻馬五百匹。佐軍。忽必烈汗大喜。事平。賜以所獲。乃顏銀盃。二十五年。入朝。以疾卒。贈推忠宣力功臣。資德大夫。中書右丞。上護軍。諡忠亮。子迭里威失。迭里威失。少好讀書。宿衛鐵穆百汗。出爲河西廉訪司僉事。入拜監察御史。遷淮西廉訪副使。召爲中書左司員外郎。改樞密參議。

陞判官延祐四年改拜翰林侍講學士出爲河間路總管歲饑蠲奉金及官庫所積振之河間當水陸要衝往來供億取給焉迭里威失立法調遣民便之復建言增置便習弓馬尉一人益邏卒之數盜賊屏息陵州奸民結黨橫行迭里威失逮捕繫獄悉殺之一郡肅然後拜遼陽行省參知政事卒子鎖咬兒哈的迷失鎖咬兒哈的迷失年十二宿衛碩德八剌汗潛邸爲玉典赤汗卽位拜監察御史至治元年詔建京西壽安山寺鎖咬兒哈的迷失與同寮觀音保成珪李謙亨上章極諫以爲東作方始而興大役耗財病民非所以祈福也先是司徒劉夔妄獻測右民田冒領內庫賞鈔六百萬貫丞相鐵木迭兒分取其半事爲御史所發遂嫉言路如讎至是其子鎖南爲治書侍御史密奏言彼宿衛舊臣聞事有不便弗卽入告乃訕上以自估直名大不敬汗怒殺鎖咬兒哈的迷失及觀音保杖珪謙亨黥而竄諸奴兒干之地泰定初贈鎖咬兒哈的迷失資德大夫御史中丞上護軍諡貞愍與其祖若父皆

追封永平郡公。賜其妻子鈔五百貫。良田十頃。仍詔樹碑神道旌之。

論曰。阿刺淺乞丘處機手書。招諭山東反側之民。冀免屠戮。牙刺哇赤諷蒙格汗誅三王之黨。以除異己。同是天方教徒。一則爲民。一則爲君。其心有仁暴公私之異。觀於兩家後嗣之盛衰。知大易餘慶餘殃之說。不虛立也。塔本戒殺無辜。撫循創夷。亂世得此廉靜之吏。一方被澤不鮮矣。

阿刺淺牙刺哇赤塔本列傳第二十八蒙兀兒史記卷第四十六

昔里鈴部按竺邇奧屯世英列傳第二十九

蒙兀兒史記卷第四十七

武進屠寄纂

昔里鈴部其先以沙陀部長歸唐唐末子孫散落隴氏遠祖仲與

伯兄避地五臺山谷蓋就其同種雁門節度朱邪赤心族目復以世故當以後唐為石晉篡滅故徙沙州沙州本唐突厥

沙陀部故地遂為河西人父答兒沙必吉以上七世仕西夏為大官必吉猶別乞俗

譯作伯克突厥回紇蒙兀族長之通稱姚牧庵謂譯言宰相非是故渾稱大官本從唐賜姓李氏以別於西夏國氏為

小李語謔為昔里答兒沙官肅州鈴部生子以官配氏是名昔里

鈴部又名益立山據王暉秋澗集大名路宣差李公神道碑補名鈴部本吐蕃君號贊普之轉譯

吐蕃語雄強曰贊丈夫曰普故謂君為贊普見唐書吐蕃傳西夏本拓跋與吐蕃同種故其語亦同西夏用以名官秘史西夏有將曰阿沙敢不西書稱王罕弟怯列嘗仕西

夏夏主賜名札合敢不元史有也蒲甘卜亦西夏舊將又有塔海紺字所謂甘卜甘李與鈴部皆贊普二字異譯昔里鈴部兄弟四人已獨涉

獵儒釋兼曉音律以陰僂直夏宮省積勞出任沙州鈴部西夏之稱鈴部猶蒙兀之

稱把阿秃兒蓋是武官夏與蒙兀和親其兄肅州鈴部辯有口奉使北聘見成吉思

思有興王之度可事因與館伴使逸的察罕深相結納密申誠款

丙戌春碑作冬依舊史本紀改正蒙兀軍圍肅州。其兄射書城外約降。事覺。為同城

將異謀者所殺。全家遇害。其年冬。師次燉煌。鈐部遂帥其屬自拔

來歸。成吉思使隸嗣國王孛魯麾下碑作國王本華黎以位言不以人言也從征羌落。戰輒有

功。丁亥夏。成吉思避暑六盤碑稱師還非也。夏主李睨請降。河西諸城悉下。

獨沙州恃遠拒守。舊傳云進兵肅州守者鈐部之兒乃誤并沙肅二州先後一役為今從碑汗命馬官蒙兀語阿黑塔赤忽都鐵

木兒偕鈐部往招諭之。州將偽降。設伏奉牛酒犒師。忽都鐵木兒

至。將受其降。而伏發。返走。馬躓。追者垂及。鈐部下所乘馬授之。自

乘躓馬殿後。與左右拒退。追者乃還。孛魯壯之。召見勞問。曰。臨危

而以馬濟人。汝命顧不靳耶。對曰。彼舊臣。不可委敵辱國。我新附

臨難效命。即死不足繫重輕。成吉思聞而嘉之。曰。努力無怠。會當

與汝好官。命偕它將還攻沙。期必破而屠之。鈐部泣請曰。彼逆命

者。守將一二人。巨民何辜。必盡屠之。恐堅未降者心。且臣賤族。咸

在。乞賜矜全。汗以成命毋改。唯聽鈐部於城破後。求其親族家人

於死所。比城破。由鈐部得免者百有六戶。歸其田業。歲乙未碑誤作庚寅秋

斡歌互汗命皇古余克皇姪蒙格帥師西征明年啟行鈴部以

選在役又明年師次寬田吉思海既禽欽察酋八赤蠻遂從親王

巴禿入斡魯速國大戰也烈贊城城名從憲宗紀舊傳作也里贊七日拔之戊戌冬十

一月舊史紀傳均誤作己亥回師攻阿速碑作阿思部其城蔑怯思秘史蒙文蔑格惕按思惕皆語詞此從憲宗紀負山

面海險固不下明年正月鈴部一夕伺守陴者怠帥敢死士十人

躡雲梯潛登殺十一人大呼曰城破矣諸軍蟻附而上遂拔之阿

速平論功第一巴禿即軍中賜號把阿禿兒賚以西馬西錦明年

班師東歸擢千戶佩金符賜四時只孫服只孫服色純白大宴會時公服歲丙午古余

克汗即位授大名路答魯合臣以丞相鎮海薦使佐行臺牙刺哇

赤斷事燕京碑之業陌赤即牙刺哇赤音差辛亥蒙格汗踐阼以不只兒來泣行臺命

鈴部同署事已而別賜虎符俾還監大名路且賚白金良馬大名

古魏都列朝重鎮金末被兵官府艸創羣豪諸司錯迭各以勢劫

持不相下地方長官政令不行事多齟齬鈴部到官無鉅細一軌

以法始則遷然既乃拱聽約束列幕互野使者劻午無敢稍侵牟

袁史四十七

於民。於是舉賢能。詰姦慝。政有不便。與民更始。一日釋奠廟學。見禮殿黝圯。喟然歎曰。澤宮風教所繫。今若此。何以興民乎。即完治一新。亭傳倉庫。亦以次修舉。衡漳歲汎。為民害最鉅。請於朝。築隄植槐柳。藉其盤根。以固隄趾。免崩齒。歲刪繁條。且充薪蒸之用。其後公私利賴。相有劇賊張甲。聚黨百餘。橫行劫掠。官不能禁。久之闌入魏境。鈐部偵得其窟穴。掩捕無遺。自是相魏之郊。行旅居民相慶。凡監大名十有四年。己未。忽必烈汗自潛邸南伐。駐軍濮苑。所謂小濮也。召鈐部轉饗。力疾而行。秋七月。病甚。輿歸。卒於官。年六十有九。返葬肅州。子三人。長愛魯。次羅合。大名路行軍萬戶。次小鈐部。襲大名路總管府荅魯合臣。愛魯始襲父職。佩虎符。大名路總管府荅魯合臣。至元四年。以盜用官錢。與總管張弘範同免職。小鈐部代

襲世職
在此時

五年。皇子忽哥赤就雲南王封。愛魯將衛士以從。金齒蠻絕縹甸道。王命愛魯討之。以射生手五百。熾蠻軍數千。諸部讐服。六年。再入金齒。定其貢賦。平火不麻等二十四砦。獲七馴象以貢。明

年入覲。改善闡路。荅魯合臣。

善闡舊傳作中慶據後之詞是年尚未改名

兼管爨棘事。

姚燧牧庵集魏國李

忠節公神道碑稱兼善闡安撫使是也

十一年。平章賽典赤行省雲南。

舊傳本作十年事按賽典赤本傳十一年始拜行省雲南之命

實則先二年已拜命地理志十三年立雲南行省亦誤

命愛魯疆理永昌。定其田賦。明年

舊傳誤作十一年

改善闡府

為中慶路。

據地志

愛魯閱實版籍。出隱戶萬餘。大為賽典赤所信任。命

以四千戶即其地屯田。初忽必烈汗自潛邸征雲南。道出吐蕃。苦

其迂曲。十四年。思播既降。改取蜀道入。行省命愛魯闢二塗。陸出

烏蒙。水由馬湖。烏蒙蠻糾都掌圈豕鵝夷諸種落抗命。愛魯帥師

徇筠連等州。以往

筠連據地志舊傳作玉連

累戰服其人。苾部句亦奚不辭地多山

險。土人築砦拒守。以兵二千討平之。遷廣南西道左右兩江宣撫

使。兼招討使。又自滇開道通邕管。平溪洞夷獠五十餘州。十六年

賽典赤卒。官。朝廷拘收雲南行省印。唯存宣慰司都元帥府。拜愛

魯同知雲南諸路宣慰司副都元帥。還治之。明年。行省復立。改拜

參知政事。奉詔將本省軍萬人。會湖廣四川軍。平羅施鬼國之亂。

又明年。烏蒙羅佐山白水江蠻殺萬戶阿忽叛。復討平之。十九年。

召赴闕。進左丞。亦奚不辭。復叛。詔與西川都元帥也速荅兒子紐璘湖

廣行省脫理察會師進討也。速荅兒以地炎瘴。轉輸不繼。奏請旋

師。許之。畱藥刺海一軍屯其地。已而亦奚不辭。悔禍納款。仁普諸

酋皆聽命。得降戶四千。諸王相兀荅兒帥師征緬。愛魯轉饟於後。

二十二年。烏蒙阿謀殺宣撫使以叛。偕右丞拜荅兒討之。拜荅兒

以愛魯習知其山川道里形要。令諸軍悉聽指導。分路進擊。會四

川總管塔海帖木兒已禽阿謀。乃引軍還。明年。進右丞。階資德大

夫。賜四時只孫服。尙方鞍勒弓矢甲冑。奉旨赴金齒。徵收其迭古

連之地。雲南王也先帖木兒撥軍千人付之。至永昌。與征緬省官

會。進次阿昔甸。遣軍五百護招討使怯烈至太公城。二十四年正

月。進至忸乃甸。直其國內亂。未及郡縣之而還。獲大象二十七以

獻。是歲。行省改尙書。仍行尙書右丞。會皇子鎮南王脫歡再征交

趾。詔愛魯將雲南軍六千會之。自羅羅斯白衣道交趾。其國昭文

王以軍四萬守木兀門。愛魯與戰破之。禽其將黎石何英。師行三

閱月大小十有八戰。平三十八柵。先大軍一月至其都大羅城。既會鎮南王。又從戰二十餘合。會其王遁入海。明年以糧匱。班師。愛魯衛鎮南王至思明州。始辭還雲南。夏六月。感瘴癘。道卒。年六十。有三愛魯使相西南二十一年。在軍不吝賞賚。故能得士死力。所向有功。未嘗敗衄。爲一時名將。赴間震悼。給五十乘。傳歸其喪。大名。贈銀青榮祿大夫。平章政事。諡毅敏。子教化。孝友有蘊藉。臨事精覈。累官江淞行省平章政事。中書平章政事。特進。開府儀同三司。上柱國。太子太保。太尉。平章軍國重事。魏國公。至治元年。請於朝。加贈愛魯秉義執德威遠功臣。太師。改諡忠節。竝贈昔里鈐部推忠佐命宣力功臣。太師。諡貞獻。鈐部之父。答兒沙必吉。效忠翊運保德功臣。太傅。諡康懿。三代皆開府儀同三司。上柱國。追封魏國公。脫力世官。畏兀兒人。祖八思忽。都探花忽赤。從成吉思征西域。非從征西域不得領有阿刺溫及八思降人 幹歌互汗時。舊傳渾稱國初按成吉思汗時未嘗有一兵入蜀幹歌互汗平金始命皇子闕端征四川 領本種畏兀兒及阿刺溫。裏海西南部族 滅乞里。西域無此部疑是滅里乞之倒誤蓋交河之戰脫黑脫阿子忽秃等所部敗殘之衆降畏兀者

八思波斯二字異譯三部新討軍。從征蜀戰歿。父帖哥朮探花愛忽赤。蒙格

汗命監哈密力舊作渴密里苦父舊作曲先改從西北地封錄等處察阿互諸後王分地。中

統初。阿藍答兒渾都海之變。械繫帖哥朮。乘閒脫走。入覲忽必烈

汗。賜金符。襲其父職。命帥所部討賊。以功賜衣服弓矢鞍勒。至元

九年。又命從皇子西平王奧魯赤征建都蠻。踰年平之。授昭勇大

將軍。羅羅斯副都元帥。同知宣慰司事。之官。道出西番。番酋必刺

秃要遮不得進。帖哥朮戰卻之道。遂通事。間換佩虎符。賞白金對

衣。卒官。脫力世官襲職。初階武德將軍。定昌路總管。谷納叛。與干

戶阿夷謀帥眾渡不思魯河。脫力世官禽阿夷。斬之。德平路獺魯

蠻叛獺魯見地志舊傳作落來。又討平之。亦奚不辭。負險不服。詔雲南行省調羅

羅斯蒙兀戍軍四百人。羅羅章六百羅羅章羅羅土人也例如合刺章察罕章章為人之譯音。屬脫力

世官。從左丞愛魯討之。脫力世官先鋒。拔其一寨。愛魯命移兵攻

羅羽。抵落窳。奪其關。獲馬牛以給士卒。又與萬戶幹都蠻攻怯兒

部。其酋阿失據寨不下。脫力世官先登。拔之。愛魯遂命脫力世官

總左手四翼軍。盡平亦奚不辭。又有蠻子童者。立砮納土原山。行省復命總蒙兀及巽麤軍。與參政阿合八失攻之。子童窮蹙。遂降。進兼管軍副萬戶。蠻細狗折興等及威通州判阿遮皆憑險拒命。脫力世官乘夜襲奪其寨。蠻衆星散。遣兵窮搜山谷。獲阿遮於深箐。斬之。入覲。換佩三珠虎符。進懷遠大將軍。羅羅斯宣慰使兼管軍萬戶。既還鎮。括戶口。定賦稅。昌州酋蘇你巴翠等作亂。以雲南王命討平之。徙其衆於州北平川縣。鎮守千戶。任世祿以所部二千人乘閒遁據威龍州。脫力世官扼其要隘。困之。世祿降。未幾入覲。卒於京師。子峻南班。由宿衛襲職。佩三珠虎符。階至鎮國上將軍。

按竺邇雍古氏

雍古與汪古同類而異族故異譯以別之實則其命名皆保寨之義北語謂長城曰烏古汪古雍古皆烏古音訛

其先居雲內

塞上

舊傳作雲中塞上按金之雲內州本漢雲中郡其地即今山西之薩拉齊金人不名雲中而稱雲內因西京大同府為唐雲中郡恐混淆也元得地於金宜用金名元明人繆以古地易

今名不自知其非也

父黜公為金羣牧使。歲辛未。蒙兀伐金。掠其牧馬。

其馬為耶律禿花所掠

黜公死之

舊傳云驅所牧馬來歸太祖終其官果爾按竺邇何至鞠於外家今依趙世延傳

按竺邇幼鞠於外祖朮要甲

氏金史百官志黑號之姓十有六其三曰朮要甲大金國志有黑水千戶疑卽是家世官所以監汪古惕者語譌爲趙家。故雍古氏亦稱趙

氏。按竺邇年十四。給事皇子察阿互位下。嘗從獵。獲數麋。有二虎

出攫射之皆殪。由是以善射聞。察阿互深器愛之。歲己卯舊傳誤作甲戌從

征西域。凡七年。班師。論功授千戶。丙戌。又從征西夏。乘勢攻取金

源邊郡。丁亥。先登拔積石州。從圍河州。破臨洮。攻德順。並斬獲有

功。又從攻鞏昌。不克。駐軍秦州。歲己丑。幹歌互汗嗣位。察阿互以

皇兄開藩垂河之上。刪丹爲其分地。命按竺邇爲元帥鎮守之。自

燉煌置驛抵玉關。以通西域。辛卯。從圍鳳翔。按竺邇分攻西南隅。

選死士先登。拔其城。斬金將劉興哥。分兵攻西和州。州將彊俊堅

壁清野。以老我師。按竺邇帥死士臨城辱罵挑戰。俊怒。悉衆出。按

竺邇佯走。引俊遠追。因乘隙奪其城。伏兵要其歸路。生獲俊。餘衆

退保仇池。進擊拔之。又從拔平涼。慶陽。邠。原。寧。間之。皆不戰而下。

涇州已降。復叛。殺戍將郭元恕。城破。衆議屠之。按竺邇但誅首惡。

師還。原州降。民棄老幼夜亾走。衆曰。此必反也。宜誅以警其餘。按

竺邈曰不然。彼懼吾驅之北徙耳。乃使人往諭之曰：汝等若走，按軍法治臯。父母妻子并誅。汝歸保無它。明年艸青，具牛酒迎師於此。於是走者皆復歸。豪民陳苟集數千人，潛新寨諸洞。衆議以火攻之。按竺邈曰：招諭不出，攻之未晚。遂輕將數騎抵寨，縱馬解弓矢。召苟遙與語，折矢爲誓。苟等卽降，相呼羅拜謝更生。金人嚴守潼關。按竺邈從大將速別額台攻之，戰於扇車回。大爲其將陳和尚忠孝軍所敗。幹歌互汗怒，將治速別額台及按竺邈等失律。臯皇弟拖雷方欲將右手軍假道於宋，以伐金。爲之請，使從己戴臯立功自贖。於是按竺邈前鋒趨散關。宋人已燒絕棧道，乃由兩當出魚關。軍沔。時宋四川制置使桂如淵守興元。按竺邈使人謂之曰：宋讎金久矣，何不從我兵鋒一洗國恥。今欲假道南鄭，由金洋達唐鄧，會大軍以滅金，豈唯吾利，抑亦貴國之利也。如淵度我師已壓境，勢不徒還，遂遣人導我師。自武休關東抵鄧州，西破小關。金人大駭。其平章完顏合達副樞移刺蒲阿帥十七校尉兵十五

萬旅拒於鄧。我軍不與戰。直趣鈞州。會宗王阿勒赤互左手軍。與

金師大戰三峰山下。事具拖雷傳。我軍既捷。拖雷以玉杯盤及生

口三十。賞按竺邇假道功。癸巳九月。從圍蔡。甲午正月。蔡潰。金亾。

初。大軍攻鳳翔。城將陷。金將郭斌突圍出。斌有塚臺之號蓋面麻故西保金蘭定會

四州。而自守會。至是命按竺邇往圍攻之。斌食盡將走。賊諸子城

門。師入城巷戰。死傷狼籍。斌手劍驅妻子於一室焚之。已而亦自

投於火。有一女奴抱兒出。泣授人。曰。將軍盡忠。忍使絕嗣。此其子

也。幸哀而收之。語畢。復赴火死。按竺邇聞之。惻然。命抱其孤。遂定

四州。而汪世顯保鞏屬西和之石門。猶不下。按竺邇奏記於皇子

闊端。請遣使招之。可不費一矢。皇子即遣按竺邇往。世顯果降。幹

歌互汗勞而問之。曰。軍民之長。何官為尊。唯汝自擇。按竺邇辭不

敢。乃拜征行大元帥。賜錦衣。察阿互亦自賜以把阿秃兒之號。歲

丙申。闊端奉命伐蜀。自帥諸將出大散關。分軍令宗王末哥等出

古陰平道。期會成都。按竺邇領礮手軍。為末哥前鋒。破宕昌。殘階

州。遂攻文州。即陰平道州將劉祿堅守。按竺邈謀知城中無井。乃奪其汲

道。帥勇士梯攻拔之。祿不屈而死。因招徠吐蕃酋。勘陀孟迦等十

族。各賜以銀符。遂略定龍州。與大散軍進克成都。師還。成都復為

宋所有。其時志在虜掠。得地不成故。明年。按竺邈言於末哥曰。隴右甫平。人心猶懷

反側。西漢陽當隴蜀之衝。宋及吐蕃利於入寇。宜得良將鎮之。末

哥曰善。然無以易汝。遂分蒙兀漢軍千戶官五人。帥所屬隸麾下

以往。按竺邈命侯和尚南戍沔之石門。此人必是漢軍千戶。故上文補漢軍二字。朮魯西戍

階之兩水。關名。謹斥堠。嚴巡邏。邊境帖然。敵莫敢犯。戊戌。從都元帥

塔海紺孛復伐蜀。克隆慶。明年。進攻重慶。又明年。圍萬州。宋舟師

數百艘。遡流來援。按竺邈帥勁卒乘筏。浮艸薦於其間。防兩筏前後相撞也。舊作草舟。

不順流。雨射敵卻退。追過夔門。辛丑。轉攻西川。連下二十餘城。成

都守將田顯開北門納師。其制置使陳隆之遁。追獲之。縛至漢州。

令誘降守將王夔。隆之不肯。夔亦不降。進軍攻之。夔夜驅火牛突

圍走。遂斬隆之。宋史隆之本傳與此異。壬寅。乃蠻真可敦稱制之元年。從大軍攻拔遂寧瀘敘

等州癸卯破資州會古余克汗俎幹亦刺可敦攝政新君未定大

軍無意進取而陝西不靖庚戌幹亦刺可敦稱制之二年按竺邇奉諸王命還軍

安輯涇邠二州宋制置使余玠乘閒攻興元時守興元者為夾谷恚古帶龍州降將

王德新龍州舊傳誤作文州據憲宗紀汪德臣傳改亦自階州叛執扈牛二鎮將帥眾走江油

明年蒙格汗即位有旨召按竺邇還鎮西漢陽按竺邇遣別將直

擣江油奪扈牛二將以歸中統元年忽必烈汗即位親王阿里不

哥亦稱號於和林西前朝大將渾都海謀以關隴應之其黨阿藍

荅兒自和林來援合軍刪丹之焉支山汗遣宗王合丹不者克阿

曷馬西討阿曷馬世系不詳時按竺邇年老已委軍事於其子慨然曰今內

難方殷非臣子安卧之日吾雖老尚勝鞍馬遂親帥其子引兵出

刪丹之耀碑谷從阿曷馬與敵戰是日大風晝晦至晡大破之阿

藍荅兒自殺渾都海遁入吐蕃捷聞璽書褒美賜弓矢錦衣四年

卒年六十有九延祐元年贈推忠佐運功臣太保儀同三司上柱

國追封秦國公諡武宣子十人徹理國寶國安最知名徹理常從

父軍中

舊傳育丁已從父攻瀘州降宋將劉整十二字按整本傳及世祖紀整以中統二年辛酉降而云丁已者必訛也

宋將姚德辟雲頂山

歲戊午大軍圍之徹里帥所部由水門先登破其壁德降又從攻

重慶徹里將千人為前鋒渡馬湖江破宋兵於馬老山諸軍還屯

灰山宋兵夜劫營復為徹里所敗斬首三百級中統初賜金符為

奧魯元帥尋命襲父職征行元帥至元二年膺廢疾不任事

步魯合答舊傳

謂車里以謂老疾不任事非是其父按竺邇中統四年卒年六十九則至元二年徹里未老可知

命子步魯合答代領其軍

舊史步魯合答傳誤

稱弘吉刺氏祖按主奴即按竺邇父車里即徹理因氏族之誤幾不知即按竺邇之孫

至元八年授步魯合答管軍千戶佩

金符宋嘉定守將咎萬壽襲成都僉省嚴忠範遣步魯合答將七

百人禦之沙坎流矢中右頰而敗

舊傳云拔矢戰愈力大敗之果如所云成都外城不陷矣此亦誤據諛墓之文

十一年

行院汪惟正圍嘉定步魯合答帥所部別攻雲頂山寨破之嘉定

遂降進攻重慶宋分兵突圍出據銅鑼峽行院忽敦遣步魯合答

襲之至廣羊壩斬馘二百瀘州叛還軍討之步魯合答分攻寶子

寨歲餘不下造雲梯以登始拔而屠之十六年合州下全蜀平論

前後功授武略將軍征行元帥

中統時已襲征行元帥何以是年復授必因沙坎之敗嘗奪職故

二十一年命

統蒙兀探馬赤軍千人。從征金齒。平之都元帥蒙古互征。羅必甸。步魯合荅帥游騎為前鋒。直江漲。泗水而渡。去城三百步而營。七日。後諸軍始傅城。會攻之。步魯合荅先登。既拔屠之。又從征八百媳婦。至徹里。徹里者其酋長所居也。徹里之名甚古。見伊尹四方獻令於文作產里。諸王闊闊命

步魯合荅將游騎三百往招之。不聽。進兵攻之都鎮。撫侯正死焉。步魯合荅破北門木柵入。遂平之。換佩虎符。進懷遠大將軍雲南萬戶府荅魯合臣卒。子忙古不花襲管軍千戶。國寶小字黑子

從步魯合荅傳文按竺邇趙世延舊傳作黑梓

自少倜儻有謀略。常參按竺邇軍事。中統初。從討

阿藍荅兒有功。阿藍荅兒既敗。死。渾都海遁據吐蕃點西嶺。

舊傳前稱獲阿

藍荅兒渾都海此處又稱阿藍荅兒叛將火都據吐蕃之點西嶺儼若渾都海火都為兩人實則火都即渾都之異譯而脫海字一音耳特改正而辨明之

國寶以父年老兒

徹里病。乃身攝元帥事。追討之。眾欲速戰。國寶曰。此窮寇也。宜少

緩。以計破之。渾都海欲西竄。國寶要之於險。挑戰。則斂兵自固。相

持兩月。敵懈。潛師出不意。禽之。捷聞。賜弓矢金綺。初吐蕃酋勘陀

孟迦雖降。而非心服。至是國寶與諸弟謀。遣部將謝鼎持金幣往

說之。從已入朝。國寶奏言。文州山川險阨。文州以文山得名。亦曰汝山。實即馬寶導江之岷山也。控庸蜀。

拒吐蕃。宜相地立城。屯兵鎮之。忽必烈汗以為然。即授國寶三品

印。為蒙兀漢軍元帥。兼文州吐蕃。答魯合臣。與勘陀孟迦。並賜金

符。時扶州諸羌未附。國寶宣上威德。於是阿哩禪波哩揭諸酋皆

向化。國寶從以入覲。圖上山川形勢。詔授阿哩禪波哩揭為萬戶。

賜金虎符。餘酋為千戶。並賜金符。別賜國寶金帛。國寶治文州有

聲。地理志。禮店文州。蒙兀漢兒軍民元帥府。原注闕據此。傳觀之。此府即置於中統。至元間。首為元帥者國寶也。至元四年卒。朝廷論國寶

安邊功。換佩金虎符。階昭勇大將軍。命下而國寶已死矣。延祐元

年。贈推誠佐理功臣。光祿大夫。平章政事。柱國。追封梁國公。諡忠

定。子世榮。世延。俱以趙為氏。世榮一名那懷。襲父職元帥。兼文州

萬戶府。答魯合臣。佩虎符。階懷遠大將軍。以功進安遠大將軍。吐

蕃宣慰使。議事都元帥。換佩三珠虎符。世延自有傳。國安。小字

阿八赤。國寶將卒。以子世榮幼。遺疏請以國安襲其職。朝廷從之。至元十五年。討叛王禿魯於六盤山。禿魯見世系表。南平王也。舊傳此處作吐魯。獲之。尋以世

榮年已長請解職回授之忽必烈汗嘉之曰人爭而汝讓可以敦

薄俗錄其六盤功別授招討使附階昭毅大將軍應佩其兄原降金符而舊傳略後進

隨州拔都萬戶有月舉連赤海牙者畏兀兒人從蒙格汗攻合

州會時暑軍中疫起奉命修麴藥療之賞白金五十兩又從諸王

蒙哥都舊作太子滿哥都改從世系表征雲南戰數有功中統元年舊傳三年誤渾都海暨阿

藍答兒之亂舊作火都暨答離叛火都即渾都海之謫省答離即阿藍答兒之謫脫以年分既差幾使人不知答離為何人也領兵與按竺

邇汪良臣從諸王討平之渾都海就禽已入中統二年至元十二年佩虎符為隴右

河西道提刑按察使兀良孩火石顏謀為亂兀良孩舊傳誤作元朗孫從皇子安西

王忙哥刺往平之賜白金五十兩十五年又從蒙兀都元帥別速

帶舊作伯速帶改從汪良臣傳譯交按別速帶為蒙兀氏族之一此人以氏為名平秃魯之亂於六盤山南平王秃魯禾忽大王之子古余克

汗之孫舊作土魯皇子復賜衣帶金碗且以其功間十七年授階嘉議大夫

職如故二十年進中奉大夫拜四川等處行中書省參知政事尋

辭疾歸秦州大德八年卒至順中贈推忠宣力定遠功臣資善大

夫陝西行省左丞護軍追封威寧郡公謚襄靖子只兒哈郎事和

世疎汗於潛邸官至也客札魯忽赤爲圖帖睦爾汗所殺委懽帖

睦爾汗朝贈太傅追封威寧王諡襄愍說詳氏族表

奧屯世英字伯豪小字大哥本女真種人其先居金上京胡里改

路今吉林三姓地遠祖黑風佐金太祖開國有功封王子孫內徙關中占籍

蒲城父閔生新平縣令世英以蔭補官監郃水酒稅累遷征行都

統領軍蒙兀入關帥衆降以材武爲成吉思所知賜金符碑原誤作虎符隸

蒙兀大將朵豁勒忽徹里必磨下原作朵火魯虎徹立俄秘史校正歲庚寅從圍慶陽

戰於大昌原爲金將陳和尚所敗朵豁勒忽以失律誅是年秋幹

歌互汗車駕親征陝西世英在行間與札古帶偕至富平主帥命

諸將分下各州縣世英欲得蒲城從之至城下說以禍福城民相

帥出降世英復從大軍攻鄜州辛卯春從破鳳翔時右軍欲假道

於宋自隴州入鳳州取武休關至興元還攻西和又攻鞏州再入

宋境從皇弟拖雷由興元歷金洋均鄧諸州大破金師於鈞州三

峰山金亡奉命鎮守河中招降天和人和二堡前車駕在鳳翔許

世英以河中府尹會軍事方殷未果及是入覲幹歌互汗慰諭之

曰曩者所許今可相付矣世英對曰臣名在四大王府四大王拖雷也今改

屬別部河中不隸拖雷何面目見唐妃母子唐妃拖雷妃客列亦氏莎兒合黑塔泥也相傳客列亦氏為李唐外族故云然汗始

怒既而喜曰汝言是也莎兒合黑塔泥可敦聞其言以為忠信任

有加歲辛丑河中船橋萬戶以事誣世英奪金符原亦誤作虎符可敦言於

幹歌互汗復昇之旋授軍民萬戶便宜行事改賜金虎符足證前者虎符之誤

卒年六十有二追贈嘉議大夫奉元侯世英性至孝大昌原之賤

家屬陷敵世英狼狽北歸每夜焚香祝天願得生遇父母寢不安

枕淚漬茵席幹歌互汗聞之大軍下河南令於軍曰得大哥父母

者生致之毋使驚怖及攻拔許州有唱者曰奧屯將軍家屬在此

世英馳往視之則闔門百口無恙人以為孝感所致云二子貞亮

貞字正卿年十三而孤蒙格汗召見之詔曰奧屯世英早埶成

吉思皇帝慶陽之役我師失利叛者如蟻而世英棄父母捐妻子

東身來歸幹歌互汗嘉之以有昔授今命其子貞襲萬戶佩金虎

符毋忽。貞若不奉約束，辜死。浸入其室，貞從攻重慶嘉定諸路，俱有功。忽必烈汗即位，貞入覲，賜黃白金錦衣。至元十三年，拜南陽府尹，階明威將軍，累遷廣南西道宣慰使，改蓬州路總管，轉順慶嘉定兩路。所至有惠政。卒年六十七。子金剛奴，金齒大理道宣慰副使。僉都元帥府事。銀剛奴，錦州判官。別有奧屯世英，與大哥

同氏名，亦女真人。先世仕金為淄州判官，遂家焉。歲癸酉，成吉思

兵下山東，州民奉世英及其弟保和迎降。即命世英知本州事。據

兀軍前事例如此，舊傳謬稱皆授萬戶，殊不知成吉思時漢人無授萬戶者。尋遷德興府尹。時金經略使苗道潤帥

眾規復山西，世英與戰克之，將盡殺所俘，其母責之曰：汝華族也，

畏死而降，此卒伍爾，驅之使戰，何忍殺之耶？遂止。世英從數騎按

部定襄，被襲死。保和由行軍千戶。舊傳妄稱由萬戶。進拜德興府元帥，賜金

符，改雄州總管，尋以元帥領真定保定順德諸道農事，凡闢田二

十餘萬畝，改真定路勸農事，兼領諸署。例如諸色人匠顏料絲綫等署。真定拖雷妃莎

兒合黑塔泥可敦分地也，可敦賜保和居第，戎器裘馬，給戶食其

租年五十有六。致仕。保和四子。希愷。希元。希魯。希尹。希愷。襲勸農事。可敦賜以錦衣。曰。無墜汝業。本路水旱。必力請蠲租。調民賴之。南征時。置倉汴衛。歲輸河北諸路粟以實之。分冬月三限。失終限者。死。吏徵斂。舞法。民甚苦之。希愷知而革其弊。民以不擾。尋兼知冀州事。蒙兀軍侵占民田牧馬。希愷悉奪歸原戶。至元二年。遷順天治中。三月。改順德。又踰月。陞知河中府事。秩滿歸調。時阿合馬專政。官以賄成。希愷不納賄。降武德將軍。知景州。數月卒。希元。彰德漕運使。希魯。澧州路總管。希尹。善騎射。李壇叛。據濟南。丞相史天澤奉命督師討之。希尹謁丞相。請奮機充真定路行軍千戶。與賊戰。矢無虛發。諸王不者克。賞銀五十兩。事平。樞密錄其功。自右衛。經歷六遷。至同知廣東道宣慰司事。卒。

舊傳樞密錄其功。上有至元十一年。五字。按中統三年軍功。必不至至元。

十一年追錄。且廣東之平。事在至元十一年。當由明史臣節錄諛墓之文致誤。

論曰。昔里鈐部。從征絕域。力拔名城。解甲臨民。復勝煩劇。按竺邇。廛戰隴右。威服戎羌。假道漠南。妙擅辭令。竝色目中。兼資文武。才

也。愛魯通道。滇夜郎國寶。創文州元帥府。可謂將門有將矣。奧屯
世英。女真貴族。歸命蒙兀。甘伏藩邸。足徵當時奴制出入之嚴焉。

昔里鈐部按竺邇等列傳第二十九

蒙兀兒史記卷第四十七

耶律楚材客列亦鎮海粘合重山列傳第三十

蒙兀兒史記卷第四十八

武進屠寄纂

耶律楚材。字晉卿。遼東丹王突欲八世孫。

畿輔通志云王子叟國為燕京留守遂居燕

金尙書

右丞履之子也。履年六十生楚材。

金明昌元年六月二十日生

以數推之。曰是兒他

日必成偉器。然當為異國用。因取左氏楚材。晉用語製名字。生三

歲而孤。母楊氏善誨育。稍長。知力學。年十七。博極羣書。能文章。金

制宰相子得試補省掾。楚材不就。章宗召試之。則中甲科。考滿。授

開州同知。貞祐二年。宣宗遷汴。丞相完顏承暉留守燕京。行尙書

省事。辟為左右司員外郎。成吉思克燕。求遼宗室。得楚材。召見。行

在。楚材身長八尺。修髯過腹。聲如洪鐘。汗偉之。曰。遼金世讐。朕已

為汝雪之矣。對曰。臣祖父以來。皆嘗北面事之。既為臣子。敢讐君

父耶。汗重其言。置左右以備咨訪。常呼為吾圖撒合里而不名。吾

圖撒合里。蒙兀語長髯人也。已卯。從駕征西域。禡牙額兒的失水

上。是日雨雪三尺。汗惡之。楚材曰：盛夏見肅殺氣，克敵之象也。庚

辰冬大雪。汗在忒百迷。以問楚材。對曰：莎兒壇當死於野。莎兒壇見蒙文祕史

勞解王其實西域帝稱也西遊錄梭里壇是冬十二月。花刺子模國主阿刺哀丁謨罕默德

果竄死寬田吉思海島。夏人常八斤者。以善治弓。見知。自詫於楚

材。曰：本朝尚武。而公欲以文進。不亦左乎。楚材曰：如汝言。治弓且

須弓匠。為天下者。可不用治天下匠耶。汗聞。日嚮用之。國初未有

麻。西域人奏五月望夜月當蝕。楚材曰：否。燕居叢談云庚辰歲楚材在尋斯千城當五月望以大明麻推之太

陰當虧三分。食甚于正時在宵中。是夜候之。未盡初更。而月已蝕。蓋大明之子正。中國之子正也。西域之未盡初更時。豈知不為中國之子正乎。此唐一行有里差之說。謂千里互差一時者。是也。

說與本傳異。宋子貞中書令即律公神道碑云。嘗言西域麻五星密於中國。乃作麻荅把麻蓋回鶻麻名也。又以日食曠度與中國不同。以大明麻浸差故也。乃定文獻公所著乙未元麻行於世。

寄按湛然居士集有進庚午元麻表。據碑則此麻始即本於乙未元麻。明年。楚材奏。十月月當蝕。西域人言不

蝕。至期。果蝕八分。汗曰：人閒事。汝固應知。天上事。亦無不知耶。壬

午八月。長星見西方。金史宣宗紀元光元年八月。已卯。慧星見西。方。月分與舊傳符。而神道碑作五月。殊誤。楚材曰：女真將

易主矣。明年。金宣宗果殂。於是汗每出師。必命楚材預卜吉凶。汗

亦自灼羊髀骨。用相參驗。舊傳此下有甲申帝至東印度駐鐵門關有一角獸形如鹿而馬尾其色綠作人言謂侍衛者曰汝主宜早還帝以

問楚材對曰。此瑞獸也。其名角端。能言四方語。好生惡殺。此天降符以告陛下。陛下天之子。天子下之人。皆陛下之子。願承天心。以全民命。帝即日班師。舊紀甲申年亦載之。皆為宋子貞神道碑所誤。按西遊記。太祖以壬午十月朔行在邪米斯干。下詔班師。十二月。至霍闐。沒輦。癸未正月十一日。自霍闐東行。甲申夏已回。至額兒的失水。避暑矣。而舊傳云。甲申至東印度。則年分之誤。不足信者一。鐵門關在撒馬兒罕西南。阿母河北岸。地屬唐之史國。金末屬花刺子模。非東印度。此地理之誤。不足信者二。印度犀牛產於瀕海。藪澤鐵門關。雖近阿母河。其地不產犀牛。此動物生理學之誤。不足信者三。故於本紀中已毅然削去。而辨正於此。陶九成輟耕錄亦記此事。稱見於西印度。亦誤。

西夏丙戌冬。大軍下靈州。諸將爭取子女金帛。楚材獨收遺書數

籠。大黃兩馱。既而士卒病疫。得大黃輒瘥。所活以萬數。石抹咸得

不。太保明安子也。襲父職燕京留守。自恃世勳。恣為貪暴。其下化

之。燕於是乎多盜。未夕曳牛車。指富家劫取財物。不與則殺之。有

司不能禁。時拖雷監國。聞之。命楚材偕豁兒赤塔察兒馳傳按問。

至則廉得其姓名。皆畱後親族及勢家子。分捕下獄。其家百方行

賂乞免。塔察兒惑之。欲為覆奏。楚材執不可。曰。咫尺信安未下。

尚為金不窮治此輩。將致大亂。遂刑十有六人於市。燕民始安。已丑

守信安秋。斡歌互汗將即位。宗親會議久不決。時察阿互為汗親兄。拖雷

親弟。楚材言於拖雷。曰。此宗社大計。不宜猶豫。拖雷曰。事猶未集。

別擇日可乎。楚材曰：過是無良日矣。遂定冊立儀制。謂察阿互曰：

王雖兄位，則臣也。禮當拜。王拜，則莫敢不拜。王深然之。比即位，王

帥皇族及臣僚拜帳殿下。既退，王撫楚材曰：真社稷臣也。蒙兀尊

屬行拜禮自此始。諸國來朝者，多以後期當死。楚材言：上新即位，

願無污白道子。碑云國俗尚白，以白為吉故也。從之。河北新附，民多誤觸禁網，而國法

無赦命。楚材因登極禮成，請推恩肆赦。遂頒庚寅正月朔前事，勿

問之詔。且條上便宜十有八事，十七皆見納。汗謂唯臣下貢獻一

事，其自願者宜聽，勿禁。楚材曰：蠹害之端，必由於此。汗曰：凡卿所

奏，無不從者。卿不能從我，一事耶。時法制未定，號令不一。所在長

吏生殺予奪，自專。又彼州此郡，動輒興兵相攻。楚材奏請一切禁

止之。自成吉思莫年，歲有事西域，未暇經理中原。官吏聚斂，自私

資至鉅萬，而倉庫無斗粟尺帛之儲。近臣別的因等僉言：別的因乃蠻人，古出

廣畜牧。楚材曰：陛下將南伐，軍需宜有所資。誠均定地稅商稅酒

魯克之曾孫，給事二皇后宮庭，故曰近臣。舊史自有傳，此傳及碑作別迭。

醋鹽鐵山澤之利。歲可得銀五十萬兩。絹八萬四。粟四十餘萬石。足以供給。何爲無用。汗曰。卿試爲我行之。乃立十路徵收課稅所。使副悉用儒者。參佐則省部舊人。辛卯。駕幸雲中。十路上計行在。課額銀幣及倉穀簿籍具陳於前。悉符元奏之數。汗笑謂楚材曰。卿不忝朕左右。而能使錢穀流入如此。不審南國復有卿比者否。對曰。在彼者多賢於臣。臣不才。故留燕。爲陛下用耳。汗親酌大觴。賜之。卽日立中書省。拜楚材爲令。竝用其薦。以客列亦鎮海爲右丞相。粘合重山左丞相。總內外之政。宣德元帥太傅耶律禿花失陷官糧萬餘石。恃其勳舊。密奏求免。汗問中書知否。對曰。不知。汗取鳴鏑擬射之者。再良久。叱出使白中書償之。仍敕今後凡事先白中書。然後奏聞。先是諸路長吏兼領軍民錢穀。威權無限。往往恣爲不汰。奏使長吏專理民事。萬戶府總軍政。課稅所掌錢穀。彼此不相統攝。遂爲定制。奸弊無所容。及是政事無鉅細。一出中書。權貴不能平。咸得不以前憾。故尤嫉之。因激怒皇叔斡赤斤國王。

舊傳但稱宗王碑稱皇叔按太宗時太祖之弟現在者惟翰赤斤

專使來奏謂耶律中書令率用親舊必有二

心不宜重任且以國家所忌誣構百端必欲置之死地汗察其罔

怒斥來使不數月適有人以事訐咸得不者汗特命楚材鞫之奏

言此人倨傲無禮狎近小人故易速誘今方有事南土佗日治之

未晚汗私謂侍臣曰君子也汝曹當倣之中貴可思不花

碑作苦木思不花

奏撥戶一萬以供采鍊金銀栽種葡萄之役汗許以西京宣德兩

路戶內選充之楚材曰成吉思有言山後百姓樸勇無異國人兵

賦所出緩急得用不若貸河南殘民以死俾充此役且可實山後

之地汗曰卿言是也壬辰春汗南征將涉河詔陝洛商虢等州山

林逃匿之民迎軍來降者免死或謂此輩急則來附緩則復走徒

資敵耳楚材奏給旗數百面令持散歸已降之郡所活無算舊令

兵鋒所至敵以一矢石相加者卽爲拒命殺無赦汴京垂陷都元

帥速別額合遣人來報且言此城抗拒日久我軍死傷多意欲盡

屠之楚材馳入奏曰將士暴露數十年所爭者土地人民耳得地

無民將焉用之。汴疑未洩，復奏言技巧之匠厚藏之家，皆萃此城中。殺之則無所獲，是徒勞也。乃詔舉止完顏氏一族，餘皆原免。時避兵在汴者百四十七萬人，命仍奏選儒釋道醫卜工匠之徒散居河北，官爲給贍。其後攻取淮漢諸城，因以爲例。先汴京未下，卽奏遣使入城求孔子後，得五十一代孫元措，襲封衍聖公。付以林廟地，令收拾前朝散亾禮樂，及召名儒梁陟、王萬慶、趙著等，使直釋九經，進講諸皇子。且令大臣子弟執經問義，置編修所於燕京。經籍所於平陽，以開文治。時河南初破，俘獲甚多，比大軍還，逃亾者什七八。有詔停畱及資給飲食之者，皆死。無問城郭保社一家犯禁，餘竝連坐。由是百姓惶駭。雖父兄弟一經俘獲，不敢正視。逃民無所食宿，殍死道路相望。楚材閔之，從容進說曰：「十餘年間，存撫百姓，以其有用故也。若南北勝負未分，慮涉攜貳，或當禁其往來。今敵國已破，河南之民皆朝廷赤子，走復何之？奈何以一俘囚連死數十百人乎？」汴悟，命除其禁。時金已亾，惟秦鞏二十餘州。

連歲不下。楚材言。往年吾民逃。臯金國者。或萃於此。故以死拒戰。若許以不殺。將不攻自下矣。詔下。諸城果降。期月之內。山外悉平。

甲午。詔籍中原民戶。以大臣失吉刊。忽禿忽領其事。國初銳意進取。所降下者。因以與之。自一社一民。各有所主。不相統屬。至是始

隸州縣。朝議仿蒙兀西域法。以丁為戶。楚材曰。不可。自古有中原者。未嘗以丁為戶。若果行之。恐一年之後。丁逃而賦無所出。爭之

再三。卒以戶定。時諸王大臣及諸將校所得驅口。往往寄留他郡。其數幾居土箸之半。楚材因奏括戶口。並出為編民。占匿者死。乙

未。朝議四征不庭。是歲命巴禿等征之。下察兀諸部。唐古征高麗。閩端。閩出口。溫不花等分兵三道伐宋。謂若遣撒兒塔

兀勒人征江南。漢人征西域。深得制御之計。楚材曰。不然。漢地西域。相去數萬里。比至敵境。人馬疲乏。不堪為用。且水土異宜。必生

疾疫。不若就近徵發為便。初成吉思晚年。嘗指楚材謂斡歌互汗曰。此人天賜我家。爾後軍國庶政當悉委之。及丙申正月。會諸王

賈臣。宴萬安宮。落成。汗親執觴。賜楚材曰。朕推誠任卿。成吉思額

赤格之命也。非卿則國家無今日。朕得安枕而臥者，卿之力也。西域諸國及宋高麗使來朝者，輒自矜其國所有，語多不實。汗指楚材示之，曰：汝國有此人否？皆謝曰：無有。殆神人也。汗曰：汝等唯此言不妄。朕亦度必無此人。有于元者，奏行交鈔。楚材曰：金章宗時，初造交鈔，與錢通行。其後有司以出鈔爲利，收鈔爲諱，謂之老鈔。至以萬貫易一餅，民力困而國用亦匱。當爲鑑戒。今印造交鈔，宜毋過萬定。從之。秋七月，忽禿忽以戶籍至。汗議裂州縣賜親戚勳。舊楚材曰：裂土恐致尾大，分民將肆侵漁。二者俱弊，不如多與金帛。汗曰：已許奈何？對曰：然則朝廷置吏收其賦，歲終頒之，不使擅自徵斂，猶之可也。是歲始定賦稅鹽法。楚材主之事，詳本紀。議者以爲太輕。楚材曰：作泐於涼，其弊猶奢。後將日加，今則已重矣。國初盜賊充斥，商賈不行，則下令凡有失盜處，周歲不獲正賊者，令本路民戶代償。前後積累，動以鉅萬計。及所在官吏取借西域賈胡債銀，年息倍之。次年則并息又倍之。謂之羊羔兒利。積而不

已往往破家析族。至以妻子爲質。然終不能償。楚材爲請。悉以官銀代還。凡七萬六千定。仍奏定今後不以歲月遠近。子本相侔。受不生息。侍臣脫歡奏。選室女。敕中書省發詔行之。楚材持之不下。汗怒。楚材進曰。向所刷室女二十八人。尙在燕京。足備後宮使令。今復選刷。臣恐擾民。欲覆奏耳。汗良久曰。可遂罷之。又欲括漢地牝馬。楚材曰。漢地所有。繭絲五穀耳。本非產馬處。行之後必爲例。事乃已。丁酉。沙汰僧道。試經通者給牒受戒。許居寺觀。楚材以僧道中避役者多。故有此請。始諸王貴戚皆得自起驛馬。而使臣猥多。馬悉倒乏。則豪奪民馬乘之。城郭通路。經過騷動。及其到館。要索百端。供饋稍緩。輒被箠撻。館人不能堪。楚材奏給牌劄。仍定飲食分例。其弊始革。有二道士爭長。各立黨與。其一誣其讐之黨爲逃軍。結中貴及通事楊惟中執而殺之。楊惟中舊傳云奉命使西域二十餘國故當時有通事之目楚材按收惟中。中貴復愬楚材違制。汗怒。繫楚材。旣而自悔。命釋之。楚材不冑解縛。曰。臣備位中書。國政所屬。陛下初令繫臣。以有辜也。

當明示百官。今釋臣是無辜也。豈可輕易反覆如戲小兒。國有大

事。何以行焉。眾皆失色。汗溫言尉之曰。朕一日萬幾。寧無過舉。今

後。汰令有不便者。卿其悉以告朕。楚材乃頓首謝。因陳時務十策。

曰。信賞罰。正名分。給奉祿。官功臣。寫碑作封考殿最。均科差。碑作定物力選工匠。

選禱作太務農桑。定土貢。制漕運。碑作置水運汗雖不能盡行。亦時擇用焉。先是

楚材於汗前時時誦說周孔之教。且言天下雖得之馬上。不可以

馬上治。制器者必用良工。守成者必用儒臣。儒臣之事業。非積數

十年不能成也。故奏用陳時可等為十路課稅所官。又請分經義

詞賦策論為三科。遣使隨郡考試儒士。中選者復其家。且除本貫

議事官。及是太原路課稅使呂振副使劉子振以贓抵辜。課稅使碑作轉運使

汗責楚材曰。卿言孔子之教可行。儒者為好人。何故乃有此輩。對

曰。君父教臣子。使不陷於不義。而不義者亦時有之。三綱五常。聖

人之名教。有國家者莫不由之。如天之有日月也。豈得因一夫之

失。使萬世常行之道。獨見棄於我朝乎。汗意乃釋。初籍中原戶得

百有四萬逐年逃亾者什四五而賦仍舊民病之戊戌楚材奏除逃戶三十五萬民乃蘇燕京有劉忽篤馬者陰結權貴以銀五十

萬兩撲買內地差發涉獵發丁者名似西域人以二十五萬兩撲買舉國

係官廊房地基水利豬雞劉廷玉者以五萬兩撲買燕京酒課又

有西域人以百萬兩撲買舉國鹽課至有撲買舉國河泊橋梁渡

口者大學衍義補曰撲買之名起於宋開寶三年謂通計應得稅錢任辦此數先輸之官而聽其取贏於民也楚材曰此皆姦人捐一

償十使怒歸於上利歸於下咸奏罷之嘗曰興一利不如除一害

生一事不如省一事任尙以班超之言平平耳然千載而下自有

定論楚材自庚寅定課稅所額歲徵銀萬定即率及甲午下河南括

戶口增至二萬二千定而西域譯史安天合者至自汴梁傾身事

楚材以求進用楚材雖獎借之終不能滿其望即轉而諂附鎮海

百計行閒首引奧都刺合蠻撲買課稅驟增至四萬四千定楚材

曰多取何難不過嚴設法禁陰奪民利耳民窮為盜非國之福而

近侍左右多為所陷汗亦惑於眾議欲令試行楚材反覆爭論至

聲色俱厲。汗曰：汝欲搏鬪耶？楚材力不能止，乃太息曰：民之困窮，將自此始。於是政出多門矣。楚材正色立朝，志不稍屈，欲以身殉國。每遇軍國利病，民生休戚，仍辭意懇切，孜孜不已。汗曰：汝又欲爲百姓哭耶？然待楚材加重。一日，楚材與諸王宴，醉臥車中。汗臨平野，望見之，直造其營，登車手撼之。楚材孰睡未醒，方怒其擾已，忽開目視，始知汗至，驚起謝。汗曰：有酒獨醉，不與朕同樂耶？笑而去。楚材不及冠帶，馳詣行宮。汗爲置酒，極歡而罷。汗素嗜酒，晚年尤甚。日與諸大臣酣飲。楚材數諫不聽，乃持酒槽之金口進，曰：鐵爲酒所蝕，尙致如此，況人之五藏乎？汗說，賜之金帛。語左右曰：汝曹愛君憂國之心，有如吾圖撒合里者乎？赦後日進酒三鐘而止。辛丑二月三日，汗疾篤，醫言脈已絕，乃蠻真可敦不知所以，召楚材問。楚材曰：古人一言而善，災滅退舍，今囚繫非辜者多，請肆赦，可敦卽欲行之。楚材曰：非君命不可。俄頃，汗少蘇，可敦以爲請。汗已不能言，首肯之。赦發，脈復生。冬十一月，汗勿藥已久，將出獵。楚

材以太乙數推之。謂爲不宜。左右皆曰。不騎射。無以爲樂。獵五日而殂。乃蠻真可敦稱制之二年癸卯。議立儲嗣。可敦問楚材。對曰。此非外姓臣所敢知。自有先可汗遺詔在。遵而行之。社稷幸甚。楚材意蓋指皇孫失烈門也。然可敦以失烈門之父。闕出非已出。欲立古余克汗。竟不聽。夏五月。熒惑犯房。楚材奏言。當小有驚擾。居無何。東道宗王斡赤斤忽舉兵向和林。可敦欲西遷以避之。楚材言。朝廷天下根本。根本一搖。天下將亂。臣觀天道。無大患也。後數日事解。語詳本紀。可敦專任奧都刺合蠻理財政。至付以御寶空名紙。令從意書填。楚材奏言。朝廷自有典章。臣不敢奉詔。尋復有旨。奧都刺合蠻奏準事理。令史若不書填。則斷其手。楚材曰。軍國之事。先可汗悉委老臣。令史何與焉。事若合理。自是遵行。否則死且不避。況截手乎。因厲聲曰。老臣事成吉思可汗及先可汗三十年。無負於國。可敦亦不能無辜殺臣。可敦雖憾其忤已。亦以先朝舊勳。曲加敬憚焉。然楚材因是憤懣。甲辰夏五月十四日。薨於位。

年五十有五。和林爲之罷市。不舉樂者累日。遠近士大夫聞者。莫不涕泣相弔。楚材當國時。得祿分其親族。未嘗私以官爵。行省劉敏從容以爲言。楚材曰。金帛資給。足以樂生。若使從政違法。吾不能徇私恩也。後有譖之者。謂楚材在相位久。天下貢賦半入其家。

可敦命近侍麻里札覆視之。惟琴十餘張。古今書畫金石遺文數千卷而已。至順元年。贈經國議制寅亮佐運功臣。太師上柱國。追

封懿寧王。舊傳作廣寧王。按廣寧爲別勒古台孫。不都封號。不宜復以此號封異姓功臣。今據耶律鑄附傳作懿寧王。即懿州廣寧府也。考食貨志。曳刺兀圖。徹罕里分撥。歲賜五

戶絲在大都等處。而封號願稱懿寧者。因楚材八世祖東丹王突欲。故封地在此。而名之。且非實封也。諡文正子鉉。碑云。先娶梁氏。以兵亂隔絕。張於河南之方城。生子

鉉。監開鑄。碑云。涿水國夫人蘇氏。東坡先生四世孫。威州刺史公弼之女。生子鑄。鑄字成仲。幼聰敏。善屬文。尤

工騎射。楚材薨。嗣領中書省事。時年二十三。上言言宜。疏禁網。且

采歷代德政。合於時宜者。八十一章。以進。歲戊午。領侍衛軍。從駕

伐蜀。以帷幄功。賜尙方金鎖甲。及內廐驄馬。明年。蒙格汗殂於合

州。鑄歸陝右。中統元年。阿里不哥稱號漠北。六盤守將渾都海欲

舉兵應之。鑄說渾都海入朝。忽必烈汗不從。則棄妻子挺身東歸。

舉兵應之。鑄說渾都海入朝。忽必烈汗不從。則棄妻子挺身東歸。

汗即召見，賞賜優厚。明年拜中書左丞相，監修遼金史。其冬奉詔徵兵北邊，從駕敗阿里不哥於昔木土。至元元年，加光祿大夫，奏定法令三十七章，吏民便之。二年，行省山東，遷調所部官屬，尋徵還。先是清廟雅樂止有登歌，詔鑄製宮縣八佾之舞。四年春三月，樂舞成，表上之，賜名大成。六月，改榮祿大夫平章政事。五年，復拜左丞相。十年，罷為平章軍國重事。十三年，監修國史。明年，雨雪愆期，汗使問便民事，上言申酒禁，並罷止祈神賽社，以節浮費。十九年，復拜左丞相，奏言有司以采室女乘機害民，請自今大郡歲取三人，小郡二人，擇可留者，厚賜其父母，否則遣還，庶不致大擾。二十年冬十月，坐不納職印，妄奏東平人聚謀為逆，閒謀幕僚及黨，擧囚阿里沙，罷免，乃沒入家資之半，徙居山後。後二年卒，年六十五。至順元年，贈推忠保德宣力佐治功臣，諡文忠，官爵如其父。

子十一人，第三子希亮最知名。長希徵，次希勃，四希寬，五希懔，六希周，七希光，八希逸，九希逸，淮東宣慰使，餘失名。

希亮字明甫，母赤帖吉氏，奉乃蠻真可敦命歸鑄，生希亮於和林南。

之涼樓曰禿忽思

蒙兀語涼曰禿忽思

可敦遂以其地名之。後鑄承蒙格汗命

覈錢糧於燕。瀕行請曰。臣先世業儒。儒生多在中土。願攜諸子往

就學。許之。比至燕。令希亮師事北平趙衍。時方九歲。未浹旬。已能

賦詩。及鑄事竣北還。希亮獨畱燕。歲戊午。車駕駐六盤。希亮詣行

在所。隨父扈從伐蜀。及汗殂。希亮將輜重歸陝右。鑄之東走也。渾

都海遣百騎追之。勿及。則使人監視希亮母子。脅之從軍。自靈武

過應吉里城。至西涼甘州。阿里不哥遣阿藍荅兒自和林帥師至

焉支山

山在今刪丹縣東南百二十里

援渾都海。見希亮。問而父安在。荅曰。不知。與吾父

共事者。宜知之。渾都海怒。詬曰。我焉得知之。若父今亡。命東見忽

必烈汗矣。希亮曰。若然。則何爲不知。阿藍荅兒孰視渾都海。曰。此

言深有意。詰希亮益厲。希亮曰。使吾知之。亦從而去。安得獨畱。阿

藍荅兒以爲實。免其監視。及二將爲王師所敗。死。殘卒北走。推別

將哈刺不花爲帥。希亮潛匿甘州北黑水東沙陀中。殿兵已過十

餘里矣。會有求失馬者至。老婢漏言。遂被驅至肅州。哈刺不花與

鑄有婚姻之好。又前在蜀有疾。鑄召醫視之。且饋以酒食。至是哈

刺不花釋希亮縛。謂曰。我受恩於汝父。此圖報之秋也。及抵沙州

北川。希亮兄弟徒步負任。不火食者數日。是冬涉雪踰天山。至別

失八里。舊傳北庭都護府明年至彰八里。舊傳昌八里夏踰馬納思河。抵葉密立城

舊傳葉密里城此從憲宗紀時古余克汗之可敦乃蠻真氏。朵列格捏可敦之妹也。

與其子禾忽大王卓帳於此。皆欲東覲希亮母。密知其事。攜希亮

入見。已而事不果行。禾忽閔希亮母子不能歸。資以衣糧鞍馬。又

嘗賜二珠。大如榛實。直千金。欲穿其耳。為環使帶之。辭曰。不敢因

是傷父母之遺體也。且無功受賞。於義尤不可。禾忽乃解金束帶

賜之。曰。繫此於遺體。宜無傷。時禾忽與察阿互後王阿魯忽合兵

拒阿里不哥。希亮從二王轉戰天山南北。四年夏。希亮母從可敦

避暑阿忒八失山。地名見西北地均錄舊傳阿體八升會忽必烈汗聞鑄妻子在北邊。遣不

華出使二王所。璽書徵希亮馳驛赴闕。遂以是年六月。由苦義舊傳

至哈刺火者。舊傳哈刺火州涉哈密力。地名見巴而朮阿而忒傳古伊州也踰漠而還。八月。入覲於

上都大安閣備陳邊事及羈旅困苦狀汗閱之賜鈔千挺金帶一

鞵帛三十四命為速古兒赤掌內府尚供衣服之官稱必闔赤御前書記官至元八年授

符寶郎十三年舊傳十二年誤宋既平汗命希亮問諸降將日本可伐否夏

貴呂文煥范文虎陳奔等皆云可希亮回奏言宋與遼金攻戰且

三百年今干戈甫戢人得息肩稍緩數年與師未晚汗以為然有

太府監令史盧甲言於監官各路貢布長三丈唯平陽加一丈諸

怯薛互以故爭取平陽布苟截其長者與它郡等則無所爭而以

所截者為髹漆宮殿器皿之用甚便監官從之適左右以其事聞

汗詰監官監官倉皇莫知所對歸臯於盧汗命斬之希亮遇諸途

盧以冤愬希亮屬行刑者稍緩具以實入奏有旨令符寶郎董文

忠讞之竟釋盧而召御史大夫塔察兒等讓之曰此事言官當言

而不言嚮微禿忽思不誤誅此人耶十四年拜禮部尚書尋轉吏

部汗駐蹕上都北察納兒台之地希亮自大都來奏事畢董文忠

訪以大都近事文忠舊傳誤作文用據舊紀及文忠傳校正希亮曰囹圄多囚巨汗方欹枕卧

忽寤問其故。希亮奏言。近奉旨。漢人盜鈔六文者死。以是囚多。汗驚問孰傳此語。近侍脫兒察曰。陛下在南陂。以語蒙兀兒童者。汗曰。前言戲巨。曷嘗箚為令耶。乃臯脫兒察命希亮還大都。諭中書除之。十七年。以足疾去官。退隱灤陽。其父鑄下築縉雲號五湖別業希亮益居此至大二年。海

山汗訪用先朝舊臣。特起為翰林學士承旨。知制誥。兼脩國史。希亮類次忽必烈汗嘉言懿行以進。碩德八剌汗取其書置禁中。泰定四年卒。年八十有一。希亮性至孝。當客依二王時。家貲散亾已盡。僅存祖父畫象。四時陳祭穹廬中。曲盡誠敬。朔漠之人聚而來觀。歎曰。此中土之禮也。雖病足。不廢書史。或中夜起坐。剪燭以書。所作詩文及從軍紀行錄。凡三十卷。目之曰憐軒集。贈推忠輔義守正功臣。資善大夫。集賢學士。上護軍。追封漆水郡公。諡忠嘉。

鎮海客列亦惕氏

舊傳怯列台主唐小稿神道碑作怯烈

本王罕部族。成吉思父事王罕。兩

家人從往來無間。故鎮海亦事成吉思。王罕與成吉思交惡。鎮海畱事不去。巴泐渚納之盟。鎮海與焉。有勇略。善騎射。以徹里必從

討漠北諸部族徹里必侍從官甲子平乃蠻以功賜良馬一丙寅成吉思稱

尊號大封功臣授千戶者八十有八人鎮海亦授百戶據神道碑兼札魯

忽赤蓋小斷事官也時別勒古台為也客札魯忽赤忽秃忽為普上札魯忽赤辛未從伐金戰於撫州流矢中右脅

裏創復戰勇氣不衰既下中都命登城中大悲閣環射四矢矢所

至市舍舉賜之和林者王罕建牙舊地亦唐以來回鶻王庭也成

吉思愛其山川雄秀將定都焉車駕親征西域畱皇后斡兒朵於

此以為老營老營二字據秘史內謀足食固根本之防命鎮海佩虎符銀印

總屬官金符十人銀符五十人領所俘漢兒萬人關斡兒洹河上

地為屯田築城阿不罕山北即以其名名之曰鎮海八剌合孫李志常西

遊記曰又五六日踰嶺而南至蒙古營宿拂廬巨行迤邐南山望之有雪人告曰此雪山北是口

鎮海八剌喝孫也八剌喝孫漢語謂城中有倉廩故又曰倉頭七月二十五日有漢工匠絡繹來

迎沙漠中多不以耕耘為務喜見此閭秋稼已成翼日阿不罕山北鎮海來由是人呼為田

鎮海時有三人同名故加田以別之鎮海異文亦作稱海又於此城局所得燕

京童男女及工匠萬人居作亦領於鎮海而以金前中都守藏吏合荅副之後移其半不能寒者分局弘州嗣得西域織金紋工三

百人。汴京織毛褐工三百人。皆分隸弘州。設弘州人匠提舉司。至

鎮海孫塔哈察。猶襲監州。及其局云。道士邱處機之應召赴西域

也。道出和林。鎮海帥李家奴等百騎。防送至大雪山。行在所。汗訪

道於處機。獨命鎮海入金帳。旁坐。掌錄奏對之言。它人不得預聞。

據西遊記所云如此。可知鎮海是行。並非從軍征討。專為防送處機。碑傳所云征
欽察。唐兀只溫。同契丹女真。皆有功。乃鎮海五世孫。赫斯狀中無稽之言也。蒙兀制。每一

大汗新立。盡收天下符節。幹歌互汗。登極如之。獨鎮海聽留。復以

貴戚金符官隸麾下。辛卯八月。始立中書省。依宋金制。尚左。鎮海

用耶律楚材薦。拜左丞相。尋依國俗。尚右。改右相。足證親征錄稱鎮海左
丞相。重山右丞相。並非

傳刻之誤兼掌起居注及宣命之寶。鎮海信仰景教。語出多
桑書通畏兀文字。凡

省文書行於西域及畏兀兒地者。用畏兀文。鎮海主之。行於中原

及契丹女真諸國地者。契丹謂西遼女
真謂蒲鮮萬奴用漢文。楚材主之。然仍於文

書後年月之前。鎮海手寫畏兀字曰。付與某人。用相參驗。自兼掌起
居注以下

至此據黑
鞬事略其信任如此。從駕渡河伐金。賜以所得汴京九游龍旂。乘

輿椅蓋。碑文此
語可疑及破蔡。俘金公主某。亦以賜焉。丙申。分土功臣。賜恩

輿椅蓋。及破蔡。俘金公主某。亦以賜焉。丙申。分土功臣。賜恩

州三百戶為實封

舊傳千戶此從碑按食貨志歲賜下鎮海相公五戶孫王子年元查保定九十五戶云云金恩州隸大名此云保定蓋金元間暫時更置而地

志未載者

世食其賦。幹歌互汗姐，乃蠻真可敦稱制，信用羣小，不善鎮海。

罷其官。古余克汗登極，以鎮海先朝舊臣，仍起為右丞相，糾正母

后攝政時，諸王駙馬徵求無厭之弊，權歸朝廷，頗致時忌。古余克

汗好酒色，常以疾不視事，事多洩於鎮海及合互。

洪侍郎鈞譯西書作喀達按秘史成吉思以皇

子拙赤女詔雷妻幹亦刺部長忽都合別乞之子脫列勒赤而元史公主表火雷公主適哈答駙馬然則脫列勒赤即哈答之二名哈答駙馬即合互古列堅實定宗皇后幹兀立海迷失之兄以

外歐功臣故得政憲宗紀坐誘諸王為亂之伏誅諸臣中其第四人曰合答即此人蒙格汗即位，惡二人異己，黨於古余

克汗，寡后幹亦刺海迷失，坐以誘諸王為亂，辜誅之。

坐誘諸王為亂之伏誅諸臣中其第五人

曰曲憐即鎮海也曲憐之對音為客列鎮海本客列亦氏故云然其不稱鎮海而稱曲憐者猶稱肖乃台曰怯烈台其例一也

使答失蠻哈爾魄泣刑

焉。

答失蠻為天方教一種別派之名西域人以此為名見於元史者甚多洪譯作丹尼世們音近哈爾魄者天方教徒曾禮拜默伽黑石殿者之通稱見多桑蒙兀史注洪侍郎定憲二宗補紀

自注乃釋為官官之名未知何據且作哈尤魄尤為爾字州書小形近之譌

卒年八十有四

神道碑云歲乙未八月二十一日薨於家上悼惜不已賜金幣治喪命百

官致祭後憲宗伐宋嘗狩驛歎曰使吾得鎮海江淮何憂惜其死矣抑若鎮海薨於太宗七年而憲宗恨生不同時者然實則赫斯諱其先人身受刑誅虛構年月日事實以欺撰碑詞者許有王

不察據以入碑也

鎮海有人倫之鑑，雖在軍旅，常識拔賢才，於河西得算只

兒威。

安吉王乞合普濟之父碑作亦吉兒赤

匠官得崔甲。

弘州人江淮左丞崔斌御史中丞崔或之父

其子皆為名臣，陰

陽家得田忠良。仕至大司徒。而於阿母河等處行省理財長官。閻兒古思。則以死保任之。得儒十三人。後皆知名。忽必烈汗即位。閻鎮海死。非其辜。以其舊部及降戶千人為貴赤軍。授其孫莊家為千戶。曾孫也里卜花為百戶。世所謂十七投下。此其一也。孫塔哈察。襲弘州荅魯合臣。並監本州人匠提舉司。鎮海妻蔑兒乞真氏。成吉思所賜宮人也。子十有二人。知名者曰要東木。襲札魯忽赤。佩金符。前卒。曰勃古思。繼食封邑。從忽必烈汗潛邸征花馬大理。帥軍千人。結筏金沙江濟師。中統初。以功授益都等路宣慰使。賜虎符玉帶。二年。改東平路。副荅魯合臣。明年。從平李壇。遷濟南等路宣慰使。至元二年。遷南京路。荅魯合臣。四年。平蘄縣叛民。以病乞骸骨。特授保定路。荅魯合臣。賜錢萬。歸老於家。卒年八十有一。曰闊里吉思。諸孫詳氏族表。粘合重山。一名鈞。金之世族也。金史百官

志黑號之姓。其六曰粘割。即粘合。亦作女奚烈。滿洲氏族志作鈕祜祿。

金末為質子於蒙兀。見本國將亡。遂委心

事成吉思。直宿衛。充必闈赤

黑韃事略云。窩窟台相四人。粘合重山。女真人。或稱將軍。又云韃人無相之稱。只稱之曰必徹徹。必徹徹者漢

語令史也使之
主行文書目

賜馬四百匹為家貲。重山既掌文書，亦事戰陳。成吉思

晚年親征西夏，重山從圍西涼，執大旗督戰，手中流矢不動。幹歌

互汗立，耶律楚材薦為中書右丞相，尋改左丞相。時楚材為中書

令，凡漢地建官立法，任賢使能，與夫分州縣，定課賦，通漕運，政皆

出於楚材，重山佐成之。若鎮海，則專理西域事，先立漢軍三萬戶

府，以劉黑馬、蕭札刺兒、史天澤為萬戶。札刺兒本契丹人所將，契丹軍皆久居中

歲壬辰，札刺兒失律，五朵山。當時拖雷以蒙兀將額幹歌互汗斬之。鈞州

重山代為萬戶，故時稱重山為相公，亦稱之曰將軍焉。重山數侍

宴，見汗嗜酒，從容諫曰：「臣聞天子以天下為憂，憂之未有不治，忘

憂未有能治者。置酒為樂，忘憂之術也。」汗嘉納之。乙未，從皇子闊

出略地宋邊，詔軍前行中書省事，便宜行事。收降民三十餘萬，明

年，闊出薨，諸王阿勒赤互代將。搠黑斡重山行省軍前如故，與諸王

口溫不花同下光州。舊傳取定城指口溫不花戊戌，又同都元帥察罕略

地淮東，拔天長，以功賜中廐馬十四，貫珠袍一襲，師還，卒於道。察罕

傳

天長事在戊戌而南合嗣行軍前中書事亦在太宗十年故知重山卽以是年卒也追贈太尉封魏國公諡忠武重山卒時

子南合以江淮安撫使在軍中有詔使嗣行軍前中書省事察罕

圍安豐舊傳誤作壽春據張弘範傳及宋史改七日城始下依當時軍法欲屠之南合曰

不降者守將曰城民何辜察罕南合婦翁也據至正集逸的夫人瑞童墓誌聽其言乃

止蒙格汗朝南合似家居彰德無所事事者然中統元年授西京路安撫使已而立宣撫司改

充宣撫使二年八月拜中書右丞行河西中興等路中書省事三

年改行秦蜀五路中書省事是歲李璫以益都叛先是忽必烈汗

自潛邸伐宋軍於汴南合家在彰德據逸的夫人瑞童墓誌渡河進謁而言曰

李璫承國厚恩坐制一方然其人多詐叛無日矣時蒙格汗入蜀忽必烈汗又將南征江漢故南

合盧壇乘間當時郝經亦嘗以為言汗亦患之然其時蒙格汗方委璫山東無如何也及

是汗使諭南合曰卿言猶在耳璫果反矣卿其慎守西鄙南合

使者還奏曰臣謹受詔不敢以西鄙遺陛下憂至元四年二月進

拜平章政事仍行省中興明年以病卒官追封魏國公諡昭武子

博理察知河南府事孫世臣同知京畿都漕運司事 王德真字

博理察知河南府事孫世臣同知京畿都漕運司事 王德真字

濟準金撫州豐利人

豐利金縣屬撫州中統二年陞撫州為隆興路省豐利入故元史地理志隆興路無豐利既曰隆興即不得復言豐利碑稱隆興豐

利人九歲而孤成吉思克撫州獲之愛其風骨命後宮收養之稍長

通蒙兀語給事左右充怯里馬赤義謂漢言譯史通稱奉御凡為近侍通稱與

也速帶兒帶或作歹塔不台句札兀兒台三人同列皆當時勳胄也尋命

兼掌第二斡兒朵事碑稱二皇后宮二皇后忽闌也忽闌可敦撫之如子從平西夏成

吉思欲屠城德真諫言可汗之來非敵百姓也幸貸天誅汗說遂

赦之斡歌互汗即位賜佩金符授德興路人匠荅魯合臣歲癸巳

崔立以南京降柯史誤以為四年事依金紀訂正德真從速別額台入城收撫後除德

興燕京太原三路人匠荅魯合臣耶律楚材重其人欲引以自近

從容語之曰君舊臣宜入中書德真固謝不敏乃蠻真可敦聽政

以為西京等路廉訪使忽必烈汗潛邸南征執政又以為平陽太

原等路廉訪使皆不就至元九年卒年七十

論曰蒙兀初起專尚武功無意置相固游牧人種性也斡歌互汗

之世始有官制別軍民籍戶口定稅課設科舉譯經籍駮駮嚮文

治。思與諸夏同風。實開至元諸政之先路。此誰之功與。孔子曰。微管仲。吾其被髮左衽矣。吾於耶律楚材亦云。

耶律楚材列傳第三十

蒙兀兒史記卷第四十八

耶律阿海捏兒王珣石抹也先明安孛兒迭列傳第三十一

蒙兀兒史記卷第四十九

武進屠寄纂

耶律阿海遼之故族祖撒八兒仕金為桓州尹遂家於桓父脫迭

兒尙書奏事官金史百官志尙書省左右司員外郎各一員正六品掌本司奏事阿海善騎射通北族語金

章宗時選使王罕舊傳稱金季按時當皇宗在位直金中葉不得云季時成吉思父事王罕在其牙

帳阿海見之偉其天度知非常人因進言金國戎備廢弛風俗日

靡亾可立待深自結納成吉思喜曰汝肯事我以何為信阿海對

曰願以子弟為質明年復來使果挈其弟禿花至慰勞有加遂以

禿花為質俾入宿衛阿海亦竟畱事成吉思不歸歲癸亥舊傳誤作王戌兄

弟二人同與巴勒渚納飲水之盟舊作辨屯水是年冬王罕敗死其子你

勒合桑昆亾走西夏邊亦集乃之地阿海追之不及而還舊傳云癸亥冬進攻

西夏諸國累有功徧考中西書癸亥冬竝無攻西夏事然蔑兒乞忽禿之逃也使速別額台追之乃蠻古山魯克之逃也使者別追之獨你勒合之逃不遣一騎追逐本是疑問阿海之攻西夏蓋

追你勒合也今改正如右足補史闕歲辛未大舉伐金者別那顏領左手軍為前鋒略地

漠南阿海與弟禿花實為嚮導

舊傳左師闕別即者別也時為左手千戶當屬木合黎實前鋒將耳不得稱帥舊傳又云阿海為前

鋒按阿海備旅無屬兵豈得為前鋒特嚮導耳

及者別破烏沙堡。鏖戰宣平。大捷滄河。突入居庸。

耀兵燕北。成吉思駐蹕龍虎臺。阿海與禿花別將襲金雲內羣牧

監。驅其牧馬。并以其使雜古黜公來謁行在所。

說詳本紀注

阿海見緣道

伏屍枕籍。因奏言。好生乃聖人之德。創業之始。宜慎殺戮。以應天

心。汗嘉納焉。歲癸酉。蒙兀分軍三道。大略燕南山東。還屯大口。進

逼中都。明年三月。金主懼。使來乞和。先是金人謁阿海奉使。久不

返命。拘其家屬於瀛。阿海不顧。成吉思聞之。妻以貴臣之女。且給

奴以供樵牧。及是。汗詰金使。何故拘阿海妻子。金人即禮遣來歸。

師還出塞。五月。金主遷汴。七月。其太子守忠亦棄中都南走。汗命

阿海禿花與石抹明安。引蒙兀將撒木合把阿禿兒軍。與契丹新

附將斫荅。

句

比涉兒。

句

札刺兒等軍。并力圍中都。乙亥五月。中都

下。論功拜阿海太師。行中都省事。禿花太傅。總領也客那顏。並封

國公。賜虎符銀印。與太保石抹明安。同時為三公焉。既而禿花帥

契丹漢軍從木合黎經略中原。阿海從成吉思車駕征西域。歲庚

辰，汗既克，不合兒句、薛米思堅等城舊傳作蒲華尋斯干等城。明年春，自將渡阿

梅河，追札刺勒、哀丁，以阿海留戍。薛米思堅王午，西域略平。汗將

班師東歸，下詔分置荅魯合臣於兀籠格赤句、不合兒句、兀丹句、

乞思合兒句、兀里羌句、占先荅里勒諸城，而命阿海為都荅魯合

臣，仍駐薛米思堅總監之，以同紇種人馬思忽惕同知其事。未幾，

阿海以疾卒。官年七十有三。至元十年，追諡忠武。子三人：長，忙古

台，次，縣思哥。又次，捏兒哥。忙古台，成吉思時拜御史大夫。時無御史臺而忙古

台與石抹也。先均官御史大夫。特虛名。佩虎符，監戰左副元帥。階金紫光祿大夫，管領契

丹漢軍，守中都招安水泊等處。水泊即大水，樂亦呼大水，納活兒在今察哈爾正藍旗牧地。卒。無子。捏兒

哥佩虎符，監蒲鮮萬奴軍。萬奴叛，捏兒哥舉家遇害，追贈遼東行

省右丞。舊傳誤以為生前之官。縣思哥從阿海在西域。阿海卒，襲位太師。薛米思

等城都荅魯合臣。久之，乞還內郡，改授中都路也客荅魯合臣。佩

虎符。卒。子二：買哥，知名。買哥通諸國語，為斡歌互汗奉御。誤稱為太祖奉御。

賜只孫服襲父職監守中都時中都供億浩繁屢貸於民買哥悉

以私帑償之事間賜銀萬兩歲戊午從蒙格汗伐蜀攻合州釣魚

山卒於軍妻移刺氏金史百官志女真白號之姓有移刺與契丹之耶律氏一作移刺者音同而種不同此移刺氏當是女真人以哀毀

卒特諡貞靜夫人子七人名知者曰老哥曰驢馬老哥歷官提刑

按察使中書左丞宰相舊表不載蓋行省左丞也驢馬宿衛必闍赤積勞授右衛親軍

都指揮使至元二十四年忽必烈汗宴於柳林命驢馬服只孫服

居其父位父位太師位也明年從討哈丹禿魯干舊傳脫誤作成哈丹禿以人名為地名特改正有功以老

乞骸骨子六人五臺奴襲右衛職賜號拔都兒中書左丞授者文謙

興國路總管卜花蚤卒蒙古不花荆湖北道宣慰使虎都不花一

名文炳湖州同知萬奴人匠副總管禿花以從兄阿海入質賜

今名從大軍伐金敗其西京畱守紇石烈胡沙虎於定安之北舊傳大破

忽察虎軍不著所敗地名據金史紇石烈執中傳補領劉伯林一軍招降山後諸州及下中都拜太

傅國公舊傳稱濮國公乃後來追封之稱當時必無國號總領也客那顏佩虎符銀印開府置僚

屬一時漢將尊榮無出其右者既而統山後漢軍及蕭札刺兒等

契丹軍爲一翼從木合黎經略中原岐燕南河北山東西之地以

元帥鎮守宣德西遊記宣德元帥耶律公指禿花長春往返皆見之知禿花以宣德爲老營翰歌互汗卽位始立漢

軍三萬戶府以劉伯林子黑馬及札刺兒史天澤分充萬夫長竝

隸禿花麾下歲辛卯翰歌互汗命禿花帥黑馬札刺兒兩軍舊傳有

然按之金元二史是役天澤獨未從從皇弟拖雷假道於宋以伐金將由秦鞏入漢中行

次西和州舊傳誤作西河州道卒子末哥襲職與都元帥倂蓋會宋將孟瑛

同破蔡州宋史孟瑛傳之禿花武漫柯卽指末哥以同名者多兼父名稱之金平翰歌互汗廣漢軍爲七萬

戶仍以末哥太傅府總領之歲乙未末哥與都元帥塔海紺孛輔

皇子闊端同征蜀明年分土功臣翰歌互汗追念其父禿花前勞

賜也客太傅位下上都五百四十戶歲給錦幣三百六十匹末哥

卒於蜀軍中子寶童宜嗣以疾不任事末哥之弟買住代襲別授

寶童隨路親軍總管買住言於蒙格汗曰今欲略定四川下流諸

城當先定成都以立根本臣請往相其地遂帥諸軍攻嘉定末下

而卒子忽林帶嗣搃諸軍立成都府卒於軍以其兄百家奴代將

自末哥至百家奴。竝襲大傅總領也。客那顏忽必烈汗即位後。遷

轉法行。罷太傅府。百家奴改拜都元帥。至元五年。攻拔嘉定之五

花石城。白馬三砦。禿滿荅兒者。百家奴之弟。忽林帶之兄也。常

留中宿衛。及百家奴罷世職。為元帥。乃授禿滿荅兒為成都管軍

萬戶。代將其軍。至元十一年。從忽敦攻嘉定。脩平康寨。成之。明年

從汪惟正

舊作汪田哥。乃惟正父。德臣賜名田哥。已於蒙格汗末年。已未攻合州中。斃死。

破九頂山。斬宋都統一人。嘉

定降。又從忽敦徇下瀘。敕大軍圍重慶。禿滿荅兒別將一軍守合

江口。又分兵寨龍門濠。以遏敵援。十三年。瀘州叛。從汪惟正攻之。

邀賊重慶。援兵獲七十人。瀘堅守不下。禿滿荅兒夜帥勇士襲奪

其水寨。黎明。先登克瀘。斬守將王世昌。李都統。復從西川行院不

花攻重慶。與守將張珪搏戰城下。敗之。蜀平。賜虎符。授夔路招討

使。遷四川東道宣慰使。仍兼招討。改同僉四川等處行樞密院事。

再改行中書省左丞。二十四年。尚書省立。改尚書左丞。遷右丞。特

拜都元帥

舊紀是年八月。以脫滿荅兒為都元帥。

將四川省兵五千征緬。仍令其兵駐緬

近地。以俟進止。尋卒。忙古帶。寶童之子也。沈雄有膽略。忽必烈

汗賜金符。命襲其父隨路新軍總管之職。統領山西兩路新軍。從

四川行省也。速帶兒征思播及建都蠻有功。陞萬戶。至元二十一

年。遷雲南都元帥。從攻羅必甸。仍從也速帶兒會雲南王也。先帖木兒征緬

之師。敗績於甘蒲。詔忙古帶帥所部往援。所過金齒白衣荅奔諸

蠻。往往伏險要遮。忙古帶緣道奮擊。凡十餘戰。始達緬境。開金齒

道。迎王以還。以失士卒多。降授副都元帥。二十四年。從諸王阿

台征交趾。阿台世系不詳至白鶴江。與其國昭文王戰。奪獲軍艦八十七艘。

又從雲南王攻羅必甸。破之。二十九年。入覲。賜金幣有差。鐵穆巨

汗卽位。擢鎮國上將軍。烏撒烏蒙等處宣慰使。兼管軍萬戶。遷大

理金齒等處宣慰使。都元帥。大德六年。烏撒羅羅斯叛。奉行省檄

討平之。捷聞。賜鈔三千貫。銀五十兩。及金鞍轡弓矢。以旌其功。九

年。討普安羅雄州叛酋阿填。一日九戰。禽斬之。十年。進驃騎衛上

將軍。遙授雲南行省左丞。仍行大理金齒等處宣慰使。都元帥事。

十年。殞於大吉州軍中。年五十有八。至大四年。贈龍虎衛上將

軍。平章政事。追封濮國公。禿花之濮國公。宜同時追封者。諡威愍。子火你赤。船橋萬戶

府。答魯合臣。旺札刺不花。雲南諸路兵馬右副元帥。有吳信者。

晉寧榮河人。目瞭能夜視。月下射雉。免於百步之外。矢無虛發。歲

壬午。帥衆降。木合黎承制授信鎮西元帥。俾隸耶律禿花大傅府。

以其軍畱戍禹門東衛堡。進據汾陰鄉。金榮州守將憚信威名。不

敢迎擊。信遂下榮州之胡壁堡。歲庚寅。禿花遣信進攻夾家堡。中

伏士卒潰。信突圍走。道遇深窵。躍馬過之。如有神助。已而潰卒復

集。再戰。大破之。堡衆遂降。及境內寧謐。信躬勸稼穡。在任十餘年。

公私饒足。為政廉平。遠近歸之。以疾致仕。卒年六十有八。子思襲

榮河諸軍奧魯。據山左右刻叢編周從善所撰信碑補附

耶律捏兒。耶律舊傳作移刺。按金元史耶律移刺往往互通如耶律楚材亦作移刺。楚材耶律阿海西遊記稱為太師移刺國公是也。契丹人。沈毅

有謀勇。自以遼後。義不仕金。聞成吉思舉兵。私謂所親曰。為國復

讎。此其時矣。遂帥其黨百餘人來降。且獻伐金十策。成吉思召見

與語奇之謂得一賽因必闕赤舊傳誤以爲賜名問生何地以霸州對霸州也

因號爲霸州元帥歲乙亥拜兵馬都元帥從木合黎取北京下高

利興松義錦等州二十六城五十四寨別將平利州賊劉四祿及

張致僭號於錦奉木合黎命與蒙兀大將吾也而舊作烏也兒脫纜舊作桐駭兒

合兵討平之第功進龍虎衛上將軍兵馬都提控元帥興州荅魯

合臣重兒叛復與吾也而討平之賜佩金虎符辛巳夏從下東平

舊傳誤以爲戊寅年事冬從攻延安不下壬午從圍鳳翔先登手刃數十人左臂

中流矢裹創轉攻丹延木合黎止之對曰創未至死敢自愛耶木

合黎壯之贈以所乘白馬明日捏兒介其馬飾以朱纓簡帥驍騎

七十人與金人戰馳突無前木合黎乘高望見之指謂左右曰此

霸州元帥也揮諸軍繼進大敗金師丹延十餘城皆降遷興中府

軍民都荅魯合臣兼府尹興中舊傳誤作興勝依前兵馬都提控元帥歲丙戌

從成吉思征河西舊傳誤以爲癸未年事取甘合辛蛇等州師還復從嗣國王

孛魯攻益都舊傳云從木華黎以位言下淄萊膠等州三十二城戊子得疾歸高

州卒。贈推忠宣力保德功臣。太尉開府儀同三司。上柱國。諡武毅。

子買奴。買奴遭父喪時未及冠。幹歌互汗召見。舊傳誤稱初大見太祖問之曰。

汝年小能襲父爵乎。對曰。臣年雖小。國法不小。汗異其對。顧左右。

曰。此兒甚肖其父。以為高州等處。荅魯合臣兼征行萬戶。歲庚寅。

從合赤溫札刺亦兒台征高麗。攻其花涼城。監軍張翼劉霸都隕。

於敵。買奴怒曰。兩將陷敵。義不獨生。趨戰破之。斬其渠。撫其民。進。

攻開州。州將金沙密逆戰。禽之。遂下龍宣雲泰等十四城。癸巳。從。

宗王阿勒赤互征蒲鮮萬奴。又有功。未幾召還興州趙祁反。祁舊傳誤作祚

据王榮祖傳校正土豪楊買驢等響應。仍從阿勒赤互討之。阿勒赤互舊傳作親王秦合音近之誤斬。

賊將董蠻等。圍買驢於險樹寨。三月不下。買奴令健卒劉五兒即。

寨北小徑上大樹。潛以繩引登百人。直擣其巢。買驢投崖死。餘黨。

悉平。此下舊傳衍太宗即位四字以功賜金鞍良馬乙未。從唐古征高麗。圍王京。取。

其西京而還。賜金鎖甲。加鎮國上將軍。征東大元帥。佩金符。金下疑脫虎字

出鎮高麗。將行。以疾卒。年四十。贈推誠效義功臣。榮祿大夫。平章。

政事諡顯懿子元臣 元臣別名哈刺哈孫年十六入宿衛應對

進止有度忽必烈汗謂丞相和禮霍孫曰和禮霍孫依宰相表譯文舊傳作和魯火孫至元十九年始拜右丞

相此時尚為怯辭之長舊傳據後官稱此勳臣子非凡器也以為怯辭必闔赤襲千戶將

其父軍從伐宋攻淮西戍清口至元十三年從下通泰宋平論功

擢武義將軍中衛親軍總管佩金虎符十四年只魯幹帶叛舊傳只兒瓦台

圍應昌時皇女魯國公注囊加在圍中元臣帥所部兵馳援只魯幹

帶走追敗諸魚兒梁舊傳云禽之按只魯幹帶實敗滅於合刺合答之地公主賜賚甚厚奏請斃畱

元臣駐軍應昌以安反側踰年召至大都進明威將軍授後衛親

軍副都指揮使還鎮應昌又三歲召還加昭勇大將軍十九年汗

以所籍權臣阿合馬家婦賜之辭曰臣家世清素不敢自污汗嘉

歎不已二十二年進昭毅大將軍同僉江淮行樞密院事院罷歸

高州車駕親征乃顏元臣帥家僮五十人謁行在請奮二十八年

移僉湖廣行樞密院事時施容諸蠻不靖元臣親入溪洞諭降其

酋魯萬丑三十年卒官贈安遠功臣龍虎衛上將軍同知樞密院

事謚忠靖。自捏兒至元臣。三代皆追封興國公。子迪中奉大夫。湖南宣慰使都元帥。

王珣字君寶。本耶律氏。金正隆末。契丹窩斡叛於遼東。珣祖成從母避地遼西。變姓王氏。遂為義州開義人。父伯俊。以兄伯亨無子。使珣出後。大宗珣膂力絕人。善騎射。尤長擊鞠。年三十餘。有道士遇之。奇其相。謂曰。君宅日因一青馬而貴。珣未之信。居歲餘。客有以青馬來求鬻者。珣私喜曰。道士之言或驗乎。乃高價買之。後乘以戰。進退周旋無不如志。又嘗行凌水瀕。開義北瀕大凌河得一古刀。其銘

曰。舉無不克。動必成功。常佩之。每有警。刀必先鳴。蒙兀軍興。豪強各擁眾據地。珣召鄉人謀自保之計。眾推珣為長。旬月之間。流亡歸之者十餘萬人。歲乙亥。木合黎略地奚霫。金北京路隋唐以來本奚地其東為白霫地珣帥

吏民迎降。木合黎承制以珣為元帥。兼領義川二州事。丙子春。張致據錦州。陰結開義人楊伯傑等掠義州。珣出戰。伯傑引卻。致兄子東平以千騎來繼。珣選十八騎突其前。令左右犄角之。敵中一

卒以槍刺珣珣揮刀殺之獲其馬敵乃退時與中亦叛木合黎圍之召珣帥全軍往會致乘虛夜襲義州害珣家人及與中平珣無所歸木合黎留之軍中遣其子榮祖馳奏其事成吉思慰諭之曰汝父子宣力我家不意為張致所襲歸語汝父忍恥奮銳俟逆黨

平彼之屬族城邑人民一以付汝吾不吝也仍免繇賦五年使汝

父子世為大官已而珣以木合黎軍復開義禽伯傑等殺之從攻

錦州致將高益縛致出降木合黎執致妻子及其黨千餘人悉以

付珣珣但誅致家釋其餘始還義州明年入朝成吉思嘉其勞賜

金符舊傳金下衍虎字按蒙兀軍皆世襲珣子榮祖已丑年始換虎符其父元佩金符可知加金紫光祿大夫兵馬都元

帥便宜行事兼義川等州節度使珣貌黑人呼為合刺元帥於是

從木合黎略地山東至滿城令還鎮遼東義川二州在遼水西云遼東者元初北京路兼有遼東戒

之曰彼新附之民恃山海之險反覆不常非盡坑之慮終為變對

曰大朝經略中夏宜以恩信結人若殺已降後寧復有至者乎遂還

以子榮祖代領其眾甲申正月卒年四十有八榮祖字敬先珣長

子也。性沈厚。音吐如鐘。初以質子從木合黎。稍見任用。珣卒。襲榮

祿大夫。崇義軍節度使。義州管內觀察使。歲丙戌。從嗣國王孛魯

朝行在所。成吉思聞其多力。選孛魯三人。送與角觝。皆應手而顛。

欲畱置宿衛。會金平章政事溫迪罕哥不魯行省於遼東。溫迪罕其氏哥不魯

其名見金史。紇石烈桓端傳。又哀宗紀。正大三年六月壬子。詔諭遼東行省葛不魯。討反賊萬家奴。按正大三年。即成吉思二十一年丙戌也。葛不魯。即哥不魯。榮祖舊傳誤作葛不魯。萬家奴。即

薄鮮前咸平路宣撫使蒲鮮萬奴。僭號於開元。開元。釋地詳本書萬奴傳。遂命榮祖東

還。從都元帥合赤溫。札刺亦兒台。贊權撤先討哥不魯。拔蓋州宣城

等十餘城。哥不魯走。死。金將郭琛完顏曳魯馬趙遵李高奴等猶

據石城。今遼陽縣東南十二里有石城山縣蓋因以為名。又東南有故石城。則唐時高麗之石城也。復攻拔之。曳魯馬戰死。遵

高奴降。虜生口千餘。合赤溫欲置麾下。榮祖力請。放為民。方城未

下時。榮祖遣部卒賈實穴城。城崩被壓。眾謂已死。弗顧也。榮祖曰。

士忘身為國。安忍棄去。發石出之。猶生。一軍感激。有言義州人懷

反側者。合赤溫將屠之。榮祖馳驛奏辨。乃止。己丑。斡歌互汗即位。

授北京等路征行萬戶。換金虎符。辛卯。從合赤溫征高麗。圍其王

京王曦力屈。遣其弟子淮安公佺。舊傳誤作兄高麗史作弟亦誤按曦之子名倂與佺為從兄弟故其名皆從人旁奉

表納貢。癸巳遂從宗王阿勒赤互討蒲鮮萬奴禽之。師還。又從平

興州趙祁之亂。祁黨猶標掠景薊間。復從大將唐古討之。唐古舊作唐兀合

將行。榮祖與約曰。奉詔討逆。勿濫及無辜。惟抗我者誅。唐古許諾。

由是免死者衆。歲丙申。復從唐古征高麗。破十餘城。庚子秋。王曦

以其族子永寧公綽為己子。入質。乃班師。賜錦衣為勞。歲癸丑。復

從諸王也古征高麗。也古舊作也忽降其天龍諸堡。破五里山城。遂下甕子

山城。竹林寨。及苦苦數島。所至禁殺掠。蒙格汗賜以金幣。官其子

興千戶。賞及部曲。時王曦遁居江華島。汗命榮祖以所部留鎮其

國平壤道。且遣使諭之曰。彼小國負險自守。釜中之魚不久將自

斃。緩急可否。卿當熟思。榮祖乃募民屯田。為久戍計。六載之間。關

地千里。盡得諸島嶼城壘。歲己未。王曦乃遣其世子倂入朝。中統

元年夏。召榮祖詣闕。忽必烈汗深撫慰之。進沿邊招討使。仍兼北

人顯者七人通與中府尹泰權知義錦川等州總管興征東千戶
遇襄陽路管軍萬戶達東京五處征行萬戶廷鎮國上將軍中衛
親軍都指揮使璩江西湖東道提刑按察使

石抹也先

重出之傳作阿辛

其先本蕭氏隋末從蕭后舉族入突厥及后還

而族留至遼為述律氏號稱后族遼亡改石抹氏

阿辛傳稱述律氏又石抹宜孫傳云遼之迪

烈紇人按迪烈為部族之名遠有烏古迪烈統軍司

祖庫烈兒誓不食金祿帥部族遠徙年九十得

疾命家人候日出則以報及旦沐浴拜日而卒父脫羅畢察兒亦

不仕有五子也先其仲子也十歲時從父問家國之所以亡則大

憤曰兒能復之及長善騎射勇而多智豪於邊金廷聞其名徵為

奚部長讓其兄瞻德納曰兄姑受之為保宗族計乃自隱居北野

山

今喀喇沁右翼南百七十里

射狐兔以食聞成吉思起兵漠北匹馬來歸

建言北京為金根本之地

北京舊傳作東京魏源云按東平王世家太祖命木華黎取遼西是北京非東京也下文云師過臨潢高州亦距北

京大定近而距東京遼陽遠寄按真

若覆之中原可傳檄定也成吉思深然

之歲乙亥遂命也先從木合黎取北京師過臨潢次高州使帥千

騎爲前鋒也。先曰：兵貴出奇，何用多爲？謀知金新易北京，畱守將

至。金廷間輿屯，襄被殺必簡一人代爲北京畱守，金史漏略。也。先與數騎邀而殺之，懷其敕命，徑叩北京

城，謂門者曰：我，新畱守也。卽入據府中，問吏列兵城上，何爲？以備

邊對也。先曰：寇未至，奈何先陳兵？以動搖人心乎？命盡徹之。曰：寇

至在我，無勞爾輩。是夜下令易置其將佐部伍，越三日，木合黎軍

至，徑取其城，得戶十萬人，兵十萬，資糧器械山積，降守將烏古

倫寅、荅虎等四十七人，城邑三十有二。舊傳此下有金人喪其根本之地始議遷河南，按金宣宗以甲戌五月遷汴，同

年七月太子守忠棄中都奔汴而北京之降則在乙亥二月，舊傳所言事實先後倒置。木合黎以北京先曾抗命，是年正月，奧屯襄曾

拒戰於花道驛。將屠之也。先諫曰：王師拯民水火，旣降而仍屠之，則未下者

將死守，天下何時定乎？因奏赦之，詔拜也先御史大夫，領北京荅

魯合臣。時金遼東宣撫使蒲鮮萬奴叛據東京，耶律畱哥敗走之。

補此一事更足証舊傳。而興中人石天應與土豪數十據興中，也先分兵

往受其降，奏以爲興中尹，尋奉命副脫纒扯兒必。舊作脫忽，蘭闡里必。監張鯨

等軍，征燕南，未下州郡，行至平州，鯨稱疾不進也。先執送行在所。

成吉思詰之。鯨對實病。非敢有宅。汗曰。今呼汝弟致來質。當活汝。鯨諾而宵遁。比也。先追斬之。致已殺使者。應其兄矣。致既伏誅也。先籍其私。養死士萬二千。上於朝。其人皆衣黑。號黑軍。詔賜也先虎符。拜鎮國上將軍。以御史大夫提控諸路元帥府。領黑軍。舉遼水以西。灤水以東。軍民之事。悉以付之。丁丑。從木合黎徇河北。攻蠡州北城。先登中礮。死。時年四十有一。木合黎深痛惜之。為屠蠡州。以復讎。子四人。曰查刺。曰咸錫。曰博羅。曰侃。查刺亦善射也。先死。木合黎即軍中。命襲御史大夫。領黑軍。從攻益都。久不下。及降。眾欲屠之。查刺曰。殺降不祥。且得空城。何益。乃止。事在丁丑十二月戊寅。己卯。庚辰。三載之間。從下河東河北諸名城。詔以黑軍分屯真定。

舊傳云。己卯。詔以黑軍分屯真定。云云。按庚辰八月。武仙始以真定降。而謂己卯。即以黑軍屯

固安。太原。平陽。隰。吉。岢。嵐。等府州。其龜及幹歌。互汗南伐。盡以黑軍為顏行。癸巳。正月。敗金將完顏白

撒蒲察官奴於河上。舊傳州白公廟之役渡河再戰。追殲其眾。長驅下汴京。入

自仁和門。黑軍功最。受賞俘獲特多。是歲。復從嗣國王塔思討東

眞僭主蒲鮮萬奴圍其南京城堅如立鐵查刺令裨將先警其東
北親奮長槊大呼躍登其西南角摧其樓櫓斬守陴卒數十大軍

乘之城遂拔塔思解錦衣賞之阿辛傳誤以塔思爲木華黎辛丑論前後功授眞定

北京兩路荅魯合臣癸卯卒於柳城年四十有四子庫祿滿 庫

祿滿忼慨有志節善射關弓滿石畫的距百步發無不中襲父職

爲黑軍總管歲戊午從大軍攻樊城所從者蓋是塔察兒王晝夜苦戰與從弟

度刺威錫子躡雲梯以登與守陴者戰城上度刺死之中統三年從圍

李壇於濟南分當城一面壇數帥精銳突圍庫祿滿輒掇之後攻

城流矢中額而死年四十有一庫祿滿臨陳每身先士卒或誡之

荅曰好生惡死人之常情吾不以身帥之孰肯捐軀効命者男子

當援桴死綏豈能周旋戶闥死兒女子手中耶聞者壯之子二長

良輔次家兒良輔襲黑軍總管至元十七年累進昭毅大將軍沿

海副都元帥二十一年改沿海上海副萬戶大德十一年致仕子繼

祖襲家兒豐縣尹繼祖子宜孫自有傳也先兄瞻德納後亦棄

金官北歸。爲別失八里荅魯合臣。其孫亦刺馬丹。遼陽行省左丞。亦刺馬丹之子倉赤。湖廣行省平章政事。

石抹明安。桓州人。童時卽意氣自豪。常騎竹馬。令羣兒前導。行列整肅。無敢誼譁者。父老見而異之。及長。遂從軍。思建奇功。歲辛未。

舊傳誤作王申。辨詳本紀注。

成吉思伐金。破撫州。金以西京畱守紇石烈執中行樞。

密院事來禦。陳師隘胡嶺北。獯兒觜時。明安在其麾下。執中謂之。

曰。汝嘗至漠北。識蒙兀汗。其往。問以舉兵之故。彼若不遜。可反。詎。

之。明安如所戒。成吉思命縛以俟。命旣敗。金師召而詰之。曰。我與。

爾無怨。胡衆辱我。對曰。臣北嚮慕化久矣。慮執中見疑。故如所教。

不爾。何由自達。汗善其對。釋之。後二年^晉復從金內族承暉來議。

和親。成吉思許之。明安遂畱不歸。成吉思命領蒙兀軍。撫定山後。

諸州

雲內東勝豐靖寧遠昌桓撫時稱山後

甲戌五月。金主遷汴。其弘軍護駕至良鄉者。

譁。變殺其詳穩來降。時和親已成。成吉思欲遂罷兵北還。明安諫。

曰。金有天下十七路。今我所得唯雲中東西兩路而已。若便休兵。

待彼成謀。并力而來。則難敵矣。且山前之民。久不習戰。乘其驚擾。臨以重兵。可傳檄而定也。兵貴神速。豈宜猶豫。成吉思然之。乃命明安及耶律阿海禿花兄弟。導引大將撒漫合蒙兀軍。由古北口入。與契丹降將斫荅等合勢。徇景薊檀順諸州。有抗命者。諸將議欲屠之。明安奏曰。此輩當死。今若生之。則未埒者聞風自至矣。從之。乙亥正月。師次通州。金右副元帥蒲察七斤舉城降。明安奏仍其職。置之麾下。遂駐軍京南建春宮。時中都圍急。金御史中丞李英元帥左都監烏古倫慶壽。以兵護軍食來援。明安將五百騎。繼右副元帥神撒四百騎往邀之。遇諸永清之南。佯北誘敵。回擊。大破之。敵溺死無定河者無算。獲李英。并其所佩虎符。及糧車千乘。招永清不下。拔而屠之。俄間金將完顏合住監軍阿興鬆哥。復以步卒萬二千人。糧車五百乘。援中都。明安復將三千騎邀之。遇於涿州旋風寨。舊傳宣風寨一戰禽阿興鬆哥。合住遁去。盡獲其輜重。還屯建春宮。四月。攻萬寧宮。克之。取富昌豐宜二關。遂拔固安。五月中。

都糧盡。金雷守丞相內族承暉仰藥死。都元帥抹撚盡忠棄城遁。

城中官屬父老縑素開門請降。明安諭之曰：負固不服，勞我師旅。

非爾等辜守者之過也。其各按堵無恐。仍許軍士以所獲糧畜。入

城貿易。民得食以濟飢。軍得財而止掠。彼此皆感說。明安遂籍金

府庫。遣使奏捷於涼。徑行在所。詔拜太保。舊傳誤作太傅國公兼管蒙兀漢

軍兵馬都元帥。守中都。先是順州之破，兵士縛密雲主簿完顏壽

孫以獻。明安釋而用之。不久逸去。已而復來。問其故。對曰：有老父

在城中。慮無以自存。謀歸侍養。今已歿。故復來耳。明安義而釋之。

其在軍寬恕。大率類此。歲丙子。卒官。然則守中都不過踰年也年五十有三。追封

邵國公。長子咸得不。不一作卜。或作補。西遊記燕京行省金紫石抹公即此人。黑韃事略作慙塔下。襲太保。金紫光祿

大夫。燕京行省兼蒙兀漢軍兵馬都元帥。時法制未定。軍民之官

一切便宜行事。得專生殺予奪。咸得不性貪暴。縱下擾民。契丹遺

種恃勢橫行。白晝劫掠。殺人盈市。耶律楚材聞之泣下。歲戊子。與

塔察兒馳驛至燕京。按誅盜殺人者。仍奏請韓歌互汗。敕下州郡。

非奉璽書。不得擅徵發。因當大辟。必待報違者。臯死。咸得不凶。燄始稍戢。次子忽都華。幹歌互汗朝。亦為燕京等處行尙書省事。兼

蒙兀漢軍兵馬都元帥

疑其兄以臯罷而代之唯史無明文

石抹孛迭兒。契丹人。亦稱蕭氏

舊紀作蕭孛迭兒。木華黎傳傳蕭特末兒。

父桃葉兒。徙居中

都路霸州。孛迭兒仕金為本州平曲水寨管民官。歲癸酉。木合黎

徇地至霸。孛迭兒迎降。權授千戶。甲戌。從木合黎觀成吉思於雄

州行在所。賜銀符。充漢軍都統。車駕次牛蘭山。欲盡戮漢軍。木合

黎以孛迭兒可用。奏釋之。因請以隸麾下。從平高州。乙亥。授元帥

左監軍。換佩金符。與都元帥吾也而分領錦州紅羅山及北京東

路漢軍。木合黎檄令將所部。從脫纒扯兒必

舊傳奪忽。蘭闕里必

徇地河北。先

登拔洛州。丁丑。從木合黎平益都及沂密淄萊等州。戊寅。從定太

原平陽及忻代遼沁澤潞汾霍。己卯。自大同分軍出朔州。下武州。

遂克岢嵐石陽。

石舊紀作吉

辛己。木合黎承制授為龍虎衛上將軍。霸州

等路元帥

舊傳此下衍佩金虎符四字

統黑軍。鎮守固安水寨。既至。令軍士屯田。且

耕且戰。披荆棘。造廬舍。不數年。城市完復。為燕南屏蔽。庚寅。朝幹

歌。汗行在所。重賜金符。汗即位時所掬收。至是重賜之百。辛卯。從嗣國王塔思渡河

伐金。癸巳。從討蒲鮮萬奴於遼東。平之。孛迭兒始以偏裨從征。伐

及為大將。大小百餘戰。所至有功。年七十。以疾卒。子札查刺。舊傳此下更有

查茶刺三字似雜采碑誌以聲同譯異而誤衍又有石抹海住者。亦契丹人。本名德亨。字仲通。

海住其小字也。亦稱蕭氏。金貞祐閒來降。不合黎承制授館陶縣

招撫使。從克磁州。不戮一人。斡歌。汗朝。從大軍平河南。獲鹿邑

太康。生口五千餘。悉縱之。以從復彰德功。拜奉國上將軍。彰德路

軍民總管。兼行元帥府事。卒。子珪。征行千戶。孫世昌。字榮甫。年十

三。襲千戶。已雄偉如成人。從討李璫。及復宿州。蘄縣。皆有功。至元

五年。攻宋五河口。手馘四十餘人。搏戰舟中。流血浸踝。獲敵艦二。

卒於軍。年二十有五。妻段氏。以節孝旌門。子二。桓。襲千戶。從鎮南

王。征交趾。以疾歸。卒。贈武略將軍。追封臨漳縣男。謙。仁和縣尹。謙

子哈刺不花。內丘尹。

論曰。金自正隆大定閒。窩斡之叛。契丹遣人至有變姓氏。以避禍者。愁怨深矣。章宗之世。耶律阿海偶因奉使納質北庭。知此輩已蠢蠢思動。宣宗褊狹。猜防益嚴。而耶律留哥遂發難遼左。斫荅比涉兒蕭札刺譁變。良鄉遙應之。於是捏兒王珣石抹也。先起遼右。明安起灤陽。孛迭兒起河北。或奔走獻策。或臨隄輸款。各因際會。假手斃金。既保身家。且以寫其亡國之恨焉。說者謂釁由種族。實則政教不善。有以致之。不然。蒲鮮萬奴。曷嘗非女真同種哉。

耶律阿海石抹也先等列傳第三十一 蒙兀兒史記卷第四十九

春國... 出... 卷四十一

...

...

...

...

...

...

...

...

...

...

...

...

...

...

...

怛哥撒兒孛魯合列傳第三十二

蒙兀兒史記卷第五十

武進屠 寄篋

怛哥撒兒察合札刺亦兒氏

舊傳作察哈札刺兒

國王木合黎之從孫也。曾祖

赤刺溫孩亦赤

舊作赤老溫愷赤核從秘史

祖搠阿。竝事成吉思汗

按秘史帖列格禿伯顏以占溫兀阿赤刺溫孩

亦赤者卜客三子及古溫兀阿之子木合黎不合赤刺溫孩亦赤二子統格合失來見成吉思在威吉思戰敗主兒乞之後時也速該把阿禿兒已前死數十年矣而舊傳云曾祖赤老溫愷赤祖搠阿父那海竝事烈祖未免妄誕已甚傳又云及太祖嗣位年尚幼所部多叛搠阿獨不去皇弟朶只哈撒兒陰擿之去亦謝不從按成吉思幼時引其父舊部叛去者泰亦赤兀氏之脫朵延而非拙赤台撒兒獨留事成吉思母子不去者見豁壇老人察刺合而非搠阿觀秘史自知其誤赤刺溫孩亦赤二子中無搠阿之名其事成吉思蓋在統格合失之後搠阿精

騎射有蔑兒干之號嘗從獵遇盜適有二鶩翔空汗命射之搠阿

請曰射其雄者乎抑雌者乎汗曰雄者搠阿一發果墜其雄盜望

見驚去從戰乃蠻敵帥銳兵一再鼓而進搠阿按兵不動敵疑畏

不敢犯又從征蔑兒乞兵潰搠阿與弟左右力戰衛汗會兀良孩

人者勒蔑來援敵乃引退父那海從斡歌互汗平金以世勳封懷

洛陽百七十五戶

舊傳以為太祖所詔封按太祖時金洛陽未入蒙兀安得以其地封那海太祖蓋太宗之誤

怛哥撒兒事拖

雷恭謹過其父從攻鳳翔又從蒙格汗潛邸西征與斡魯速阿速

乞卜察兀諸部戰。並有功。師還。蒙格汗命為本藩位下札魯忽

赤。先是拖雷薨後。斡歌互汗分真定路為其寡妃莎兒合黑塔泥

湯沐邑。妃以怵哥撒兒能武斷。使往鎮之。其下縱獵擾民。為有司

所糾。乃移其所部。還駐漠北。舊傳云憲宗由是益重之。使治藩邸之分民開出游獵。則長其羣。動如紀律。乃襲諛慕之。文殊不足信也。古

余克汗昇遐。積年議立新君。大策不定。巴禿汗為右手宗盟之長

舊傳之大會諸王駙馬萬戶千戶。建議立蒙格汗。時古余克汗之寡

后斡亦刺氏海迷失可敦攝政。欲立斡歌互汗之孫失烈門。古余克汗異母

弟闡出遣其親信侍臣畏兀兒台。秘史亦作委吾兒台。即岳麟帖穆爾也。巴刺。斡羅納兒氏也。同時有兩巴刺。其一札刺亦兒

氏故秘史於八十五功臣稱此巴刺為巴刺斡羅納兒以別之。舊傳并上一人稱畏兀人刺。不知者將疑為一人之氏與名。二人赴會抗議。曰失烈

門。皇孫也。斡歌互汗嘗謂其可君天下。今舍而它求。將焉置此。怵

哥撒兒按劍而起。曰。汝言誠是。然乃蠻真朵列格捏可敦立古余

克汗時。汝曹胡不以是為言。今巴禿汗固亦遵斡歌互汗遺言也。

有異議者。吾請斬之。眾乃莫敢枝梧。議遂定。初斡歌互汗自幼子

畜蒙格汗。一日行幸。遇大風。入憩帳殿。坐蒙格汗膝下。摩其頂。曰。

是可以君天下。它日用特按豹。皇孫失烈門亦尙幼。侍側曰以特

按豹則犢將安養。鞞歌互汗以為有仁心。又曰是可以君天下。故

至是三人各舉以為言。三人舊傳蒙格汗即位。以其有翊戴功。拜為

古兒迭額札魯忽赤。譯言普上斷事官。見秘史。蒙古文翊解成吉思汗時。忽禿忽那顏即

官制既定。始名其署曰。大宗正府。其長曰也客札魯忽赤。即大位在當時蒙兀三萬戶

宗正卿。哈刺哈孫。答刺罕。嘗為之。其尊不如漢北三大汗時矣。位在當時蒙兀三萬戶

上其時右如漢之大將軍。位在三公上也。既拜命。出帳殿外。欹橐坐

熊席。其僚列坐左右者四十人。怛哥撒兒咨之曰。可汗以我長是

官。諸公謂我當用何道。稱其職。眾皆默然。又問。有夏人和鞞居下

坐。作而言曰。夫札魯忽赤之道。猶宰之判羊也。解肩者不使傷脊。

在得其肯臂而已。怛哥撒兒聞之。即起入金帳。眾不知所為。皆咎

和鞞失言。然怛哥撒兒以和鞞之言善。告之蒙格汗。汗召見和鞞

命之步。曰。可用才也。蒙兀人相法。忽必烈汗亦以是相人。和鞞由是知名。蒙格汗之初即位

也。方行大宴之禮。蒙兀語謂之喝蓋。凡新君即位後。連日大宴來朝。賀之諸王。駙馬。如主文武大臣。亘一月有餘。乃止。失烈門句忽

察句腦忽三王。後二王皆古用其黨大將額勒。只吉互謀為變。舊傳作按赤台。校從

秘史又舊傳稱察哈台之子及按赤台等不數三王所謂察哈台之子似指也速蒙哥然考之西書是役也速蒙哥實未至且下文詔諭中稱察哈台阿哈之孫則似指不里而不里是役亦未至

第後來黨禍一王皆及臯百藉赴朝會為名劄車轅藏兵其中以來將至和林道中

一車轅折兵見有阿黑塔臣克辭傑阿黑塔臣牧官也洪譯西書稱為御者尚非出牧偶見之

歸而上變怵哥撒兒與旭烈兀大王整兵迎之諸謀變者不虞事

遽覺舊傳作按赤台等不虞事遽覺按之西書是時額勒只吉歹尚在西域人脫吉思未歸也倉卒不能戰乃好言赴會大

宴畢蒙格汗親簡有臯者付怵哥撒兒鞠治怵哥撒兒承望風旨

至裸幹亦刺可敦刑訊之不服誣以巫蠱同失烈門之母闊出大子之妃擅

裹投諸河以死窮竟黨與濫及非辜凡與幹歌互汗古余克汗後

人素親附者無遠近皆逮治之蒙格汗以為忠信任不貳當刑者

輒先處洩而後上聞無不報可或有時請亟而汗臥未起怵哥撒

兒直造帳前破箭房汗隔帳問何言即可其奏嘗以所御大帳行

扇賜之其見親寵如此癸酉秋特授萬戶其年冬以病酒卒怵哥

撒兒性殘酷治黨獄不避親貴當時怵於淫威道路以目莫敢誰何及死眾口交謫蒙格汗聞之詔諭其子脫歡句脫兒赤若曰昔

汝高祖赤刺溫孩亦赤。曾祖捌阿舊傳誤脫曾字。事我成吉思可汗。威著勞

勲。唯朕皇祖實嘉賴之。汝祖那海。事我斡歌互可汗。朝互忠勤。勿

愆勿怠。汝父忙哥撒兒。自其幼時。從我皇考經營河南。逮事皇妣

及朕兄弟。亦罔有咎。暨朕西討斡魯速句。阿速句。穩兒別里欽察

之域穩兒別里山名。土土哈傳作玉里伯里山。和尚舊傳玉里別里伯牙兀合氏亦以居是山。而稱即今歐亞兩州間之烏刺兒嶺也。土土哈和尚皆欽察部人。足証穩兒別里欽察六

文亦的勒札。濟大川牙黑等水。造方舟。伐山通道攻馬札兒時形勢如此。攻城戰野。功多於諸

將。俘厥寶玉。時行大賚。則退然無欲得之心。唯朕言是用。修我邦

憲。治我蒐田。輯我奧魯思與魯思舊譯國家取義太廣不如仍用蒙兀語。唯厥忠。雖其私親。與朕

嬪御。小有過咎。一是無有比私。肆朕皇妣。迨朕兄弟。無不嘉賴。朝

之老臣。宿衛耆舊。無不嚴畏。錄其勤勞。命為古兒迭額札魯忽赤。

治朕皇考受民。布昭大公。以辨獄慎刑刑舊誤作民。爰作朕股肱。耳目。衆

無譁言。朕聽以安。時則有察阿互阿合之孫讓。斡歌互可汗之裔。

古余克。可汗闢出之子古余克可汗之子。謂忽察騰忽闢出之子。謂矢烈門。此三人皆斡歌互可汗之孫。故總稱太宗之裔。按蒙格汗朝諸汗未上廟

號。舊傳太宗定宗諸稱必非詔中原。及其黨人。越有它志。賴天之靈。有克辟

文。乃後人譚改者。然殊失當時正稱。

傑者以告於朕。汝父肅將大旅，式遏亂略。額勒只吉互等謀，是用

潰，悉就拘執。朕取有辜，使辨治之。汝父體朕之公，其刑其宥，克比

於法。又使治也。速蒙哥舊脫蒙哥二字不里獄，亦克比於法。唯爾脫歡脫兒

赤，自朕用汝父，執法不阿。兄弟媯黨，咸麗於憲。今衆罔不怨曰：爾

亦有死耶？人則雖死，朕將寵之如生。肆朕訓汝，爾克明時。朕言如

是而有福，不如是而有禍。唯天唯君，能禍福人。唯天唯君，是敬是

畏。立身正直，制行貞潔，是汝之福。反是勿思也。能用朕言，則不墜

汝父之道。人將敬汝，畏汝，毋敢慢汝。不用朕言，人必仇汝。何汝間

汝，汝且有咎。怨汝父者，必曰：汝亦與我夷矣。汝則殆哉。古人有言：

牝雞毋晨。牝雞之晨，唯家之索。汝母汝婦，有讒欺巧，佞構亂之言。

慎勿聽之，戒之哉。怵哥撒兒，怨結身後。久而不解。至元末，其在邊

妻子，猶爲西北叛藩所掠。時鐵穆百汗已卽位，聞而閔之，賜鈔八

千挺，卹其家。至順四年，追封兗國公。脫歡襲萬戶，從蒙格汗伐

蜀。歲己未，汗駐蹕清居山北，置酒大會諸王駙馬百官，議進止。脫

歡曰南土瘴癘。上宜北還。所獲土地人民。委吏治之便。孛斡兒出之子孛樂台笑脫歡爲狃。汗遂弗用其言。是年七月。汗冒署攻合州釣魚山。弗克。竟感疫。殂於行在。脫歡無子。脫兒赤有子明禮帖木兒。至元間。累官翰林學士承旨。從征乃顏。有功。明禮帖木兒子咬住。咬住子也先。延徽寺卿。怛哥撒兒第三子也。先帖木兒有子曰哈刺哈孫。第四子帖木兒不花。有三子。曰塔納朮。曰哈里哈孫。曰伯荅沙。伯荅沙自幼英敏。端重稍長。入宿衛。爲保兀兒臣。歷事鐵穆百汗。海山汗。由光祿少卿同知宣徽院事。海山汗殂。護梓宮北葬。守陵三年。乃還。延祐二年。特拜中書右丞相。時承平日久。朝野清晏。號稱極治。八達汗殂。與聖太后相鐵木迭兒改拜伯荅沙集賢大學士。開府儀同三司。錄軍國重事。崇以虛名。實疏斥之。未幾。以大宗正札魯忽赤出鎮嶺北。泰定閒。還朝。加大保。致和末。上都兵潰。伯荅沙奉皇帝璽紱至大都。足証文宗舊紀倒刺沙奉皇帝寶出降之妄圖帖睦爾汗嘉之。進太傅。仍官大宗正札魯忽赤。至順二年卒。貧無以

為斂。人稱其廉。贈推忠佐理正德秉義功臣。太師。開府儀同三司。

上柱國。追封威平王。第三子八郎。周歲而孤。母契輦傑氏。舊傳作乞陵契

十寡居。守志不它適。八郎後亦官。太宗正札魯忽赤。

孛魯合。世祖舊紀作不魯花也。先不花舊傳作孛魯歡。此依憲宗舊紀初見之名。客列亦氏。祖亦魯忽蠻。以百戶

事王罕。妻脫倫怯呢。生四子。長脫不合。名見蒙文。秘史卷八。次二怯烈哥。次三

失刺斡忽。勒。即孛魯合之父也。季曰合刺阿忽刺。成吉思汗少時

父事王罕。往來客列亦部。怯烈哥深自結納。及成吉思威望日隆。

王罕父子忌之。陰謀襲害。脫不合帥其屬二百戶去之。來歸。道出

汪古部。姚燧救菴集高昌忠惠王神道碑作雍古今依元史阿刺兀思剔吉忽里傳校改。以此知汪古雍古本同種異譯。被留。居之。怛古來

之地。元朝即其地。置倉曰怛來。按蒙兀語頭曰怛克來。義謂頭站之倉。脫不合遣其子也速不花偽為商旅。

走告成吉思汗。汗遣脫孛扯兒必。句。朵互二人。使於汪古部長阿

刺忽失的吉忽里。請釋之。脫不合兄弟及其屬二百戶至。汗命脫

不合為禿魯花。碑云汗問脫不合在王罕所何官。曰質子也。仍俾為質。按凡稱質子皆他部人歸附者。脫不合本王罕部族。在王罕所無稱質子之理。碑詞殊誤。

怯烈哥以舊恩長必闍赤。朝會宴享。班坐上列。歲丙寅。大封開國

功臣失刺斡忽

勒

與兄脫不合竝授右翼千戶

蒙文秘史卷八功臣之第六十七失刺忽勒第七十

四駭不合汗征西域盡帥其屬以從論功賜同鶻降人五百四十有八戶

斡歌互汗朝又從皇弟拖雷假道於宋以伐金

辛卯

歲乙未長子出

征之役兄弟二人又帥其屬隸行間失刺斡忽

勒

卒

碑云夫人哈刺哈納生昌公及速不

台答八昌公

即李魯合 李魯合少孤給事拖雷稍長為其王府必闍赤掌奏記

斡歌互汗以中原戶分封勳貴追念其父舊勞割深州之束鹿為

李魯合食邑

深州碑作順天路據後之辭此時未有順天路之名

拖雷薨李魯合仍襲領所部千戶

事其妃莎兒合

黑

塔泥蒙格汗從母后求致之

蒙兀制子母各有分民故必求而始致

及

汗即位拜也客必闍赤為文臣之長職如丞相

也先不花舊傳作中書右丞相按蒙格汗朝有尚書

無中書又按憲宗舊紀元年辛亥以李魯合掌宣發號令朝覲貢獻及內外間奏諸事即歷舉也客必闍赤之職也乃二年壬子紀文又云李魯合掌必闍赤寫發宣詔及諸色日官職始疑為衍文及考高昌忠惠王碑云歲辛亥詔怛哥撒兒為丞相昌國位其亞明年因敕掌裕藏與祠配醫卜諸臣於昌國原申前制乃知舊紀二年壬子乃申命之詞非衍文也時怛哥

撒兒拜古兒迭額札魯忽赤為武臣之長蒙兀尙武故李魯合位

居其次二人同心夾輔密贊謀議後二年怛哥撒兒卒李魯合任

益專會車駕征蜀命與阿藍答兒輔皇弟阿里不哥大王居守和

林及蒙格汗宴駕合州。李魯合與阿藍荅兒奉蒙格汗寡后翁吉刺氏忽都黑台可敦之命召諸王駙馬百官開忽鄰勒塔之會於

和林西額迭兒阿勒台之地。右手親王定議立阿里不哥嗣大統。

李魯合仍輔政。左手宗王別擁立忽必烈汗於開平。南北爭位稱

兵五年。而阿里不哥敗。至元初。李魯合從以入朝。忽必烈汗命四

親王三大臣會讞其獄。李魯合坐首謀論死。至大中。贈推誠贊治

功臣。儀同三司。太傅。追封昌國公。謚莊愍。進封雲王。四子。曰也先

不花。曰木八刺。曰荅失蠻。曰不花帖木兒。李魯合既死。忽必烈汗

仍善視其後人。也先不花初襲世職。長必闍赤。皇子真金封燕

王。以選爲王傅。忽必烈汗諭王曰。也先不花世勳子孫。端方明信。

嫻習典故。爾每事咨之。必不使爾爲不善也。燕王冊立爲皇太子。

仍傳東宮。至元二十二年。皇太子薨。明年也先不花拜光祿大夫。

出爲雲南行中書省平章政事。時阿郎可馬丁諸種獫夷爲變。遣

軍討平之。立登雲等路府州縣六十餘所。地理志得戶二十餘萬。官

失載

其酋長定其貢稅邊境以寧。大德二年。遷湖廣行省平章政事。會
沐梁有妖獄。飛語連湖廣平章劉國傑及右丞燕公楠。朝廷驛召
二人廷對也。先不花急遣使附奏。明其無他。二人得釋也。先不花
嚮與二人同官。有違言。至是人稱爲長者。八年。遷河南行省平章
政事。河淩落黎隄。督帥有司。身先士卒塞之。水不爲災。明年。進拜
湖廣等處行中書省左丞相。時蛇節已平。將士還屯。論功行賞。始
無虛月。方面晏然。論者謂自哈刺哈孫荅刺罕而後。湖廣使相也。
先不花最賢云。至大二年卒。天曆二年。贈推忠守正佐運翊戴功
臣。太師。開府儀同三司。上柱國。追封恆陽土。謚文貞。進封瀛王。子
五人。曰亦憐眞。曰禿忽魯。舊省忽字。依宰相表補。曰荅思。曰怯烈。曰按攤。亦
憐眞。以選爲皇太子家令。累拜銀青榮祿大夫。湖廣等處行中書
省左丞相。延祐元年卒。天曆二年。贈推誠輔治宣化保德功臣。太
傅。開府儀同三司。上柱國。追封武昌王。進冀王。謚忠定。子搠思監。
自有傳。禿忽魯。歷事四朝。起家宗正府也。客札魯忽赤。皇慶末。

由太府卿拜中書右丞相。延祐二年。罷爲知樞密院事。改拜御史大夫。加太傅。錄軍國重事。卒。天曆二年。贈懷忠秉義昭宣弼亮功臣。太傅。開府儀同三司。上柱國。追封廣陽王。謚清獻。荅思仕。至資德大夫。湖廣道宣慰使。怯烈中政院使。按攤事。鐵穆百汗襲長宿衛。一日思親。乞假省其父也。先不花於湖廣。有旨給七乘傳以往。諸道憲司以孝行聞。拜中奉大夫。海北海南道宣慰使都元帥。在鎮期年。黎酋王高等二十餘洞納款輸貢稅。復以省親辭職去。至大二年。拜資德大夫。中書右丞。行湖東道宣慰使都元帥。未幾。奔父喪於武昌。哀毀卒。天曆二年。贈秉義效忠著節佐治功臣。太保。開府儀同三司。上柱國。特進。中書左丞相。趙國公。謚貞孝。子阿榮。字存初。自幼宿衛海山汗。累官湖南宣慰副使。溫迪罕奉使宣撫湖南。事無鉅細委之。會所部歲饑。蠲奉發粟以振。廣西徭寇起。阿榮鎮之以靜。督有司治兵守境。寇不敢犯。遷湖廣行省左右司郎中。召僉會福院事。除吏部尙書。泰定初。出爲湖南道宣慰

使遷浙東道宣慰使都元帥。以疾辭。天曆初復起爲吏部尙書。尋

參議中書省事。二年拜參知政事。知經筵事。進奎章閣大學士。階

榮祿大夫。太禧宗禋院使。都典制神御殿事。圖帖睦爾汗眷遇之

甚。阿榮亦盡心國政。知無不言。久之。心忽鬱鬱不樂。謁告南歸。武

昌心忽鬱鬱不樂。虞集撰碑之微言也。蓋心非旺兀察都之事。閒居以文史自娛。每見前代忠臣孝子事。

則扼腕曰。是國家之寶。爲奇男子。烈丈夫者。不當如是耶。此數語亦微言。蓋有

感於當時討賊之無人也。日與韋布之士游。所至山水佳處。鳴琴賦詩。日夕忘返。

後至元元年卒。阿榮邃於數學。逆推世事成敗得失。及人禍福壽

夭貴賤。多奇中。天曆三年春時未改元至順策士於廷。阿榮與虞集會於直

廬。慨然興歎。語集曰。更一科後。科舉當輟。輟兩科而復。復則人才

彬彬大出矣。已復太息曰。榮不及見之矣。君猶及見之。集曰。是多

士之幸。如存初言。今文治方興。未必有中輟之理。存初國家世臣。

妙於文學。盛年登朝。在上左右。斯文屬望。集老且衰。見亦何補耶。

阿榮又歎曰。數當然耳。集問何以知之。弗荅。元統三年。科舉果罷。

至正元年始復如其言。木八刺，李魯合次子也。剛簡有威。至元

五年，初立御史臺，妙選臺臣，首拜御史中丞，號為稱職。荅失蠻

李魯合第三子，幼事忽必烈，汗潛邸，與月赤察兒同為王府必闈

赤，及汗即位，獨任第一怯薛，必闈赤，兼監斡脫總管府，持為國假

貸權，歲出入數十萬挺，月取子金八釐，又兼戶部尚書，內八府宰

相，如馬湏耐、郊燔肉祀神諸祀典，皆司之。又諸臣喪疾，可通籍與

否，必是焉取進止，詔凡祝釐金帛，唯視其署，有司始給。至元十八

年，升總管府為泉府司，哈刺哈孫荅刺罕為宗正府大斷事官，曾

奏罷之。二十四年，碑作二十五
年依舊紀改從荅失蠻請，以公私利在，復立，乃顏哈

丹之叛，先後從乘輿，及皇孫鐵穆百討之，奉詔執法軍中，會改釋

教總制院為宣政院，荅失蠻與桑哥首充院使，凡天下職僧之官，

從所調奏，僧徒有臯，唯院司與僧官同聽，民政有司不得專洩。二

十六年

六碑誤
作七

海都犯和林，從駕親征，至康孩，西師已退。

碑云王累戰皆捷，叛王遠遁無

稽讀

巡邊置驛而還，明年拜泉府太卿。元貞初，海都遣其黨也里堅

王寇西番。鐵穆耳汗加荅失蠻平章軍國重事往討之。西番之事本宣政院所掌

仍敕鞏昌便宜總帥府發兵千人從行。聽其節制。十月獲也里堅

及其所部以歸。大德三年兼翰林學士承旨。仍領泉府司事。八年

卒。年五十有七。至大中。贈推忠益國輔治功臣。太師。開府儀同三

司。上柱國。追封高昌王。謚忠惠。二子。長阿刺。黑不花。宣政院使。兼

徽政使。遙授中書右丞相。次不刺泥敦。太府院使。翰林學士承旨。

大司徒。遙授中書右丞相。李魯合第四子不花帖木兒。官至四

川行省平章政事

論曰。忒哥撒兒。天資刻薄人也。三王之獄。刑辱故后。鉤黨親王。逢

君之惡。慘無人理。彼固不知議親議貴之典何物。身浸而謗騰眾

口。蒙格汗猶為之辯護焉。然兩藩怨叛。漠南北坐甲五十年。是誰

之咎歟。李魯合擁戴阿里不哥。內稟蒙格汗寡后忽都。黑台可敦

齷旨。外遵右手諸王駙馬忽鄰。勒塔之僉議。揆諸成吉思以來累

朝約速。殊不足以受非難。及乎大事不濟。從主入朝。束身司敗。非

古之所謂事君不避難。有辜不逃刑者耶。而況乎其辜之公也。刑止其身。不廢其子孫。以此覘忽必烈汗之用心。賢於蒙格汗遠矣。

忙哥撒兒字魯合剌傳第三十二

蒙兀兒史記卷第五十